



~~C. 67. f.~~


C. 67. e.

12

14

6

12



DANIELIS
SENNERTI,

D. ET PROFES. PVBL.

IN ACADEM.

VVITTEBERG.

EPITOME LIBRORVM
DE FEBRIBVS.



J. May



de Scala

LVGDVNI,

Sumpt. PETRI RAVAVD

via Mercatoria, ad sancti
Petri vexillum.



M. DC. XXXV.





LIBER I.
DE FEBRE INGENERE:
ET DE FEBRE EPHEMERA,
AC SYNOCHA SINE
putredine.

CAPVT I.

De natura Febris.



V A Latinis Febris ap- *Febris*
pellatur, Græcis $\delta\pi\omicron\tau\epsilon\tau\alpha$ *nomen,*
 $\pi\upsilon\rho\acute{o}s$, $\pi\upsilon\rho\epsilon\tau\acute{o}s$, & Hippo-
crati absolutè $\pi\tilde{\upsilon}\rho$, impri-
mis si sit vehementior,
appellatur, utpote, quæ omnium con-
sensu morbus calidus est. Quanquam
enim Germani quidam *das Kalte* nomi-
nant; tamen ea appellatio nec omnis
febris est, nec febris naturam exprimit,
sed frigus saltem, quod intermitten-
tium

tium quoddam symptoma est , hoc vocabulo indigitatur.

*Definitio
& natura*

Est enim febris calida intemperies totius, à calore præter naturam in corde accenso , & mediantibus spiritibus & sanguine per venas & arterias in totum corpus, nisi impediatur, effuso orta, actionesque naturales lædens.

Generatio.

Generatur quippe febris, cum, vt Galenus, 1. *aphor.* 14. habet, caliditas natua in igneam mutatur. Nam cum omnes corporis partes certam quandam temperiem obtineant , omnesque actu, suo quæque modo , calidæ sint , atque inde ad actiones naturales edendas aptæ reddantur: si in corde, à quo in omnes corporis partes calor vitalis , qui insitam cuique parti temperiem perficit, effunditur, calor quidam præter naturam accenditur, ac in totum corpus diffunditur, atque temperamento partium naturali gradus quidam caloris præternaturalis adduntur , & caliditas illa actualis intenditur, excessus quidam caloris; ac intemperies calida in toto corpore excitatur, quæ Febris nominatur. Quæ quidem intemperies formaliter, vt nonnulli

nulli loquuntur, præter naturam est, & febris appellatur; materialiter verò non est tota præter naturam. Nisi enim caloris illius naturalis gradus quidam præextitissent, calor ille superueniens hunc caloris gradum constituere non potuisset.

Et quidem sola intemperies calida febris essentiam constituit. Etsi enim omnis febrilis calor ad siccitatē tendat: tamen siccitas illa non in omnibus febribus morbosa est. Neque sicut ob febrilem calorem corpus ineptum ad actiones naturales redditur: ita etiam ob siccitatem in omni febre actiones naturales læduntur; sed licet calor febrilis semper quidem ad siccitatem tendat, tamen sæpe corporis dispositio, in quod calor ille agit, ac humiditas impedit ne siccitas morbosa corpori inducatur.

Subiectum adæquatum febris est totum corpus, aut certè pleræque eius partes: præcipuum verò cor, utpote in quo calor ille primùm accenditur, & in omnes corporis partes, nisi aliquid impediat, diffunditur. Neque enim febris generari potest, nisi cor primò incalescat.

Siccitas non est de essentia febris.

Subiectum.

Et quidem totum corpus febris subiectum est, respectu partium similarium, & quatenus calore actuali, qui ex infinito ac influente calore quasi conflatur, præditum est. Hic enim calor cum mutatur, & ex temperato & moderato in igneum conuertitur, febris excitatur.

Causa proxima febris est calor præter naturam in corde accensus, ac in totum corpus diffusus. Vt enim cor, dum secundum naturam, & rectè sese habet, caloris natiui fons est, eumque in totum corpus diffundit: ita si præter naturam incalescat, calorem præternaturalem in omnibus partibus accendit. Et si enim ex aliarum etiam partium inflammationibus febris accendatur: tamen id non accidit, nisi prius calor ille cordi communicetur, è quo deinceps in totum corpus diffunditur, unde etiam in omni febre in pulsu fit mutatio. Non tamen quiuvis calor cordis ad febrem excitandam sufficit: sed talis ac tantus sit necesse est, vt intemperiem calidam talem in corpore excitare possit, ob quam actiones corporis naturales lædantur.

Ex

De causis februm in genere. 7

Ex quibus patet, aliud esse febrem, *Febris & calor febrili differunt.* aliud calorem febrilem. Febris proprie est intemperies illa calida, quæ viuentibus corporis partibus inest; easque ad agendum impotentes reddit. Calor vero febrilis ille etiam est, qui in humoribus & spiritibus est, quique calidam illam intemperiem, quæ febris essentiam constituit, in toto corpore excitat.

C A P V T II.

De causis februm in genere.

ET si verò intemperiei calidæ in toto *Causa febris.* corpore, quæ febris essentiam constituit, causa est vnica, calor scilicet p. n. in corde accensus, & hinc in totum corpus diffusus: tamen causæ, quæ calorem in corde excitant, variæ sunt. Galenus, *de causis morb. c. 2. & 1. de diff. febr. cap. 3.* quinque recenset, motum scilicet, putrefactionem, contactum rei calidæ, cutis constrictionem, seu retentionem calidi effluuij, denique admiſſionem rei calidæ. Causæ tamen hæc aliæ per se & primò, aliæ per accidens, calorem excitant.

1. Motum primò, quod attinet, cum spiritus & humores corporis nostri calidi sint, ex eorum, pro vario corporis atque animi motu, & in partem aliquam concursu, calor augetur, qui si sit maior, & in corde vel accendatur, vel alibi genitus cordi communicetur, febris inde excitatur.

2. Secundò calorem excitat putredo. *Putredo.* Cum enim omnia, quæ putrescunt, calidiora fiant, & ex corporibus putrescentibus multi calidi vapores attollantur: calor inde in venis & arteriis excitatur, qui cordi communicatus febrem excitat.

3. Tertiò contactus rei calidæ febrem excitat, & si corpus, vel à Sole, vel ab igne, vel balneis, vel medicamentis, incalcescat, & calor ille usque ad cor propagetur, febris accenditur. *Contactus rei calidæ.*

4. Quartò si pori cutis constringantur, ac calidum effluuium, & vapores, ac halituosa excrementa, quæ in coctione in corpore generantur, & per poros cutis discuti solent, retineantur, hinc calor excitatur, & tandem febris. Id quod fit ab aëre frigido, & balneo aquæ frigidæ &

De caussis Februm in genere. 9

& aluminosæ, & aliis caussis poros constringentibus & claudentibus.

Tandem si humoribus & spiritibus res calidæ permisceantur, ut cibus, potus, medicamenta calida, omnia ista calorem, quem obtinent, spiritibus ac humoribus communicant, qui si ad cor penetret, & inde in totum corpus diffundatur, febris excitatur.

5.
Admissio rei calida.

Et quidem quartum genus causæ, seu calidi effluuii retentio sola, absque reliquis, ad febrem excitandam sufficit: Reliquæ verò causæ absque hac febrem vix excitare valent. Etsi enim à motu, putredine, contactu, ac permistione rei calidæ, vapores calidi in corpore excitantur: tamen si corpus liberè ventiletur, & quantum indies talium vaporum generatur, iterum discutiatur, febris facilè non excitatur. Quando verò calidi illi vapores retinentur, febris accenditur.

Etsi verò hæ causæ, si validæ sint, in quocunque corpore febrem accendere possint: tamen in dispositis corporibus etiam mediocris causarum vis ad febrem inducendam sufficit. Sunt autem

Corporis ad febrē dispositio.

A 5 ad

ad febres magis dispositi, qui plurimo calore, acri, ac saluginoso abundant. Qua de causa ad febres iuvenes magis sunt dispositi. De quo videatur Galenus, 8. *Meth. med. cap. 8.* ubi totus ordo dispositionum ad febres hic habetur. 1. calida ac sicca. 2. calida & humida. 3. calida tantum. 4. sicca tantum. 5. temperata. 6. frigida & sicca. 7. frigida tantum. 8. humida tantum. 9. frigida & humida. Ad aliud tamen febrium genus alia corpora magis disposita sunt.

C A P V T III.

De symptomatibus febrium in genere.

*Febrium
sympto-
mata.*

CUM verò in febre temperies corporis mutetur & calidior reddatur, hinc febrium symptomata quædam oriri necessum est. Et primò quidem facilè hinc patet, eas actiones præcipuè lædi, quæ à similaribus partibus, quatenus tales sunt, & beneficio téperamenti cuiusque partis, nulla instrumentariæ partis constitutione concurrète, obeuntur. Talis actio cum sit nutritio, & quæ ei inserviunt, ea præcipuè in febribus læduntur.

De symptomatibus februm in genere. 11
 læduntur. Quia tamen organa, quibus
 reliquæ actiones obeuntur, ex similari-
 bus cōstant, labes illa ad reliquas actio-
 nes, vitales & animales putà, deriuatur.
 Et quidem vitales actiones maximè in
 febre læduntur, cùm febrilis calor pri-
 mùm in corde accendatur. Vnde in om-
 ni febre pulsus fiunt frequentiores & ce-
 leriores. Nam cùm vsus in omni febre
 augeatur, primò fit pulsus creber, vtpo-
 te qui est omnium facillimus. Quod si
 frequentia necessitati non satisfaciat,
 celeritas accedit: quod si nec sic neces-
 sitati satisfiat, tandem magnitudo acce-
 dit; modò virtus non sit debilis. Actio-
 nes etiam animales non rarò læduntur.
 Reliqua symptomata quod attinet, cal-
 or præternaturalis molestus vel foris
 vel intus percipitur. Ex coctionibus læ-
 sis etiam excrementa & qualitates cor-
 poris variè mutantur.

C A P V T IV.

De Februm differentiis in genere.

PORRò differentias februm quod at- *Differen-*
 tinet, sumuntur aliæ ab earum essen- *tia.*
 A 6 *-tia,*

tia; aliæ ab accidentibus. A calore ipso febris differentias desumptas proponit Hippocrates, 6. *Epid. comment. 1. text. 29.* quod febres aliæ sint mordaces, quæ scilicet manum tangentis mox feriunt, & propter vaporem illum acrem, qui ex putrescente materia attollitur, manum quasi pungunt: Mites verò, quæ ipsæ quidem etiam calorem molestum habent, sed non ita acrem. Deinde febrium aliarum calor ad primum tactum quidem acris & mordax non videtur, sed si manus diutius iniecta teneatur, postea sese prodit: aliarum contra calor manui celeriter sese offert, sed si manus diu iniecta teneatur, à manu superatur, & paulatim remittit.

Verum maximè propriæ sunt illæ differentia, quæ sumuntur ab inhærentia in subiecto & causa inhærentiæ; qua diuiduntur febres in *ephemeras*, *putridas*, & *hecticas*: cuius diuisionis fundamentum verissimum hoc est, quod febris alia est *σχιζήν* seu in habitudine, alia *ἐν ἡμῖν* seu in habitu. Etsi enim calor febrilis in omni febre partes corporis similes occupat: tamen aliàs ita inhæret,

ret, vt nulla caussa fouente indigeat, & licet à spirituum & humorum incendio non foueatur; nihilominus durare possit, quæ febris *ἐξάνθη* nominatur. Aliàs intemperies calida ita inest similaribus corporis partibus, vt nisi à spirituum & humorum incendio foueatur, subsistere amplius non possit, quæ febris *ἐξέτησις* nominatur: quæ pro ratione causæ duplex est, *ephemera*, ad quam etiam synocha sine putredine refertur; & *putrida*.

Est & illa notatu digna differentia, quod febris alia est primaria, alia symptomatologica. Primaria est, quæ nullum morbum sequitur, sed à propria caussa pendet. Secundaria vel symptomatologica, quæ ab inflammatione alicuius membri oritur. Vide Galenum, 4. *aph.* 73.

Verum de symptomatolicis notandum, earum, quæ ab antiquis omnes pro symptomatolicis habitæ sunt, reuera plurimas primarias esse, & inflammationes partium, pleuræ, pulmonis, faucium, potius iis accidere, quàm vt febres ab iis ortum habeant: quæ febres non incommodè Comitatae nominantur.

*Febres
comitatae.*

CAPVT V.

*De curatione februm in genere.**Curatio.*

Curationem quod attinet, equidem febris qua febris, vt intemperies calida, refrigerantia indicat. Galenus, 8. *method. med. cap. 1.* Verum quia februm non parua est differentia, & sæpe cum causa sua coniuncta est febris, causæ etiam habenda est ratio. Imò quia non rarò plus vrget causa, quàm ipsa febris, ita refrigerandum, ne causa foueatur, & quæ tolli debebant, in corpore detineantur. Et non rarò hac in re peccatur, dum, saltem caloris ratione habita, refrigerantia exhibentur, quibus causa febris detinetur & febris prolongatur: cum contra caleficientia, seu aperientia seu sudorifera, sine refrigerantibus, febrem sæpe feliciter tollant. Causa enim sublata ipsa febris sponte cessat.

De quibus postea
in specie dicetur.

CAPVT

CAPUT VI.

De Febre Ephemera.

FEbrium, quarum calor partibus corporis nostri καὶ σχεῖον inhæret, duplex genus est. Intemperies enim illa καί. calida partium vel à spirituum, vel humorum calore & incendio fouetur: & quidem humores vel absque, vel cum putredine accenduntur. Febres, quæ à spirituum & humorum sine putredine calore fouentur, Ephemeræ & humorales sine putredine: quæ ab humoribus putrescentibus accenduntur, Putridæ dicuntur.

Quæ à spirituum incendio fouetur febris, Græcis πυρετός ἐφήμερος, Latinis *Ephemeræ nomē.* Diaria, & Ephemera appellatur, nomine non ab essentia eiusdem, sed à duratione petito. *Definitio.* Essentiæ verò ratione definiri potest; *quod sit febris à spirituum vitalium incendio, seu spiritibus vitalibus calefactis orta & dependens.*

Causa nimirum proxima huius febris est spirituum vitalium calor præter naturam & incendium, à quibus per arterias

terias in totum corpus effusis id præter naturam incalescit.

*Causa
remota.*

Excitatur autē ille ab omnibus causis supra, cap. 2. propositis, excepta putredine : quæ quidem nunc immediatè, nunc mediatè per spiritus naturales & animales, spiritus vitales calefaciunt: scilicet animi perturbationes, tristitia, timor, sollicitudo, ira, vigiliæ nimia, animi nimia intentio; corporis motus nimij, dolores, fames, sitis; cibus ac potus calidus, ebrietas, cruditas in corporibus biliosis; æstus aëris, ignis; balneum calidum; calidi effluuij retentio; inflammationes adenum, & bubones, è quibus sola caliditas sine putridis vaporibus cordi communicatur, secundum vulgaram sententiam. Impossibile tamen non videtur, quin ipsi vapores putridi; per venas & arterias in partem affectam tendentes, cordi communicari possint. Atque ita febres hæ essent potius symptomatice, quàm putridæ.

*Corporis
dispositio.*

Incidunt autem in febrē hanc facilius calidi & sicci, in quibus calidæ & siccæ fuligines multæ colliguntur, quæ promptè à causis calefacientibus accenduntur.

Inter

Inter signa, quibus hæc febris cognoscitur & ab aliis discernitur, primo loco recēset Galenus, 1. *de differ. febrium* cap. 7. incipere à causa procatactica, euidente & manifesta. Quod signum quidem est inseparabile, sed non proprium. Nam febris quidem, quæ non incipit à causa procatactica & manifesta, non est Ephemera: non tamen omnis febris, quæ incipit à causa manifesta, est Ephemera. 2. Deinde vrina in substantia, colore, & cōtentis vrinæ sanorum est simillima, aut certè non multum ab ea recedit, quod in Ephemera, quæ ex cruditate provenit, fieri solet, in quibus vrina crudior & albidior apparet. 3. Pulsus naturali propior est, quam in vlla alia febre; nisi quod in magnitudine, celeritate & frequentia intendi solet. Pro causæ tamen etiam ratione, quæ febrem induxit, aliqua in pulsu mutatio fieri potest. 4. Calor huius febris est mitis & suavis aliarum febrium respectu. 5. Imò in ipso etiam statu & *ἀνυσ* febris calor est moderatior & blandior. 6. Inuadit hæc febris sine frigore, horrore vel rigore, ascensusque & augmentum

augmentum in calore & pulsu est liberum & æquale. 7. Tandem declinatio fit cum madore, seu humida euaporatione, sudori sanorum, qui ab exercitio paulò maiore erumpit, simili; madoremque istum perfecta ἀσυρξία sequitur, ut nullum post declinationem vel in pulsu, vel in aliis febris relinquatur vestigium. Et si aliquod febris vestigium relinquatur, in aliam febrem permutari indicio est.

Causæ autem rectissimè ex relatione ægri cognoscuntur, qui Medicum edocere poterit, an ex animi affectu, corporis motu, vel alia causâ evidente in hanc febrem inciderit. Ipsæ tamen etiam hæ causæ sui vestigium in corpore relinquunt, quod Medicum latere non poterit.

Prognostica.

Cæterum febres hæ omnium sunt brevissimæ, & ultra 24. horas nō extenduntur. Vacant etiam omni periculo, modò error aliquis non committatur, & à natura plerumque vincuntur, unde rarò ad tales febres curandas Medici vocantur. Pro diuersitate tamen causarum, à quibus inducuntur, aliæ facilius, aliæ

aliæ difficilius tolluntur. Quæ enim causæ difficilius tolluntur, & humores vim corrumpendi habent, ab iis inducta febris faciliè in putridam degenerat; quod fit, vbi ultra 24. horas extenditur, aut nullus sudor erumpit, dolor capitis adest & perseverat. Et quidem degenerat vel in synocham sine putredine, si corpus sit iuvenile, plethoricum; vel in putridam, si corpus sit cacochymicum; vel in hecticam, si corpus sit calidum, siccum, rarum. Indicantque etiam signa febrium illarum propria, in quamnam earum fiat transmutatio.

Porro cum febris hæc sit calida totius intemperies à spirituum incensorem fervore dependens: & fervor spirituum & intemperies ab eo inducta, refrigerantia indicant. Si tamen causam excitans adhuc præsens sit, etiam illa tollenda.

Indicationes.

Curantur autem febres hæc victu commodo, ut accuratioribus medicamentis raro opus sit. Victus ergo sit refrigerans & humectans. Cibus sit boni succi & facilis coctionis: imprimis utilis est cremor hordei: reliqui condiantur lactuca,

Curatio.

lactuca, acetosa, succo citri, aceto. Potus sit aqua hordei, vel cereuisia tenuis, aut vinum album, tenue. Si tamen dolor capitis adsit, aut febris sit ex ira vel bubone, vino planè abstinendum. Antiquis balneum aquæ tepidæ fuit vñtissimum: verùm hodie nec eadem in apparandis balneis adhibetur industria, nec homines nostri ita ad balnea assueti & dispositi sunt.

Simul etiam ad causas, quæ febrem induxerunt, respiciendum, hisque contraria opponenda. Vt si ab aëre calido sit Ephemera, æger in locum frigidum transferendus: si à motu nimio, quies imperanda, & corpus statim cibo reficiendum: si à vigiliis, somno indulgendum, &c.

*Epheme-
ra cura-
tio ex
angustia
cutis.*

Imprimis verò eius febris Ephemera, quæ ex cutis adstrictione, vel desitate, aut ventriculi cruditate ortū habet, diligens habenda ratio; cum facilè in putridam abire possit. Et quidem Ephemera, quæ ab obstructione cutis fit, cum potius à copia sanguinis, quàm à cacochymia fiat, in ea statim vena aperienda, ut sanguis imminuatur & vètiletur.

Cutis

Cutis verò densitas si sit à frigore vel adstringentibus, iis, quæ rarefaciunt & aperiunt cutem, curatur; balneo aquæ dulcis tepidæ, frictionibus mollioribus, oleis temperatis & tepidis, quibus corpus inungendum. Si verò à caussis exsiccantibus sit cutis densitas, vtendum victu humectante, corpusque illinen- dum oleis temperatis & humectantibus.

Tandem si ex cruditate sit febris E- *E ven-*
phemera, cum cruditas illa sit duplex, *tricoli*
vna acida dicta, quæ ex calore diminuto *crudita-*
prouenit, altera nidorosa, quæ à calore *te.*
p.n.aucto ortum habet: si ex acida cru-
ditate, quod tamen rarò fit, febris Ephe-
mera proueniat, & quidem cruditas illa
sit minor, vt cibus in meliorem statum
reduci possit, somno & quieti indulgē-
dum, & à somno cibus facilis coctionis
pauca quantitate exhibendus, & ven-
tricus oleis calidis fouendus. Quod si
maior sit cruditas, cibus vomitu reijiciē-
dus, aut si æger ad vomitum procliuis
non sit, leni medicamento per aluum
educendus, antequam in venas distri-
buatur, & à cibo abstinendum, ac ven-
tricus cum internis, tum externis me-
dica



dicamentis calefaciendus. Si verò cruditas sit nidorosa, frigidis ea corrigenda, quibus, si coctio non emendatur, cibus corruptus vel vomitu eiciendus, vel per aluum lenibus medicamentis primas vias euacuantibus, bili convenientibus, expurgandus, ac ventriculus corroborandus.

C A P V T VII.

De Ephemera plurium dierum, & synocha sine putredine.

*Ephemer-
a plu-
rium die-
rum.*

ESt tamen adhuc aliud febriū Ephemerarum genus, cui quidem nomen hoc non comperit; cū ad plures dies extendatur: ad nullum tamen aliud febrium genus; quam hoc, commodius referri potest. Ideoque, quasi Ephemera essentiae nomen esset, Ephemera, sed cum adiectione, plurium dierum nominatur.

Tales febres sunt primò eæ, quæ à febribus Ephemeris modo descriptis nulla re, nisi causæ durabilitate differunt, qualis causa est obstructio vasorū circa cutem, quæ cum non mox desinat,

nat, etiam incendium spirituum tam diu continuatur, donec causa illa cesset.

Deinde huc pertinet synocha sine putredine dicta, vulgò etiam febris Inflammatoria appellata, quæ generatur à spirituum & sanguinis tenuioris effervescencia sine putredine. *Synocha sine putredine.*

Causa huius febris est prohibita transpiratio calidi effluuij, ex obstructione vel constrictione pororum cutis, in corpore plethorico. *Causa.*

Durat hæc febris plures dies, ad tertium nimirum vel quartum: neque enim vaporum ex sanguine exhalantium & accensorum copia vno die discuti, neque obstructio vel adstrictio pororum cutis vna die solui potest.

Signa febris synochæ sine putredine sunt eadem, quæ reliquarum Ephemerarum, magis tamen eidentia. Calor enim est paulò maior, quàm in reliquis Ephemericis: cutis non est sicca, sed madida quasi: vrina paulò crassior & rubicundior, pulsus vehemens, celer, frequens, plenus, magnus atque æqualis. Facies & totum corpus rubet, & quasi inflatum apparet; venæque copia sanguinis *Signa diagnostica.*

guinis turgent; caput graue est, respiratio difficilior.

Prognostica.

Febris hæc, vt reliquæ Ephemeræ, periculo quidem vacat, soluiturque sudore vel hæmorrhagia narium intra quartum, vel, si longius protrahatur, intra 7. diem: modò rectè tractetur. Nisi enim rectè tractetur, in synocham cum putredine transit, aut in phrenitidem, anginam, pleuritidem, aliamvè periculosam inflammationem mutatur.

Curatio.

Cæterum cum hæc febris ex spirituum & sanguinis tenuioris incendio, in corpore plethorico, ob prohibitam transpirationem ortum habeat, sanguis copia peccans imminuendus, calidus refrigerandus, pori clausi aperiendi.

Ideoque statim, præmisso tamen clystere, vel leniente medicamento, vena aperienda, vt sanguis imminuatur, ventiletur, refrigeretur, & à natura rectius gubernari possit. Et quidem satis copiosè, ac copiosius, quam in vllâ aliâ febre, sanguinem mittere licet, ita tamen, vt vires id ferre possint.

Alterantia quod attinet, Galenus refrigerat

frigerandi sanguinis gratia aquam gelidam propinat, ægrumque, quantum libet, bibere iubet. Quod in iis locum habere potest, qui frigidaë potioni sunt assueti, & quibus nullum ex aquæ potu incommodum metuendum est, siue propter crassorum & lentorum succorum præsentiam, quos aqua frigida pota digeri prohibet, siue visceris alicuius debilitatem, ob quam ab aquæ frigidaë potu id offendi potest. Quæ conditiones cum in nostris corporibus raro adsint, utendum potius aliis refrigerantibus, qualia sunt oxymel dilutius, aqua cichorii, endiuia, decoct. hordei, succus citri, oxysaccharum, spir. vitrioli, salis, & similia refrigerantia atque aperientia. Et ut apertio felicius perficiatur, à syrupis & multo saccharo conditis, nisi multum diluantur, abstinendum. Si obstructio pororum cutis adsit, aperienda, ut antea dictum.


Cibus sit tenuis & paucus, qui refrigerandi & humectandi vim habeat, imprimis prisanaë cremor. Cibus etiam condatur succo citri, granatorum, ri-

B bes:

bes : potus sit aqua hordei, vel cereuisia tenuis.

*Synocha
biliosa
Fernelij.*

Fernelius, *de febribus*, cap. 5. alterius adhuc febris synochæ mentionem facit, quæ fiat ex spirituum & biliosorum humorû incendio sine putredine, quæque ortum habeat ab iisdem causis, à quibus Ephemeræ, si in corpus biliosum inciderint. Quæ quidem sententia locum habere potest, si de sanguinis calidioris parte tenuiore & subtiliore accipiat, quæ interdum bilis appellari solet, non verò de bile excrementitia.



LIBER II.

De Febribus putridis.

CAPVT I.

De febribus putridis in genere.

CVM febrium, quarum calor *καὶ σίσιον*, partibus inhæret, duplex genus sit, quarum alterum à spirituum vel sanguinis partis tenuio

tenuioris incendio sine humorum putredine, alterum à vaporibus è putridis humoribus eleuatis ortum habet, ac fouetur, ac de priore genere hæcenus dictum sit: proximum iam est, vt de febribus putridis dictis agamus.

Dari autem febres putridas multa *Febres putridæ.* docent. Nam neque ab humorum natura alienum est, eos putrescere posse; cum id omni mixto competat; & aliàs in corpore humano humores putrescere videamus, vt in inflammationibus accidit, in quibus pus generatur: sicut Galenus, 1. *de differ. febr. cap. 6.* putredinem, qua in venis humores putrescunt, cum ea, qua in tumoribus pus generatur, comparat. Et vt actu putrescant, causæ sufficientes dantur, quas postea proponemus. Et res ipsa testatur humores in venis putrescere. Nam & sanguis, qui è venis sectis emittitur, & quæ per aluum, vrinam, sudorem euacuantur, satis foetore & aliis modis putredinem humorum arguunt. Ipsaque curandi ratio eam demonstrat, quæ non solis alterantibus, sed & euacuatione humorum perficitur, quæ partim à natura, partim

à Medico instituitur. Si enim citra putredinem febres humorales fierent, etiam solis alterantibus curarentur. Et quidem febres tales non solum malignæ sunt, ut nonnulli existimant: sed eadem signa apparent, & curandi ratio adhibetur in intermittentibus & continuis, quæ omni malignitate & pestilitate carent.

*Putredo
quid.*

Putredinem autem Aristoteles, 4. *meteor. cap. 1.* definit esse corruptionem proprii & naturalis caloris in vnoquoque humido, à calore ambientis externo: à Galeno verò, 11. *meth. med. cap. 8.* proculdubio non tam ad commune & adæquatum putredinis subiectum, quam ad corpus humanum, medicæ considerationi subiectum, respiciente, quod sit mutatio totius substantiæ corporis putrescentis ad corruptionem à calore extraneo. Putredinis enim ultimus terminus & finis est partium, è quibus mistum constat, resolutio & totius misti corruptio.

*Putredo
quotu-
plex.*

Prolixas verò, quæ apud Philosophos & Medicos extant de putredine disputationes, ut hic prætermittamus, illud

illud non omittendum videtur, putredinem ratione mistorum putrescentium aliam esse secundum totum & perfectam, qua mista in elementa, è quibus coaluerunt, planè resolvuntur: aliam secundum partem & imperfectam, qua, quæ multum humidi obtinent, putrescunt. Cum enim humidum, quò abundant, totum à calore educi non possit, saltem partes eius aliquæ, præcipuè tenuiores, educuntur. Atque talis putredo, scilicet secundum partem, etiam humoribus competit; cum scilicet aliquæ eorum particulæ reuera corrumuntur ac formam suam amittunt: totus tamen humor formam suam necessariò non amittit: unde etiam nomen suum retinet, & corruptis illis partibus euacuatis ad pristinam naturam redit; nisi corruptio eò usque progressa sit, ut in aliam speciem fiat mutatio. Quæ ipsa proinde putredo reuera putredo est, non tantum alteratio. Et si enim totum non corrumpitur: tamen aliquæ eius partes reuera corrumuntur.

*Secundū
totum.*

*Secundū
partem.*

*Putredini
caus-
sa.*

Excitatur autem in corpore putredo

do à calore extraneo, & cum humores à calore naturali amplius non reguntur, sed eo destituto corrumpuntur. Ideoque omnia, quocunque nomine veniant, quæ causa esse possunt, ut calor innatus debito modo humores amplius regere non possit, putredinis humorum causa esse possunt. Putredo autem humorum etsi sæpissime excitetur ab obstructione venarum & viscerum, ac prohibita libera transpiratione, cum, ut Galenus, in *meth. med. cap. 4.* scribit, quæ calida & humida sunt, in loco calido & humido non perflata & ventilata facile putrescunt: tamen & sine hac ex putridarum rerum occurſu & aliis causis, quæ calorem nativum debilitant, & extraneum calorem inducunt, putredo excitari potest.

I. Humo-
rum vi-
tium.

Primo enim humores quidam ob internum vitium sponte ad putredinem tendunt, aut certe à causis putredinem inducentibus etiam leuibus vincuntur, & leuissimam occasionem nacti in putredinem prolabuntur. Tale autem vitium humores contrahunt, primo ex prauis

prauis cibis, è quibus generantur, siue natura talibus, siue quacunque de causa corruptis: Deinde à cibis, qui facile corrumpuntur, quales sunt fructus *apri*: Tertiò à praua ciborum præparatione, vel mala coctione, vel cum nimia copia, tempore non conueniente, aut ordine præpostero ingeruntur: Quartò ob partium coctioni destinatarum vitium, ob quod etiam bona alimenta corrumpuntur: Tandem etiam ob alias causas, quæ vel coctionem impediunt, vel excrementa retinent, & omnino rerum sex non naturalium præposterum vsum. Quò ergo plus talium humorum in corpore cumulatur: eò facilius ij putrescunt. Humores enim excrementitios natura tâto studio, vt eos, qui corpori alendo sunt idonei, nò tueretur; vndè facile corrumpuntur & putrescunt. Sanguis tamen etiam extra venas effusus, cum sit extra naturalem locum, & calidæ ac humidæ naturæ, facile putredinem concipit. Etsi verò tales humores sponte in putredinem, vtpote in loco calido & humido consistentes, incidunt: tamen facilius id accidit, si

caussa aliqua alia accedat. Imò etiam in corpore sano boni humores, si causse putredinis sint potentes, putredinem concipere possunt.

2. *Transpiratio prohibita.*

Inter causas autem eas prima & præcipua est transpiratio & ventilatio prohibita, siue ea accidat ob pororum cutis angustiam, siue ob vasorum & meatuum in corporis partibus penitioribus obstructionem. Calida enim & humida in loco calido, nisi ventilentur, promptè putrescunt. Angustia pororum cutis fit vel à constrictione à frigore, aut rebus adstringentibus, aut siccitate, ut mora sub radiis Solaribus; vel obstructione, quam parit aut copia, aut visciditas, aut crassities humorum. Meatus interni itidem obstruuntur, vel à copia sanguinis vndecunque contracta, vel ab humorum crassitie & visciditate.

3. *Causse calefacientes.*

Secundò putredinem excitant, quæ in humoribus calorem præternaturalem accendere, ac calorem natium euocare possunt; in quo genere est febris ephemera, quæ hac de causa in putridam sæpe mutatur in calidis & humidis

De febrium putridarum differentiis. 33
dis corporibus : deinde reliquæ causæ
calefacientes, aëris calor, balneum cali-
dum, animi & corporis motus nimij.

Tandem putridarum rerum occurfus
est causâ putredinis: cùm, quod à pu-
trido tangitur, ipsum etiam inquinatur
& putrescit.

4. *Putri-
darum re-
rum oc-
curfus.*

Ex quibus omnibus patet, febrem
putridam esse febrem, à vaporibus ca-
lidis è putredine humorum excitatis, &
cor atque hinc totum corpus præter
naturam calefacientibus, ortum habens.

*Febris
putrida
quid.*

C A P V T II.

De febrium putridarum differentiis.

Differentias autem febrium quod
attinet, etsi plurimæ recenseantur:
quæ tamen ad curationem maximè
cognitu necessariæ sunt, petuntur vel
à materia putrescente, vel loco pu-
tredinis.

*Humorū
putre-
scentium
differen-
tia.*

Primò enim putrescunt vel partes
solidæ, vel humores, vel etiam ipsi spi-
ritus; de quo tamen controuertitur, ut
suo loco dicetur. Humores, qui putre-
scunt, sunt tam naturales, quàm præter-

B s natu

naturales : atque ij omnis generis, sanguis, pituita, bilis, melancholia ; quod tum eorum , quæ per alium , vomitum & sudores euacuantur , & symptomatum , quæ febribus accidunt , varietas ostendit, tum caussarum, quæ præcesserunt diuersitas, quarum aliæ hunc, aliæ alium humorem generant , & proinde aliæ huic, aliæ illi feбри materiam præbent. Et quidem humores vel simpliciter putrescunt , vel cum putredine coniuncta est maligna & venenata qualitas & contagiosum quid.

Deinde locus , in quo humores putrescunt , non semper idem est. Aliquando enim putrescunt humores intra venas & arterias : aliquando extra eas. Et quæ intra vasa est putredo , vel æqualiter in omnibus vasis , aut eertè maximis, vel est in certis cuiusdam partis venis.

E quibus hæ febrium differentię emergunt. Primò aliæ febres sunt simpliciter putridæ , sine vlla malignitate & contagio; aliæ malignæ , pestilentes, contagiosæ.

Deinde febres aliæ sunt continuæ,
aliæ

aliæ intermittentes , prout vāpor putridus , qui continens febrium putridarum causa est, seu calor à putrescentibus humoribus excitatus , vel continuò cor calefacit , & inde in totum corpus diffunditur , vel per interualla quædam.

Utrarumque febrium rursum multæ sunt differentiæ. Vel enim putredo in vasis communibus & extra partes priuatas accenditur, vnde febres oriuntur continuæ Primariæ dictæ : Vel è peculiaris alicuius partis inflammatione putredo oritur , & inde vapores putridi continuò cordi communicantur , quæ Symptomaticæ dicuntur.

Continuæ primariæ iterum sunt duplices. Aliæ enim nullum habent augmentum, nullamque remissionem, quas *πυρετὸς συνεχής* , febres continentes nominant: Aliæ verò quidem sunt continuæ , caloris tamen aliquod incrementum , aliquamque remissionem interdum habent , quas *συνεχὲς* , & nomine generis cōtinuas nominant. Continuæ hæ pro tempore augmenti & decrementi caloris , aliæ appellantur.

tertianæ, aliæ quotidianæ, aliæ quartanæ, prout calor alternis, vel singulis, vel quarto quoque die exacerbatur.

Intermittentes etiam pro tempore inuasionis aliæ dicuntur tertianæ, aliæ quotidianæ, aliæ quartanæ. Imò obseruatæ sunt febres, quæ longiore etiam intervallo inuadunt.

C A P V T III.

De signis febrium putridarum in genere.

*Signa
diagno-
stica.*

COgnoscutur autem febris putrida, 1. à calore, qui mordacior & acrior est, quàm vllarum aliarum febrium, & quidem in augmento & statu. Nam in principiis accessionum calor non mox sese tactui acris offert, sed si diutius manus immoretur, talis percipitur. Accidit autem hoc à fuliginoso excremento, quod ex humoribus putridis exhalat. 2. Quod incipit sine causâ procatarctica. Quod quidè signum proprium est, sed non inseparabile. Nam quotiescunque febris aliqua absque causâ procatarctica incipit, rectè colligere licet, esse febrem putridam: aliquando tamen

tamen humores ita etiam sunt ad putredinem dispositi, ut accedente leui aliqua occasione putredinem concipiant. 3. Urinæ in febribus putridis initio aut crudæ sunt, aut certè obscuras coctionis notas exhibent; nisi ex ephemeris in putridas fiat transitus. Aliàs nulla datur febris putrida, in qua non appareat in principio urina cruda aut obscure cocta. 4. Pulsus etiam magis mutatur, quàm in aliis febribus. 5. Febres putridæ cum rigore ex se incipiunt. Quod tamen signum est proprium, non inseparabile. Proprium est; cum neque diariis, neque hæcticis competat cum rigore incipere. Non tamen est inseparabile; cum non omnes putridæ cum rigore incipiant, ut synocha putrida. 6. Februm putridarum proprium est, per accessiones & paroxysmos redire; neque vlla alia febris accessiones habet. Non tamè inseparabile est hoc signum; quia non omnibus putridis febribus hoc competit. 7. Tandem si aliquod signum, quod speciei alicui febris putridæ est proprium, adsit, febris putridæ in genere etiam est indicium.

Prognostica.

Quid autem de euentu Februm putridarum sperandum sit, de eo in genere, multa dici non possunt; cùm magna sit februm putridarum differentia & varietas, & euentus varius: nisi hoc, quod euentus morbi ex collatione virium, & morbi magnitudine prælagiendus est. Si enim vires sunt robustæ, benè de euentu morbi sperandum est; si debiles, malè.

C A P V T IV.

*De curatione februm putridarum
in genere.*

*Indicationes in
febris
putridis.*

CÆterū, quia febris putrida à causa continente fouetur, Indicationes in febre putrida aliæ sumuntur ab ipsa febre, aliæ à causa febris. Nec negligendæ vitales indicationes. Primò enim febris, quatenus febris, refrigerantia indicat: Deindè quatenus calor ille totius, à vapore putrido calido, vt causa continente, pendet, eius remotio indicatur. Quia verò vapores putridi à materia putrescente dependent, non tolli ij possunt, nisi sublata putredine.

Putredo

Putredo tolli non potest, nisi sublatis eius causis, quas supra proposuimus. Primum nimirum causæ evidentes omnes, quæ adsunt, remouendæ: causa antecedens, & quidquid in corpore est vel sanguinis superflui, vel humoris vitiosi, præparandum, si opus, & euacuandum. Angustia meatuum, si adsit, vel in ambitu corporis, vel visceribus, amouenda, & corpori libera transpiratio ac humoribus ventilatio procuranda: putredini resistendum, humoresque putridi refrigerandi & exsiccandi: vitiosorum humorum generatio causarum ablatione tollenda.

Verum enim verò cum indicationes hæ sæpe sint contrariæ, & quæ causis adhibentur medicamenta, febrem augere possint, & contra: videndum, quomodo hisce indicationibus commodè satisfieri possit. Et plerunque quidem, febre quasi posthabita, magis ad causam respiciendum: cum plerunque maior vis causæ sit, quam febris, & febris putrida sublata causa spontè cesset. Si tamen febris magnitudo urgeat, necessarium est, ad febrem primum respicere; deinde

deindè ad causſam tollendam accedere. Aut certè , ſi cauſſam primò aggredi libeat, cauendum, ne per ea, quibus cauſſam tollimus, febrem augeamus. Nunquam verò febris tollendæ gratia ea adhibenda, quæ cauſſam eius augeant; cum plerunque cauſſæ vis maior ſit.

C A P V T V.

De Venæ ſectiōe.

Venæ ſectio.

CVrationem, quæ ſecundum has indicationes instituenda eſt , quod attinet , ac primò quidem venæ ſectiōnem, Galenus equidem, 11. meth. med. c.

An, cur & quando in febre putrida locum habeat.

15. regulam hanc tradit : *Saluberrimum eſt, inquit, in omnibus febris venam incidere, non continnis modo, verùm etiam aliis omnibus, quas putreſcens humor concitat, ubi præſertim nec ætas, nec vires prohibent.*

Additque rationem hanc : *Leuata namque, quæ corpus noſtrum regit, Natura, exoneratâque eo, quo veluti ſarcina premitur, haud agrè, quod reliquum eſt, vincet. Itaque proprii muneris haud oblita, & coquet, quod concoqui eſt habile, & excernet, quod poteſt excerni.* Præceptum tamen hoc Galeni rectè

rectè accipiendum & explicandum est. Etenim etsi plures sint venæ sectionis usus, & Autores discrepent, quam ob causam Galenus in putridis febribus venæ sectionem præceperit: tamen clarum est, eum euacuandi & imminuendi sanguinis gratia, & ut maxima parte oneris natura leuetur, id fecisse. Quamquam enim sanguinis abundantia tollendæ præcipuè debeat sanguinis missio, & cacochymia purgatio; & propterea ubi plethora adest, sine dubio vena secanda sit: aliquo tamen modo cacochymia in venis contenta & sanguini permixta inferuire potest venæ sectio; cum vena aperta vitiosi humores cum sanguine effluant; præsertim cum purgatio, quæ cacochymiam è venis tollere possit, non ita tutò, ut venæ sectio, in principio febrium institui queat. Etsi enim totam cacochymiam è venis tollere nò possit venæ sectio: tamen natura aliqua oneris parte leuatur, ac propterea reliquos humores felicius coquere ac regere potest. Nam fieri potest, ut sanguinis copia, quæ antequam æger incideret in morbum, illi oneri nò erat,

iam

iam ægrotanti, & à febre debilitato oneri esse possit. Et licet aliquid boni sanguinis simul euacuetur: id tamen ægro non nocet, sed prodest potius, ut dictum: sicut etiam, videmus in hæmorrhagiis criticis naturam non parum boni sanguinis simul effundere. Solet tamen natura plerunque non exiguam partem vitiosorum humorum ad extrema & subcutaneas venas propellere: unde & primo loco plerunque deterior sanguis effluit.

Ex quibus patet, præcipuè in continuis febribus, in quibus vel copia sanguinis adest, vel sanguini humores vitiosi permixti sunt, venæ sectionem locum habere, & quidem in principio, ut natura oneris parte leuetur. Si verò vitiosi humores non in venis maioribus sanguini permixti sunt, venæ sectio euacuationis gratia locum non habet.

Refrigerationem tamen & ventilationem etiam sanguini præstare potest venæ sectio: Sed tum solum huius gratia administranda, cum aliàs venæ sectio requiritur.

Viden

Videndum verò non solum, an venæ sectio requiratur, sed etiam an vires eam permittant: vbi imprimis facultatis vitalis robur requiritur; modò vires ob copiam sanguinis spiritus suffocantem non langueant. Vires autem determinant, ætas, habitus corporis, aëris ambientis conditio.

Quantum autem sanguinis mittendum sit, primùm ex sanguinis copia, deinde ex collatione virium, & morbi magnitudine manifestum fit. Nam magna sanguinis copia largiorem sanguinis missionem, minor parciorem desiderat. Vires robustæ liberaliorem sanguinis euacuationem ferunt, debiliores parciorem saltem admittunt. Vires autem variant ratione temperamenti, habitus corporis, ætatis, sexus, anni temporum, regionis ac cœli status; vt & pro ratione symptomatum quorundam, quæ febres comitari solent, vigiliarum puta, doloris & similibus.

Tempus venæ sectionis quod attinet, sanguis mittendus, cum indicans venæ sectionis adest, nihil verò prohibet. Id quod accidit in principio. Ac quò

*Permittentia
vena sectionem.*

*Quantum
sanguinis
mittendum.*

*Tempus
vena sectionis.*

quò morbus velocius ad augmentum properat, eò citius administranda est venæ sectio: Si verò coctiones magis lentæ sint, differri longius venæ sectio potest.

Locus.

Venæ autem euacuationis gratia commodissimè aperiuntur in cubito: Si tamen vires sint debiles, & simul à capite sit reuellendum, cum magno commodo venæ in pede aperiuntur.

C A P V T VI.

De Purgatione.

Purgatio.

CÆterùm cum febres' putridæ omnes à cacochymia ortum habeant: qua ratione illi expurgandi sint, iam videndum. Cum autem humores vitiosos euacuantia duplicia sint, Lenientia aluum, & Purgantia propriè dicta: Lenientia quidem in omnium febriū putridarum principiis facilè locum habet; cum vix dentur corpora, in quibus non aliquid vitiosorum humorum in ventriculo, intestinis, & venis mesaraicis contineatur.

Euacuatio autem hæc fit per clysteres,

res, Lenientia medicamenta dicta, & vomitū. Clysteres fiunt è *malua, alihæa, violaria, parietaria, branca ursina, mercuriali, oleo communi vel violacco, saccharo rubro, cassia, electuario leniuo, diacatholico, hiera, & similibus.* Clysteres.

Vel exhibeantur medicamenta lenientia, è quibus hodiè sunt in vsu, *syr. ros. solutiuus, viol. solut. mel. ros. solutiuum, tamarindi, cassia, manna, elect. leniuu. simpl. cremor tartar.* Lenientia.

Eligenda verò in talibus. etiam medicamentis hora vel intermissionis vel remissionis, & omnino tempus, cum febris minus vrget, siue id fiat manè, siue circa vesperam.

Nonnunquam etiam in principio febriliū vomitum prouocare licet, vbi magna materiæ copia in ventriculo & vicinis locis continetur, cuius coctio nulla expectari potest, quæque cibos ingestos corrumpere & inquinare solet. Vomituque sæpè ea reiiciuntur, quæ per aluum facilè expurgari non possunt. Vomitoria.

Vomitoria autem in *Inst. lib. 5. part. 1. sect. 1. cap. 12.* sunt exposita. Nonnulli hodiè *asari rad. à 3. β. ad 3. j.* exhibent. Chymici

Liber 11. Cap. V1.

Chymici vitriolum album, salem vitrioli, medicamenta ex antimonio parata. Quæ tamen cum non solum primas vias euacuent, sed & totum corpus commoueant, iis cautè, & vt Hippocrates 1. aphor. 24. loquitur, *ὁπότε ξυκαίνειν* Galen. *ἔσται*, vti decet.

Purgantia.

Purgantia quod attinet, quo tempore ea exhibenda sint, valdè controuersum est. Etsi enim vitiosi humores quouis febris tempore sui remotionem indicent: tamen non quouis tempore permittitur eos expurgare. Verùm oraculi loco, monente Galeno, 4. *de tuenda san. c. 5.* habendus est Aphorismus Hippocratis 22. s. 1. *Concocta maturaque purgare ac mouere oportet, non cruda: nec per initia: nisi materia turgeat; id quod rarò fieri solet.* Etsi verò alij aliter hunc aphorismum interpretantur: tamen, re diligenter pensitata, manifestum euadit, loqui Hippocratem solum de febribus putridis, non verò de aliis morbis: & per crudos humores eos intelligere, qui ob putredinem ad purgationem inepti sunt in febribus putridis; coctos verò illos, qui ad purgationem apti redditi sunt:
voca

vocabulo cruditatis & coctionis à cruditate & coctione propriè dicta ad excrementitios humores translato.

Licet verò & aliæ quædam humorum ad purgationem præparationes, & in febribus, & citra febres, fiant : tamen coctionis nomen iis non competit, & distinguenda est coctio ab humorum præparatione. Coctio nimirum, de qua *Coctio humorū.* loquitur Hippocrates, est humorū putridorum in meliorem & corpori minus noxium statum deductio, & à sanguine bono separatio, ut facilius & commodius è corpore euacuari possint. Hinc coctio tantum competit humoribus, qui in venis continentur, & sanguini permisti sunt. Qui verò in aliis locis consistunt, & sanguini permisti non sunt, quovis tempore purgari possunt. Hi nimirum humores, nisi ad mediocritatem quandam, quam quidem recipere possunt, sint redacti, & à bono sanguine separati, frustra & cum ægri damno eos purgare tentat Medicus. Neque enim purgantis medicamenti ductum sequuntur tum humores, neque naturam adiutricem habet Medicus. Vnde materia

materia saltem agitur & turbatur, variâque excitantur symptomata; vel fortioris medicamenti vi vires deiciuntur, & calidum nativum absimitur & debilitatur.

*Turgētes
humores.*

Humores tamen turgentes euacuare licet absque coctione. Et si enim hi nondum cocti sunt: tamen quia non solum metus est, ne ad partem aliquam principem ruant, sed etiam quia tenues & in motu iam sunt, facile ductum medicamenti purgantis sequuntur; & naturam Medicus habet adiutricem, quæ & ipsa interdum in principio tales humores cum commodo ægri euacuare solet. Per turgentes autem hic non saltem intelligendi sunt, qui ad nullam adhuc partem determinatam mouentur, sed illi etiam, qui licet ad partem aliquam ruunt, tamen mobiles adhuc sunt, & ita dispositi, ut facile in aliam partem ruere possint, suoque modo adhuc vagi sunt, nondum verò in parte aliqua fixam sedem posuerunt.

Coctio autem, de qua hic loquimur, solius naturæ opus est, quæ ubi fortis fuerit, etiam vitiosis humoribus eam, quam

quam recipere possunt, perfectionem inducit, vt in puris generatione videre est. Fitque hæc coctio solum in febribus putridis. Dum enim in venis humores quasi feruent, multi instar, & prauis bonis mixti sunt, & facile separari non possunt: crudi dicuntur. Dum verò quasi deferbuerunt, prauique à bonis iam facile separari possunt, cocti nominantur.

C A P V T V I I.

• *De coctione & preparatione humorum.*

ET si verò solius naturæ opus sit coctio humorum: Medicus tamen eam adiuuare potest per medicamenta, quæ vel calorem natium fouent ac roborant, vel impedimenta quædam, quæ naturam in concoquendo remorantur, tollunt, & excessus qualitatum ad mediocritatem redigunt. Atque posterioris generis medicamenta vulgò digestiua & concoquentia nominari solent, quæ scilicet humores calidos refrigerant, frigidos calefaciunt, siccos humectant, crassos attenuant, tenues incras-

C sant,

*Digesti-
ua medi-
camenta*

sant, & si qui alij sunt qualitatum excessus, eos ad mediocritatem redigunt.

*Conco-
quentia
humores
biliosos.*

Hinc biliosi humores, quia sunt calidi, medicamentis frigidis sunt attemperandi, tenuitasque eorum, si sit nimia, ad mediocritatem aliquam deducenda, & inflammabilitas prohibenda. Præstant hoc *cichorium, endivia, sonchus, scariola, acetosa, borrago, buglossum, viola, hordeum, semina refrigerantia maiora & minora, succus citri, granatorum, ribes, acetum, spir. salis, vitrioli, & ex his parata medicamenta.*

*Pituitos-
os.*

Pituitosi humores, quia sunt crassi, lenti, opus habent incidentibus & attenuantibus: qualia sunt *radices aperientes, hyssopus, heonica, agrimonia, capillus ♀, acetum, spir. item salis, vitrioli.*

*Melan-
cholicos.*

In humore melancholico etiam attenuantia necessaria sunt, sed quæ simul humectant: qualia sunt *borrago, buglossum, polypodium, scolopendrium & similia.*

*Putredinem in-
hibentia.*

Quia verò in omnibus febribus his corruptio humorum adest, ea, quæ putredini resistunt, etiam necessaria sunt: qualia sunt *acetum, succus limo-
nim,*

De coctione & preparatione hum. 51
inum, citri, granatorum, acetosa, spir. sa-
lis, vitrioli.

Atque hæc, quæ de cruditate & coctione humorum dicta sunt, præcipuè in febribus continuis & acutis locum habent. Id quod ex ipso Hippocrate patet, qui, 1. aphor. 24. subiungit: *In morbis acutis raro, & per initia purgante medicamento utendum; idque diligentius cum præmeditatione facere oportet.* Et 2. aphor. 29. *Incipientibus morbis, si quid mouendum videtur, moue; vigentibus verò quiescere præstat.* Nimirum si materia turgeat in acutis, statim in principio euacuanda. Si verò non, coctio exspectanda est, quæ peracta natura ipsa sæpissime humores vitiosos expellere solet. Quod nisi fiat, Medicus id exequi debet. Eadem tamen cruditas & coctio etiam in intermittentibus locum habet. Etenim cum causæ earum sedes sit in venis mesaraicis, venæ mesaraicæ verò etiam sanguinem sui generis elaborent & contineant: si sanguini illi alicubi humores vitiosi permisceantur, ac putrescere incipiant, cruditas adesse dicitur. Vbi verò iam ita

à natura illi humores victi sunt, ut
facile separari possint, coctio peracta
est.

Et si verò in intermittentibus singu-
lis paroxysmis materiæ aliquid euacua-
tur: non tamen humor februm talium
fomes prius totus euacuatur, quàm co-
ctio humoris absoluta, ac vitiosi à bo-
nis separati sint; id quod in quartanis
sæpe longo tempore accidit. Nam et si
aliquid singulis paroxysmis expellatur:
tamen, ut Galenus, 2. *de differ. febr. c. ult.*
docet, superfluitates in parte, in qua fe-
bris fomes continetur, relictæ noui pa-
roxysmi causa sunt. Et frustra purgatio
instituitur, priusquam ille etiam humor
coctus & ad expurgationem aptus red-
ditus sit, de quo in febribus intermit-
tentibus dicitur.

*Humo-
rum præ-
paratio.*

Cæterum præter hanc humorum co-
ctionem & præparationem alia adhuc
opus est, quæ, ubi humores iam cocti
sunt, adhibenda. Cùm enim, ut purgatio
feliciter expediatur, & vias apertas &
humores mobiles esse deceat, si viæ sint
obstructæ & aliqui crassi, ac lentī hu-
mores adsint, viæ, per quas humores
transire

De sudoriferis & urinam cientibus. § 3
transire debent, aperiendæ, & humores
incidendi ac detergendi.

C A P V T V I I I.

De sudoriferis & urinam cientibus.

CÆterum quia natura materiam *Sudori-*
concoctam. plerumque per sudo-*fera.*
res expellit, vt vix vlla febris sine sudo-
re rectè curetur ac cesset : Medicus na-
turam imitari debet, & corpore euacua-
to reliquias per sudorem discutere. Sunt
autem sudorifera hodie vsitata, *carduus*
benedictus, *scabiosa*, *fumaria*, *tormentilla*,
zedoaria, *C. C.* *sambucus*, *lapis bezoar*, *Mi-*
thridatum, & similia. Non autem exhi-
benda sudorifera, si crisis aliqua per al-
uum, vomitum, hæmorrhagiam na-
rium instet, ne natura in opere suo tur-
betur. Exhibentur autem commodissi-
mè eo tempore, quo natura ipsa humo-
res mouere solet, quod fit vel ante pa-
roxysmum, vel in fine eius.

Per urinam quandoque etiam pars *Urinam*
materiæ febrilis euacuatur. Ideoque & *monen-*
diuretica post reliquas euacuationes in-
terdum exhibenda : & eligenda ex his *tia.*

temperatiora, quæ humores simul attenuant, viasque obstructionibus liberant, vt capillus ♀, asparagus, agrimonia, &c. Quæ frigida verò sunt, maturè etiam vsurpari possunt, cum simul etiam intemperiem calidam humorum & partium corrigant.

C A P V T IX.

*De diata in febris putridis.**Diata.*

TAndem diatam quod attinet, & quidem primò cibum ac potum, non tantum in eo exhibendo ad vires, quæ eo refici debent, sed & ad permittentia & prohibentia respiciendum. Nam cum natura maximè in coctione vel euacuatione materiæ occupata est, ab illo opere ad cibi coctionem non auocanda. Hinc Hippocrates, 1. aph. 8. *Quando vis morbi est maxima, tenuissimo victu utendum: Et ibid. aphor. 11. In ipso paroxysmo cibum adimere oportet: nam præbere noxium. Et cum per circuitum redeunt morbi, in ipsis accessionibus abstinendum.*

*Victus
forma.*

In cibo verò in febris exhibendo,
obser

obseruanda forma , quantitas , qualitas
& tempus. Victus forma triplex est,
tenuis,mediocris,crassa. Quæ cuilibet
conueniat,ex virium cum caussa morbi-
fica collatione colligendum,neque plus
cibi exhibendum , quàm vires conco-
quere valeant , videndúmque, an vires
plus possint ad cibum indicandum,
quàm morbus ad prohibendum, vel
contrà. Quantò enim magis in caussa
morbifica oppugnanda occupata est
natura , tantò minùs cibo oneranda:
tantò verò magis occupatur in morbo
oppugnando, quò status & paroxysmus
propior. Hinc Hippocrates , 1. aph.8.
*Quando morbus in vigore fuerit , tum te-
nuissimo victu uti necesse est , & 1. aph.7.*
*Cum itaque morbus peracutus est , extremos
protinus labores habet , summèque tenuissi-
mo victu est utendum. Quum verò non
est , sed pleniorẽ victum licet exhibere,
tantum de extrema victus tenuis ratione
remittendum , quanto extremis morbus
fuerit remissior. Et ibid.10. Quibus itaque
vigor statim futurus , tenuiter statim alere
oportet ; quibus autem posterius , & in ipso
vigoris tempore, & paulò sub ipsum de vi-*

Et tu demendum : Antea verò plenius alendum, ut agrotus perferre queat. Secundum vires verò quomodo victus moderandus sit, docet Hippocrates, 1. aphor. 9. Sed & ex agroto coniecturam facere oportet, an is cum præscripto victu perstet ad morbi usque vigorem, ane prius deficiat, imparque cum tali victu succumbat, quàm sedat morbus & obtundatur, & 1. aph. 13. Ieiunium senes non decrepiti ferunt facillimè; secundum hos, qui constantem aetatem agunt; minùs adolescentes; minimè omnium pueri, atque inter eos maximè, qui acriore sunt & vinidiorè ingenio præditi. Consuetudo etiam & vitæ genus in victu præscribendo considerata.

Quantitas.

Quantitas cibi etiam ex virium & morbi collatione colligitur: Cùm enim nunquam plus cibi exhibendù sit, quàm concoqui possit: quo tempore natura in oppugnanda causâ morbifica est maximè occupata, minima cibi quantitas exhibenda: quod sit in statu.

Qualitas.

Qualitatem cibi quod attinet, cùm is consideretur vel ut cibus, vel ut cibus medicinalis, priore respectu cibi eligendi sunt cocti faciles, boni succi, facilis distri

distributionis & minimè excrementitij: Si verò vt medicinalis consideretur, fe-
bri primò debet esse contrarius, & præ-
indè frigidus & humidus, 1. *aph.* 16. de-
indè causis & omni excessui qualita-
tum in iis oppositus.

Tempus exhibendi cibi commodis- *Tempus.*
simum est, vbi adest indicans, corpús-
que cibi instaurari postulat, quod fit
cum prior cibus concoctus est, nihilque
adest, quod cibum sumere prohibet,
puta pugna naturæ cum morbo. Ideo-
que in accessionibus abstrahere oportet, 1. *aph.* 11. nisi virtus summè debilis
sit & resoluta.

Potus etiam in febribus habenda e- *Potus.*
ra. Et si enim faciliùs, quàm cibus, co-
quatur, & ex eo refrigerante mitescat
calor, & siccitas prohibeatur: tamen vi-
dendum, ne natura eo oneretur, & co-
ctio materiæ impediatur. Ideoque in
intermittentibus in patoxyfmo à potu,
quantum fieri potest, abstinendum: In
continuis verò, vbi æstus, sitis & virium
debilitas urgent, plus potus dandum.
Cum autem potus consideretur, non so-
lùm vt potus, sed etiam vt medicinalis:

hinc fit, ut in aliis febribus, alioque tempore alij potus eligendi sint. Potus, ut potus considerati, exhibendi ratio eadem est, quæ cibi. Quatenus verò ut alterans consideratur, quò calor fictus intensior, eò calidior potus vitandus, & frigidior usurpandus. Causæ tamen simul habenda ratio, & sæpe incidente & abstergente potu, non solum refrigerante opus est: & materia altius parti incompacta refrigerantem potum non admittit. Aquæ frigidæ potus in acutis saltem febribus locum habet: in intermittentibus nunquam convenit. Aqua sæpe hordeo alteratur, quæ *decoctum* & *aqua hordei* appellatur. Potus loco etiam exhibentur *inlebi*, *aqua mulsæ*, *oxymel*, *emulsiones*, *serum lactis*, *cerevisia*, *vinum*. Verum cum alij potus aliis febribus conveniant, de iis commodius in specie in singulis febrium differentiis, quàm in genere, agi potest.

Aër.

Aër in omnibus febribus sit purus, frigidus potius, quàm calidus, ita tamen comparatus, ut attractus potius inspiratione calorem febrilem temperet, non verò nudo corpori occurrès eius poros claudat.

De putridarum febrium differentiis. 59
claudat, vaporumque discussionem &
sudores prohibeat. Ideoque æger stragulis, sed leuibus, tegendus, vt calor ad ambitum corporis trahatur.

Somnus sit moderatus. Quies febre putrida laborantibus commodissima est. Excrementa præter modum retineri non debent, sed suo tempore excerni. Affectus animi sint tranquilli, imprimis tristitia & ira vitentur.

Somnus, quies, excrementa, animi affectus.

C A P V T X.

De Putridarum febrium differentiis.

ATque hæc de Febris putridis in genere dicta sint: restat, vt iam de iis in specie agamus. Principiò autem earum differentiæ paulò clarius explicandæ. Petuntur verò eæ imprimis à materia putrescente & loco putredinis.

Februm putridarum differentia.

Materiam quod attinet, oriuntur Febres putridæ vel à sanguine, vel à bile, vel à pituita, vel à melancholia. Quibus non sine caussa additur humor serosus, imprimis is ichor, qui malus est, putredinique facile obnoxius, & vt sanguis ac reliqui humores facilius putrescant, facit.

A Materia.

A sero.

Vnde quidam in ea sunt sententia, Fe-
bres Ephemeræ, quæ vulgò à spiritibus
accensis fieri dicuntur, omnes à serosa
sanguinis venosi aut arteriosi parte
ebulliente prouenire: & multò magis
synocham sine putredine: etsi spiritus
vitalēs calefacti feruorem humori se-
roso primò conciliare possint. Iidem
omnes Febres synochas seu continentes
dictas, quæ nullas periodos habent, tam
putridas, quàm non putridas, ab eodem
humore agnoso & seroso, seu putrescen-
te seu non putrescente, oriri docent. De
quibus videatur *Traët. de Febris.*

*A san-
guine.*

Quæ à sanguine oriuntur Febres,
omnes continuitatem quandam æqua-
lem seruant, & nec singulis, nec alter-
nis, nec quarto die exacerbantur. Quæ
verò ab humore bilioso, pituitoso vel
melancholico oriuntur, omnes suas pe-
riodos habent, seu sint continuæ, seu in-
termittentes.

*Ab aliis
causis.*

Præter has sunt aliæ febres, quæ li-
cet exacerbantur, periodos tamen nullas
certas habent. Tales sunt, quæ oriuntur
à partium inflammatione, putredine,
vermibus, lacte corrupto in infantibus,
sanguine

De putridarum febrium different. 61
sanguine extra vasa, imò chylo & sanguine imperfecto in mesaraicis putrescente.

Materia, è qua vapores putridi in febribus eleuantur, continetur vel in vasis vel extra vasa. Vasa vel sanguinem perfectum ferunt, vt vena caua & arteriæ, *Intra vasa.* vel imperfectiorem, vt venæ mesaraicæ. In vena caua dum sanguis putrescit, oriuntur febres continuæ, quarum aliæ sunt synochæ seu continentes, aliæ continuæ, nomine generis, & continuæ periodicæ nominatæ. Si in venis mesaraicis excrementij humores putrescant, intermittentes febres excitantur. Si verò sanguis ille imperfectus in venis mesaraicis putrescat, continuæ febres excitantur, sed lentæ.

Extra vasa materia putrescens & vapores putridos venis arteriisque communicans febres continuas excitat. *Extra vasa.* Tales sunt primo symptomaticæ, quæ ex certarum partium inflammationibus proveniunt. Deinde lentæ, quæ ex pertinacibus viscerum obstructionibus oriuntur. Tertiò, quæ ex partis alicuius ulcere, fistula, & omnino putredine excitantur.

tur. Quartò, ex lacte corrupto in infantibus, sanguine extra vasa putrescente, item catarrhi materia, vnde febres catarrhales.

*Febres
Comitata-
e.*

Tandem sunt febres Comitatae dictae, quae ex materia in venis putrescente excitantur, cuius partem cum natura vel è corpore expellit, id quod in diarrhoea, dysenteria, catarrho accidere solet; vel in partem aliquam protrudit, id quod in variolis, morbillis, doloribus vagis, angina, peripneumonia, phrenitide, erysipelate euenire solet: Febri alius morbus coniungitur.

C A P V T XI.

*De Febre putrida continua primaria,
& in specie de synocha.*

*Febris
continua
prima-
ria.*

SED vt iam in specie de febribus putridis, & primò de febre continua primaria agamus: Febris continua primaria est, quae ad ἀνυπεξίαν, antequam planè soluitur, non peruenit; ortumque habet ex putredine humorum in venae cauae & arteriae ramis maioribus. Cum enim tum vapores putridi assiduò ad
COR

De Febre putrida continua primaria. 63
cor mittantur, etiam calor continuus
excitatur. Vnde, antequam planè solui-
tur, ad *ἀσυνεξία* non peruenit, neque
per interualla cum rigore aut refrige-
ratione reuertitur.

Sunt autem febres continuæ prima-
riæ duplices: Aliæ sine vlla caloris re-
missione vel exacerbatione à principio
ad finem vsque continuè durant: Aliæ
verò sunt, in quibus quidem calor, ante-
quam integrè febris soluitur, nunquam
planè intermittit, certis tamen periodis
intenditur. Priores appellantur *συνεχὴς*
ἀσυνεξίᾳ, continentes febres: posteriores
συνεχὴς, seu continuæ nomine generis.

Febris Synocha putrida est febris, *Synocha*
quæ sine omni remissione aut intensio- *putrida.*
ne à principio vsque ad finem affligit, à
sanguinis in venæ cauæ ramis maiori-
bus putredine orta. Et si verò etiam ex
vasis partium determinatarum febres
cōtinuæ excitari possunt: tamē eæ sym-
ptomaticæ sunt. Et si verè sint synochæ,
quæ ex partis alicuius, vt vteri vitio,
originem habent: tamen pars illa saltem
occasionem dedit, inquinamento pu-
trido communicato, vt sanguis in ve-
na

nis maioribus putredinem conciperet. Sunt tamen febres è partibus determinatis ortæ plerumque continuæ periodicæ.

Ita etiam interdum in primis viis materia vitiosa in prima coctione collecta, quæ ad humorum aliquem, qui certis periodis moueri solet, nondum determinationem accepit, humores corrumpere & putredinem venæ cauæ communicare solet. Quæ febres plerumque malignæ sunt.

Causa. Febres autem synochæ putridæ plerumque ortum habent à prohibita transpiratione & sanguinis ventilatione, ac fuliginibus calidis retentis, ob obstructionem venarum cum in cute, tum in partibus internis. Et putrescit in febribus hisce synochis sanguis alendo corpori destinatus, putrescensque vapores calidos cōtinuò ad cor mittit. Vbi enim in venis calor præternaturalis ita accenditur, vt natura amplius sanguinem regere non possit, putredinem concipit, & corrumpitur. Neque opus est, vt sanguis putrescens statim in alium humorem mutetur. Sanguis enim suapte natura

De febre putrida continua primaria. 65
tura etiam ad putredinem aptus est, videmusque eum in inflammationibus in pus mutari, non verò in bilem abire; quod cur in venis fieri non possit, nihil obstat. Et præcipuè ad putredinè suscipiendam aptus est ichor sanguinis, & ob ichorem sanguis in primis putredine corripitur; quod accidit, cum vapores, qui transpirare debebant, in venis retinentur. Non tamen totus sanguis putrescit, sed partes eius aliquæ, quæ quâdiu à bono sanguine non separantur, cruditas adesse dicitur: quæ postea per coctionem à bono sanguine separantur, qua peracta Natura euacuationem instituit, per quam sanguis ad pristinam illam puritatem redit.

Est autem triplex synochus, ὁμότροπος seu ἀκμαστικός, cum febris in eodem statu permanet, quando scilicet tantum humoris quotidie putrescit, quantum discutitur: ἀναβλητικός, vel ἐπακμαστικός, cum calor accrescit continuò, plúsque materiæ accenditur, quàm discutitur: καθαρμαστικός, cum plus discutitur, quàm corrumpitur, & inde calor semper decrescit. Deinde si sanguis, qui putrescit, planè

Differentia.

planè temperatus sit, synocha sanguinea in specie nominatur: si autem sit calidior, qui biliosus appellari solet, synocha biliosa dicitur.

*Signa
diagno-
stica.*

Cognoscitur autem hæc febris, primò ex eo, quod à principio ad finem usque sine vlla exacerbatione & mutatione durat. Deinde quod pulsus est magnus, vehemens, celer, frequens, inæqualis & inordinatus. Et quidem in Synocha à sanguine temperato signa plethoræ adfunt: calor tangenti multus & vaporosus, minúsque molestus & acris apparet, quàm in aliis febribus, & alia signa, quæ in synocha non putri conspiciuntur, adfunt. Signis tamen quibusdam Synocha putris à non putri distinguitur. Calor enim in putri est acrior, quàm in non putri. In putri vrina est rubra, crassa ac turbida, sine sedimento, & cruda aut parùm cocta in principio; Pulsus putredinis notas exhibet, & omnia symptomata, quàm in non putri, sunt grauiora.

Synocha biliosa eos corripit, qui sanguinem biliosum habent; calorque, quàm in Synocha à sanguine temperato,

De febre putrida continua primaria. 67
to, est acrior; sitis magis molesta est, urina est tenuior & acrior, & alia signa, quæ febris biliosis sunt affinia, conspiciuntur.

Est autem hæc febris inter putridas *Pronostica.*
simplicissima & curatu facillima. Et purra quidem raro septimum transit, nontha etiam ad decimum quartum extenditur, citiusque vel tardius finitur, prout signa coctionis citius vel tardius apparent. Urina verò alba in synochis mala est. Omnium tutissima est, quæ σίνοχ & ἀκμαστικός nominatur: post hanc consistens, ἀκμαστικός: periculosissima est, quæ perpetuò increscit & ἐπακμαστικός, appellatur, quæ faciliè in causum degenerat. Et quò pauciora sunt mala symptomata, eò melius sperandum: quò plura, eò plus periculi portenditur.

Tota verò curatio consistit in causæ *Indicationes.*
ablatione & caloris febrilis alteratione. Sanguis ergo ut copia peccans minue-
ndus: pori cutis aperiendi, causis obstru-
ctionis ablati. Calor febrilis tempe-
randus. Si vires, quod plerunque acci-
dit, fortes sint, victu tenui utendum.

Itaque vena statim (præmissa tamen,

Vena sectione.

fi.

si opus sit, clystere, vel leniente aliquo medicamento) in cubito aperienda, & quantum vires ferunt, sanguinis euacuandum. Et audacius, quàm in vlla alia febre, in hac sanguinem mittere licet.

*Phar-
macia.*

Sanguine euacuato, vt coctio faciliùs absoluator, vtendum iis, quæ calorem temperant, obstructions liberant, & putredinem inhihent; *Succus* nimirum *acetosa*, *limonum*, *citri*, & ex iis parati *syrupi*, & *conseruæ*, *syr. acetosus* s. *oxymel* s. *oxysaccharum simpl.* *spir. vitrioli* cum aquis refrigerantibus, *semina quatuor frigida maiora* exhibenda.

In primis verò danda opera; vt obstructio pororum cutis, quæ plerunque huius febris causa est, tollatur; id quod commodissimè præstât *oxymel* & *mulsæ* diluta, quæ ad extremas corporis partes faciliè feruntur, lentosque & crassos humores attenuant. *Oxymel* verò simul putredini resistit.

Coctione peracta Antiqui aquam frigidam propinabant, eiùsque tantum bibendum offerebant, vt non solum calor febrilis exstingueretur, sed & materia iam cocta per vomitum, aluum vel sudores

diores euacuaretur. Verum in nostris regionibus ægri aquæ frigidæ potioni nō ita assueti sunt, & plurima inde metuenda incommoda. Ita nec natatio in aqua frigida, quæ etiam Antiquis vīitata erat, corporibus nostris conuenit.

Coctione absoluta plerumque natura criticè materiam corruptam euacuare solet: quod si non fiat, à Medico, purgantibus exhibitis, id præstandum.

Victus in hac febre sit tenuis; quoniam & sanguis abundat, & morbus est breuior: sitque is refrigerans & humectans, simulque crassos humores attenuandi & viscidos detergendi vim habens. *Dieta.*

C A P V T XII.

De Causa seu febre ardente.

Cum verò inter febres cōtinuas sæpe Causa & febris ardentis fiat mentione, etiam hīc, quid ea sit, explicandum. Est autem causus non febris aliqua differentia, sed modus potius qualitatem caloris febrilis exprimens. Nomen verò causi sumitur interdum generaliter &

& minùs propriè ; interdum specialiter & magis propriè. Generaliter, pro quacunq; febre, cuius calor est vehementior ; in specie ve. ò pro febre, quæ duo habet signa pathognomonica , calorem ingentem , & sitim magnam atque inextinguibilem. Causus tamen propriè & in specie ita dictus rursus duplex est, legitimus seu exquisitus, & nothus. Legitimus is est , qui duo ista signa semper & euidenter coniuncta habet ; Notus, in quo ista signa sunt minùs vehementia.

*Febres
ardentes
qua.*

Ex quibus apparet , febres ardentes & propriè ac in specie dictas esse febres continuas, & quidem à bile ortas. Atque ita causus seu febris ardens propriè dicta est febris continua, biliosa , & quidem vel synocha biliosa , de qua modò tractauimus , vel tertiana continua , de qua proximè dicetur.

*Signa
diagno-
stica.*

Signa pathognomonica , vt dictum, duo sunt, calor vehemens ac vrens , & sitis inextinguibilis , etsi ægri biberint : & quò exquisitior est causus , eò signa hæc sunt maiora. Sitis tamen non nihil interdum retunditur , si tussicula accedat,

cedat, quæ humores è vicinis partibus attrahit.

Συνεπένοντα verò signa plurima sæpe concurrunt: vt lingua sicca, aspera, nigra, vigiliæ, delirium. Respiratio quoque fit difficilis, densa, magna, efflantque ægri continenter os aperiendo, vt calidi spiritus faciliùs exhalent.

Febres autem hæ si puræ sint, diu non *Prognostica.* durant. Natura enim calorem tam vrẽtem ac vehementem, ac symptomata, quæ febrem hanc comitantur, vehementia diu ferre non potest. Et quidem plerumque septimo die terminantur, interdum 9. 11. 14. Nothæ verò diutius protrahuntur. Omnes autem periculosæ sunt, secundum Hippocratem, 4. aphor. 43. *Febres, quacunque non intermittentes tertio die fortiores sunt, magis periculosæ sunt.* Aliæ tamen aliis sunt periculosiores, pro caloris & symptomatum vehementia ac virium robore. Et quò maior est recessus à naturali statu, eò febris est periculosior. Hinc si senex ardenti febre corripiatur, quod tamen raro accidit, id lethale est, vt habet Galenus, 1. aphor. 14. Non minus periculosè decum

decumbunt, qui in aëre frigido valde
vruntur: qui si nec vires validas habent,
nec signa coctionis apparent, fieri non
potest, vt feruentur, vt idem Galenus, *ii.
meth. med. cap. 9.* scribit. Quibus si acce-
dant symptomata vehementia, eò peri-
culosior morbus erit, siue illa sint pa-
thognomonica, siue superuenientia. Si
tamen ex reliquis signis constet, esse fe-
brem ardentem, & absit sitis, etiam hoc
periculosum est. Nam ægrum vel deli-
rio teneri, vel appetentem ventriculi
facultatē emori significat. Urinæ etiam
nigræ malæ sunt; vt & tenues, crudæ, vel
alia mala indicia habentes.

Bonum autem est, si æger morbum
facile ferat; symptomata non sint vehe-
mentia; si facile spiret; si nullam partem
internam dolere sentiat; si dormiat; si
somnia iuuetur; si corpus æqualiter cali-
dum sit & mollè; si lingua non sit adeo
arida; si urina bona. Quod si iam, signis
coctionis apparentibus, cum virium ro-
bore, in die critico, larga è naribus hæ-
morrhagia accadat, proculdubio æger
euadet. Est enim proprium, si quid
aliud, putarum febrium ardentium, vt
per

De febrib. continuis periodicis in gen. 73
per sanguinis effusionem sanentur. Ali-
quando tamen & per sudores, alui deie-
ctionem, vomitum, & abscessus iudican-
tur. Verum prognostica plurima de fe-
bribus ardentibus extant apud Hippo-
cratem, in *Prognosticis*, *Prorrheticis* &
Coacis praeotionibus, & exposita sunt
etiam non pauca in *Insti. lib. 3. part. 3.*

Qua ratione autem curandæ sint fe- *Curatio.*
bres ardentes, & ex iis, quæ de synocha
putrida biliosa dicta sunt, patet, & quæ
de tertianæ continuæ curatione dicen-
tur, patebit.

C A P V T X I I I.

*De febribus continuis periodicis in genere,
& de tertiana continua.*

Alterum Februm putridarum cō- *Febres*
tinuarum genus, quod in specie *continua*
continuas appellant, eas febres comple- *periodi-*
ctitur, quæ quidem continuo durant, *ca.*
nec ullam intermissionem habent, an-
tequam planè solvantur, certis tamen
periodis exacerbantur; unde & conti-
nuæ periodicæ & proportionatæ appel-
lantur.

D

Vt

*Causse
earum.*

Vt autem continentes febres ortum habent à sanguine corpori nutriendo dicato : ita continuæ periodicæ , sicut & intermittentes , proueniunt ab humore excrementitio & cacochymia. Itaque continuæ periodicæ in eo conueniunt cum continentibus , quod vtriusque febris causa in vena caua continetur ; cum intermittentibus verò , quod utræque ab humore excrementitio proueniunt. Differunt autem à continentibus , quod illæ à sanguine alimentario , hæ ab humore excrementitio ortum habent : ab intermittentibus verò , quod materia continuarum periodicarum causa in secunda coctione generatur , & in vena caua continetur : materia vero intermittentium causa in prima coctione , aut certè iis in locis , quæ citra epas sunt , & ad perfectam sanguificationem destinata non sunt , continetur. Materia nimirum februm continuarum periodicarum generatur in organis secundæ coctionis , si ipsa quacunque de causa non rectè perficitur. Tunc enim vitiosi humores in secunda coctione generati cum sanguine

De febr. continuis periodicis in gen. 75
guine in venas mittuntur, qui ibi putrescentes febres has continuas periodicas excitant.

Quæ materia cum non solum sanguini confusa sit, vt in intermittentibus, sed ex ipsa prima origine ei verè permista, Natura eam etiam ante coctionem expellere non potest, & proinde febris à principio continuo durat. Exacerbationes tamen statis temporibus habent hæ febres, quia ab organis secundæ coctionis noua materia harum periodorum causa supeditatur, & quidem ferè ab epate; vnde & tertianæ continuæ sunt frequentissimæ.

Continuitatis ratio.

Exacerbationes.

Cognoscuntur hæ febres in genere, *Signa.* quod nunquam ad ἀνυπνίαν deueniunt, certis tamen periodis exacerbantur, & remittunt. Neque exacerbationem frigus, horror vel rigor antecedit, neque remissionem sequitur sudor.

Sunt autem febrium harum tres species. Aliæ enim alternis diebus exacerbantur, & à bile ortum habent, dicunturque tertianæ continuæ: Aliæ singulis diebus, quæ à pituita proueniant, &

Differentia.

quotidianæ continuæ vocantur : Aliæ quarta die , & à melancholia ortum habent, appellanturque quartanæ continuæ.

*Tertiana
conti-
nua.*

Primò tertiana continua est febris putrida, à sanguine cacochymico bilioso in venâ caua putrescente ortum habens, continua quidem, sed tertio quoque die magis affligens.

Causa.

Causæ huius febris sunt omnia illa, quæ cacochymiam biliosam in venis cumulare , cumulataque putredinem inducere possunt, quales supra sunt propositæ.

Signa.

Febris hæc cognoscitur ex eo, quod febris ipsa est continua, sed tertio quoque die exacerbatur. Adsunt etiam alia febrium continuarum & ardentium signa & symptomata.

Prognostica.

Quid verò de euentu sperandum sit, ex iis, quæ de ardentium febrium prognosticis dicta sunt, patet.

Curatio.

Indicationes & Curationem quod attinet febris hæc , si sit pura , cum sit maximè calida & ardens , & causa eius calida & sicca , maximam refrigerationem , simulque humectationem postulat,

De febr. continuis periodicis in gen. 77
postulat, & plus quidem, quam vlla
alia febris. Humor ipse quidem eua-
cuationem indicat; sed cruditas ple-
rumque eam prohibet. Si autem fe-
bris sit notha, simul ad humorem, qui
bili permiscetur, respiciendum: sym-
ptomatis quoque, si vrgeant, occur-
rendum.

Itaque vena, modò vires id permit-
tant, aperienda, quo modo & pars ali-
qua humoris vitiosi euacuatur, & san-
guis ventilatur, simulque à nobiliori-
bus partibus reuellit. Et Natura
ipsa quandoque sanguinis euacuatio-
nem per nares in principio harum fe-
brium instituere solet, qua febris im-
minui solet. Aperienda autem vena in
cubito in principio statim, aut certè in
augmento, & sanguis satis copiosè pro
ratione virium euacuandus.

Purgationem verò, nisi materia *Lenien-*
turgeat, instituere non licet. Vt al- *tia.*
ius tamen & primæ viæ, etiam ante
venæ sectionem, euacuentur, sum-
mè necessarium est. Medicamenta au-
tem, quæ id præstant, sint frigida &
humida, non calida; aut si sint ca-
lida,

*Alteran-
tia.*lida , frigidorum admistione tempe-
rentur.

Postea alterantia , refrigerantia sci-
licet & humectantia , exhibeantur,
quæ simul humorem ad coctionem à
Natura instituendam præparant ; qua-
lia sunt , *syr. acetosus s. oxymel s. dilu-
tius , oxysacchara s. syrup. acetosa , ace-
tosella , acetositat. cirri , granator. acid.
endiuiæ , violarum , cichoriij , ribes ; semi-
na 4. frigida maiora , portulaca , lactu-
ca ; flores nymphaeæ , santalum ; aqua hor-
dei , acetosa , endiuiæ , cichoriij , fragorum ,
nymphaeæ , portulaca , spec. diamargariti fri-
gid. & similia.* Quibus & ad putredi-
nem sistendam & inflammationem pro-
hibendam spir. vitrioli & salis addi pos-
sunt. Commendatur & nitrum præpa-
ratum. Si pituita admixta sit, aperientia
& attenuantia addenda, qualia sunt, *ra-
dices fœniculi, asparagi, graminis, & ex iis
parata medicamenta.*

In bile porracea & æruginosa Ioh.
Langius , *lib. 3. epist. 1. cap. 4.* Crystallum
commendat.

Topica.

Ad calorem temperandum etiam
Topica vtilia sunt ; vt epithemata, olea,
vnguen

De febr. continuis periodicis in gen. 79
unguenta è refrigerantibus parata,
quæ cordi, epati, dorso applicantur.
Videndum tamen, ne iis pori cutis
claudantur, & transpiratio prohibea-
tur. Ideoque ante statum vix vsurpan-
da, & non, nisi vbi calor per totum
corpus æqualiter diffusus est. Et com-
modius est, si calida, quàm si frigida
applicentur.

Concocta materia, vt Natura ad ex-
pulsionem stimularetur & roboraretur,
ac materia vel per aluum, vel per sudo-
rem expelleretur, frigidam copiosè bi-
bendam exhibebant Antiqui, vt docet
Galenus, 9. *meth. cap. 5.* & 4. *de rat. vict. in*
acut. t. 12.

Si autem post coctionem Natura eua- *Purga-*
tio.
cuationem non instituat, à Medico ea
tentanda, *syrupo rosarum & violarum so-*
lutino, pulpa tamarindorum, manna, rha-
barbaro, tryphera Persica. Quæ scammo-
nium recipiunt, non sunt exhibenda.
Aliquando tamen aliquid *electuarij ro-*
sati Mesue, de psyllio & de succo rosarum
admiscere licet.

Ad vrinam mouendam utilis est in *Vrinam*
cientia.
hisce febribus *emulsio sem. 4. frigid. ma-*

ior. cum sero lactis caprini, vel aqua hordei & fragorum, aut cum decocto rad. petroselinæ parata.

Sudorifera.

Commodè etiam sudores cientur medicamentis conuenientibus, quæ infrà de febribus malignis proponuntur.

Diæta.

Diæta sit tenuis: sed prout morbi status fuerit propior vel remotior, sit tenuior vel crassior. Cibus autem & potus refrigerandi & humectandi vim obtineât: vnde ptisana utilis cibus est in hisce febribus; reliqui condiantur succo citri & granatorum. Potus sit aqua hordei, vel aqua cocta cum succo citri vel granatorum & saccharo, vel cereuisia tenuior. Aër sit frigidus, & si talis non sit natura, arte paretur.

Si bili pituita admista ac febris tertiana continua seu ardens notha sit, sanguis mittendus parcius: In præparatione humorum ea, quæ pituitam attenuant, addenda. Purgantibus admiscendus agaricus.

CAPVT XIV.

De Quotidiana continua.

Quotidiana continua, Barbaris Latrica dicta, quod quendam latentem & absconditum habeat calorem, est febris quidem continuò durans, singulis tamen diebus exacerbationem habens, à cacochymia pituitosa in vena caua proueniens. *Quotidiana continua.*

Febris enim huius caussa est pituita sanguini in vena caua permista, ibique putrescens. Et proinde incidunt in hanc febrem, qui sunt ætate, natura & corpore humidiores, pueri & infantes, vt & senes, & qui habitu sunt corporis crassiore, ac crapulæ & otio dediti, & in locis humidis habitant, non verò iuuenes & biliosi. *Caussa.*

Signa februm continuarum periodicarum & in hac febre adsunt. Exacerbatio autem plerumque, fit circa vespere. Calor primò mitis apparet, paulò post tamen fit acrior, & modò delitescere, modò augeri videtur, ob pituitæ, quæ putrescit, crassitiem. Pulsus non
D s sunt

sunt ita celeres & frequentes. Urina, ut in aliis continuis, non est tam ignea, & rubra, sed crassior. Nec alia symptomata, ut in febribus ardentibus, sunt tam vehementia.

*Pregno-
stica.*

Quantum ad euentum. 1. Febris hæc ob humoris crassitiem est longa & curatu difficilis, & propterea periculo non vacat. Ac quod pituita est crassior, eò est pertinacior & longior. Unde non terminatur ante diem quadagesimum vel sexagesimum, & principium ante vigesimum non absoluitur. 2. Minus tamen diu durat, in qua plures euacuationes accidunt. Longior etiam est pura, quam quæ bilem admistam habet. Et quod peiora adsunt symptomata, quòque virtus est debilior, eò est periculosior. Quæ si abfuerint, salus speranda est. 3. Ob febris diuturnitatem & epatis debilitatem, plerumque ægri tandem in cachexiam & hydropem incidunt.

Curatio.

Curationem quod attinet, febris hæc plus periculi habet ob causam, quam ob calorem. Ideoque cum à pituita pēdeat, ea calefacienda, attenuanda,

da, incidenda, & postea concocta & præparata euacuanda. Viriumque, & in primis ventriculi ac epatis, habenda est ratio.

Principiò ergo ventriculus & primæ viæ euacuentur clysteribus vel lenientibus medicamentis; vel vomitu materia in ventriculo hærens reiiciatur. *Lenientia.*

Etsi verò causa huius febris sit frigida; quia tamen sanguini permista est, & putrescit, sanguinis aliquid vena secta detrahi potest, si urinæ sint rubicundiores & crassiores, virésque & ætas consentiant, ut natura oneris parte leuetur. *Vena sectio.*

Postea præparatio & coctio materiæ tentanda attenuantibus, quæ non valde calefaciunt. In principio ergo utendum syr. acetoso s. melle rosato, oxymelite s. syr. de hyssopo, de betonica, cum aq. vel decocto capill. ♀, asparagi, graminis, fœniculi, hyssopi, & ex iisdem plantis paratis aliis medicamentis, spir. item vitrioli & salis. *Præparantia & alterantia.*

Vbi aliqua coctionis signa apparuerint, lene aliquod pituitam purgans exhibendum ex agarico, foliis senæ, & similibus. *Purgantia.*

libus. Hinc ad fortiora præparantia & purgantia accedendum, atque ita materia, quæ vnâ vice coqui & euacuari non potest, per vices præparanda, coquenda & euacuanda. Et quia rarò pura datur quotidiana continua, sed vel bilis vel melancholia admista est, etiam ad hos humores respiciendum, & cichorium, fumaria, borrago & rhabarbarum ac folia senæ addenda.

*Vrinam
cientia
& sudo-
rifera.*

Postquam maior materiæ pars euacuata, reliquæ per vrinam & sudores medicamentis hisce scopis conuenientibus euacuandæ sunt.

*Roborã-
tia.*

Cum verò morbi diuturnitate imprimis ventriculus & epar lædantur, viscera hæc roboranda sunt *trochiscis de absinthio, de rhabarbaro, de rosis; speciebus aromatici rosati, diaxylaloës.*

Diata.

Victus ratio sit attenuans, incidens & abstergens. Cibi ergo sint boni succi, facilis coctionis & pauci excrementi. Pisces in hac febre non conueniunt. Cibi condiantur petroselino, fœniculo, thymo, hyssopo, satireia, roremarino, cinamomo. In principio plenius nonnihil alendum, vt æger ad statum morbi

morbi perdurare possit ; statu verò appropinquante de victu sensim demendum. Si tamen cruditates in ventriculo & primis viis adsint, victu & cibo parciore primis tribus diebus eæ absumi & imminui possunt ; postea victus ratio, qualem diximus, institui potest. In principio æger à vino abstineat, & vtatur eius loco hydromelite : si tamen consuetudo id postulet, detur vinum tenue & aquosum. Conuenit & cereuisia tenuis. Apparente iam coctione vinum tutiùs conceditur, quo concoctio adiunatur, ventriculus roboratur, & humores per vrinam educuntur.

De Febrè Epiala.

Ad febres continuas pituitosas refertur & πυρετός ηπίαλος, febris epiala, quæ quidem & ipsa cõtina est & quotidiana, à reliquis tamen quotidianis co differt, quod ægri eodem tempore simul rigorem & calorem percipiunt, calorque & frigus simul per minimas vniuersi corporis particulas dispersus est, vt docet Galenus, *de inæq. intemperie*, c. 8. & 2. *de differ. febr. cap. 6.*

*Febris
epiala.*

Causa. Galenus, loco modò allegato, hanc febrem ex acida & vitrea pituita putrescente deducit. *Libro tamen de inaquali intemper. cap. 8.* amaram bilem addit. Vnde etiam, quod calor & frigus simul percipiuntur, in vno loco in bilis & pituitæ permissionem refert, in alio, in pituitam vitream, cuius pars putrescens calorem, reliqua nondum putrescens rigorem excitet. Platerus tamen epiálas ad intermittentes refert, statuitque eas generari, cum intermittentes febres eodem die coincidunt, frigusque vnus, antequam calor alterius febris cessauit, incipit: vel etiam quando intermittentes cum continuis concurrunt, calorque continuarum semper perseuerat, accedente verò febre intermittente fit horror & frigus.

Curatio. Curatio huius febris ab aliarum febrium pituitosarum curatione nō multum differt: nisi quod fortiora attenuantia & incidentia requiruntur; cum maior humoris in hac febre sit frigiditas & cruditas, quàm in aliis febribus. Etsi quoque humor ipse fortiora purgantia requirere videatur: tamen vires debiles

debiles ea non ferunt, ideoque per ὀνί-
κρᾶσιν euacuatio instituenda.

De febre Syncopali.

Deinde ad has febres pituitosas per- *Febris*
tinet etiam febris Syncopalis humo- *syncopa-*
rosa Barbaris dicta, in qua humorum *lis.*
pituitosorum & crudorum maior,
quàm in aliis febribus pituitosis, est
copia, & præterea coniuncta est oris
ventriculi debilitas, unde ægri faciliè,
imprimis febre incipiente, in synco-
pen incidunt.

Febris curatu difficilis est, cum ægri *Progn-*
ob virium imbecillitatem & imminen- *sticum.*
tem syncopen necessarias euacuationes
non ferant. Et imprimis si pulsus sit par-
uus, debilis & inæqualis, febris hæc val-
de periculosa est.

Commodissimè verò fit euacuatio *Curatio.*
per frictiones, vt docet Galenus, 12.
method. med. cap. 3. clysteres, & lenien-
tia ac primas vias sine reliquorum hu-
morum commotione euacuantia medi-
camenta.

Primis viis euacuatis præparatio hu-
morum & euacuatio, vt in aliis febribus
pitui

pituitosis, instituenda, & medicamenta ad syncopen necessaria simul adhibenda.

Dieta.

Cibi sint pauci, tenuis substantiæ, coctu faciles & minimè pituitam generantes, iique sæpius exhibeantur. Potus sit vinum, quod nutriendi, calefaciendi, attenuandi vim habet, nec pituitam augeat. Est & vtile hydromel, in quo hyssopus ebullierit.

C A P V T XV.

De Quartana continua.

Quartana continua.

Tandem Quartana continua est febris continua, cuius calor quidem continuò durat, quarto tamen die interditur, à melancholia sanguini permixta in vena caua putrescente ortum habens.

Causa.

Causa nimirum est humor melancholicus in vena caua putrescens: vnde omnia, quæ melancholiam generare, in vena caua cumulare & putrefacere possunt, huius febris causa sunt.

Signa diagnostica.

Cognoscitur ex calore còtinuo quarto die inualecente, absque tamen frigore,

gore , horrore aut rigore præcedente, vel subsequente sudore. Pulsus initio est parvus , tardus & submersus, postea magnus, plenus , & celerior , quàm in intermittente , qui in statu magis intenditur.

Est verò hæc febris omnium rarissima , verùm periculosa , & intermittente quartana longè periculosior , virèsq̃ valde deiicit. Extenditurque hæc febris sæpe ad diem quadragesimum & ultra.

Prognostica.

Curatio eadem ferè instituenda , vt *Curatio*, in quartana intermittente. Et quia humor febris causa in vena caua continetur, & sanguini in vena caua permixtus est, initio statim, præmissis iis, quæ primas vias euacuant , venæ sectio instituenda. Postea melancholia præparanda & coquenda. Parcius tamè calfacere & attenuare oportet , quàm in intermittentibus, plus verò humectare, & addere , quæ feruorem continuum humoris putrescentis mitigant , qualia bili alias conueniunt.

Præparato humore purgatio instituat, & purgantia exhibeantur posttridie

die exacerbationis , quæ primò sint leuiora. Quod si natura nullam crisin instituat,fortiora postea exhibenda.

Possunt & post coctionem vrinam cientia & sudorifera exhiberi ; sed minus calida , quàm in intermittente. Et cùm vires valde deficiantur in hac febre , confortantia ex *borragine* , *buglossò* , *melissa* , *fl. tunicis* , *anthos* , *citro* , *confectione alchermes* & similibus parentur.

Dieta.

Dieta instituaturs , vt in Quartanis intermittentibus. Victus tamen sit tenuior,& magis refrigeret , quàm in intermittentibus : cùm & calor sit maior, & status propior. Vini *ὀλιγοφόρου* vsus etsi concedi possit, tamen sit parcior, quàm in intermittentibus. Et si calor sit maior,planè à vino abstinendum.

C A P V T XVI.

De febribus Symptomaticis.

*Febres
Sympto-
maticæ.*

PRæter hætenus explicatas febres continuas primarias , dantur adhuc aliæ febres continuæ , quæ Symptomaticæ & Accidentes nominantur , quod alij cuidam morbo primario accidant; quod

quodque, ut symptoma morbum sequitur, tolliturque ad morbi ablationem: ita & hæc febres alios morbos sequuntur, iisque sublati cessant. Vnde etiam Antiqui, ut docet Galenus, 4. aphor. 73. eos saltem febricitare dicebant, qui sine inflammatione, aut alio morbo ægrotabant: qui verò propter lateris, aut pulmonis, aut alterius cuiusdam partis inflammationem febricitabant, non febricitantes appellabant, sed pleuriticos, aut peripneumonicos, aut hepaticos, aut similibus aliis nominibus nuncupabant.

Est autem Februm harum non vnum genus. Præcipuum & frequentissimum est, quod partis alicuius, præcipuè interioris, & cordi vicinæ, aut quæ cum corde consensum habet, inflammationem sequitur, cum è sanguine in partem inflammata effuso putrescente vapores cordi communicantur, idque calefaciunt: id quod in pleuritide, peripneumonia, angina fieri vulgò docetur. Verum etsi planè negandum non sit, à partium harum & aliarum inflammationibus febres symptomaticas excitari posse,

*Earum
differen-
tia.*

posse, idque satis febres inflammationibus vulneratis partibus accidentibus superuenientes doceant: tamen, si rem diligenter perpendamus, non omnes febres, quæ vulgò pro symptomaticis habentur, reuerà tales sunt, sed primariæ.

*Febres
comita-
tæ.*

Accenditur enim primò sæpe in vena caua humorum putredo, vnde febris continua primaria excitatur: verùm cum Natura onere vitiosorum humorum grauata eos, quantum potest, è vasis maioribus, quasi publica & regia sede, ad minores venas & priuatas corporis partes depellere soleat, sanguis cum humoribus vitiosis in partes illas effusus inflammationem excitat. Atque id ex eo patet, quod Febris ferè inflammationem præcedit, non sequitur; & sæpe materia ex vna parte in aliam transit, vnde morborum commutationes fiunt. Vnde à Platero rectè febres hæ potius Comitata, quàm symptomaticæ dicuntur. Et tales febres comitatae sunt non solùm eæ, quæ inflammationem alicuius partis habent comitem; sed & eæ, quibus alia mala coniunguntur, nimirum

rum diarrhœa, dysenteria, petechiæ, variolæ, morbilli, dolores vagi, arthritis, catarrhi. Hæc enim mala omnia oriuntur, vbi Natura onere vitiosorum humorum grauata partem aliquam è vasis protrudit.

Huius generis etiam febris est, quam *Erysipelas*, Germanis *Rose* dicta, comitatur. Non enim ex φλογώσει & incendio partis externæ febris oritur, sed febrim malum hoc comitatur. Vbi enim sanguis tenuior, & calidior in vasis quacunq; de causâ incalescit, putrescit & corrumpitur, prauamque qualitatem acquirit, id quod imprimis ex ira & terrore accidit, Natura irritata eum ad partem aliquam corporis externam protrudit. Vnde & malum hoc cum horrore inuadit, & dum materia exteriora petens glandulas sub alis & inguinibus inuadit, aliquid agitati humoris ibi hæret, & dolor ac tumor ibi percipitur, donec tandem in crure vel alio loco externo sese affectus prodat, qui ex calore, dolore, & colore roseo agnoscitur.

Erysipelas seu Rosea.

In eo tamen Platero non assentimur,
quod

quod Febres istas omnes simplices & puras continuas absque putredine esse statuit. Putredinem enim, ut de aliis non dicamus, satis arguunt urinae, quae cruditate & coctionis notas, ut in aliis febribus putridis, exhibent. Et natura nunc symptomaticè, nunc criticè materiā sibi molestam expellit; non verò solum per insensibilem transpirationem, vel madorem, quod in ephemeris & synochis sine putredine accidere solet, expellit.

*Differen-
tia.*

*Febres
phlegmo-
nodes.*

*Febres
Typho-
des.*

Februm harum, quae siue ex partium inflammatione oriuntur, siue eam habent comitem, aliae dicuntur φλεγμονώδεις, quae ex sanguine praecipue oriuntur, quae verò ex erysipelate vel inflammatione ἐρυσιπελατώδεις oriuntur, τυφώδεις πυρετοὶ nominantur.

*Febres
Lipyrria.*

Pertinet huc & λειπυρίας πυρετός, febris valde ardens, in qua interiora omnia quasi uruntur, exteriora verò frigent; & quidem toto morbi decursu. Oriturque haec febris ex vehementi alicuius partis interioris, imprimis ventriculi, inflammatione vel erysipelate, sanguine & spiritibus ad locum inflammatum concurrentibus.

Secun-

Secundum febrium symptomaticarum genus est, quod lentam appellant, *Febres*
quæ non ex visceris alicuius inflammatione, sed ex latente obstructione & putredine, id est, ex materia extra vasa in visceris alicuius substantiam effusa, aut certè in capillaribus vasis per visceris substantiam dispersis impacta putrescente, viscerisque substantiam labefactante ortum habet; vnde tanta copia, sicut cum in vasis parentioribus materia continetur, vapores ad cor transmitti nequeunt. Atque ita febris lenta excitatur, quæ propterea etiam inæqualis est, nec certum ordinem servat. *Lenta.*

Febris hæc omnium mitissima, nulloque graui symptomate ægro molesta est, ita ut æger sæpe se ægrotare non putet. Interim vires collabuntur, ut æger vix progredi possit, corpusque ex alimento non reficitur, sed sensim contrahescit, vnde nonnunquam pro Hæctica habetur hæc febris. Ideoque ubi huius febris aliqua suspicio adest, imprimis hypochondrium & hypogastrium diligenter perquirenda, & an tumoris alicuius sensus in iis deprehendatur, inue

inuestigandum. Putredinis tamen etiam quædam indicia in vrinis & pulsu apparent.

Diuturnior autem est hæc febris, & reliquarum continuarum terminos transgreditur, & sæpe nec die 40. finitur, nec prius desinit, quàm impactus visceri humor absorbitur.

*Febris ex
viscerum
putredine.*

Tertium febrium symptomaticarum genus est, quod ex visceris alicuius putredine & corruptione oritur, è quo putridi vapores per venas insertas cordi communicantur, illud calefaciunt, Febrè inque continuam excitant, qua corpus sensum extenuatur & contabescit. Estque hæc Febris nunc mitior, nunc vehementior, prout putredo maior vel minor est. Accidit hoc frequentissimè in putredine pulmonis in phthisicis. Ita etiam compertum est, omentum, mesenterium, vterum, aliasque partes putredine correptas, atque inde febrem excitatam fuisse. Eodem modo è fistulis ad interiora penetrantibus, febre lenta excitata, nonnullos contabuisse observatum est.

Quartum febrium symptomaticarum

rum genus est, cum vel ex lacte corru- *Febres ex*
 pto, quod sæpe in infantibus accidit, vel *lacte cor-*
 ex sanguine alicubi extra vasa putre- *rupto, sã-*
 scente, vel ex vermibus putridi vapores *guine pu-*
 cordi communicantur, illudque calefa- *trescente,*
 ciunt, & febrem excitant. *vermi-*
bus.

Huc referri potest & febris illa ex
 cruditate, quæ infantibus ex *ἀδδδηφα-*
γία familiaris est, cum hypochondrio-
 rum tumore & inflatione, quam Ger-
 mani *das Berkgespan*, nominare so-
 lent, ex colluie crudorum humorum
 in ventriculo & vicinis locis collecto-
 rum, qui putrescere incipiunt, & in fla-
 rus mutantur.

Cognoscuntur autem febres sympto- *Signa*
 maticæ propriè dictæ ex eo, quod par- *diagno-*
 tium priuatarum affectus sequuntur. Et *stica.*
 primum quidem genus harum febrium
 ex eo cognoscitur, quod partis alicuius
 inflammationem sequitur: sicut contra
 febres comitatæ dictæ prius apparent,
 & cum horrore vel rigore innadunt,
 quibus postea febris accidit.

Lentæ autem illæ febres cognoscun-
 tur ex calore lento, cum quo notæ pu-
 tredinis in vrina & pulsu apparent. Vi-

nibus sanandis competunt, etiam hîc locum habent. Quia tamen interdum pro ratione partis affectæ, curatio variat, pars affecta diligenter attendenda: De quo in particularium affectuum curatione dicetur.

Lentæ febres, cùm ex pertinaci obstructione viscerum ortum habeant, aperientibus, attenuantibus, & detergentibus opus est. Et eligenda medicamenta, quæ cuilibet parti appropriata sint, viscerumque tonum, qui plerumque labefactatur, roborent. Per intervalla tamen lenis purgatio intericienda. Nec negligenda suo tempore diuretica. Extra quoque, si locus affectus id ferat, topica emollientia & discutientia applicanda.

Si ex partis alicuius corruptione & putredine febris symptomata proveniat, curatio ea instituenda, quæ partium internarum ulceribus & fistulis conuenit.

Si ex lacte vel sanguine corrupto, vermibus, vel cibis crudis & corruptis ortum habeat, danda opera, ut eæ causæ conuenienti modo, vel vomitu, vel ablucen

abluentibus & euacuantibus medicamentis tollantur, simulque putredini & calori febrili resistatur.

In comitatarum febrium curatione non minùs ad ipsam febrem, quàm morbum coniunctum spectandum, motusque naturæ non impediendus, ne humor vitiosus in corpore retentus maius periculum afferat. Itaque etsi inflammationem incipientem prohibere non modò utile sit: tamè simul humor mali causa euacuandus; id quod plerumque commodissimè fit venæ sectione, quæ simul & euacuationem & reuulsionem præstare potest. Utile tamen fuerit etiam primas vias euacuare; cum non rarò materia in iis colligatur. Et cum materia plerumque tenuis sit, & sæpissime ad ambitum corporis tendat, non rarò etiam malignitatis particeps sit, commodissimè per sudorem expellitur.

Comitatarum febrium curatio.

C A P V T X V I I .

De febribus Intermittentibus in genere.

Post continuas febres Intermittentes iam explicandæ sunt. Etsi verò Antiqui

Febres intermittentes.

tiqui intermittentis febris nomen latius extendebant, & id omnibus febribus, quæ aliquam caloris mutationem habent, & nunc exasperantur, nunc remittunt, & ita etiam continuis periodicis tribuebant: Vfus tamen postea obtinuit, ut eæ solum febres intermittentes dicerentur, quæ aliquando desinunt, & ad ἀπορροήαν perueniunt.

*Earum
causſa
proxima.*

Intermittentium verò febrium causa proxima est vapor putridus, ex humorum excrementitiorum putredine eleuatus, non continuò, ut in continuis, sed per intervalla quædam ad cor missus, idque præter naturam calefaciens.

Qui autem fiat, quod vapor putridus non continuò, sed statis temporibus ad cor mittatur, sanè obscurum est. Ad eius rei verò explicationem cum non parum faciat notitia loci, in quo putredo primùm accenditur, atque vnde vapores putridi cordi communicantur, quem Galenus focum seu fomitem appellat, 2. de diff. febr. cap. ult. & 15. meth. med. c. 4. is primùm explicandus est. Cum autem præter instituti nostri rationem sit, varias ac dissentientes hac de re Medicorum

corum opiniones recensere, breuiter
sententiam, quam veriore putamus,
recensebimus. Focus autem seu fomes *Focus fe-*
& locus, in quo materia febrium inter- *bris in-*
mittentium causa generatur, sunt venae *termi-*
mesaraicae, in quibus materia, quae sin- *tentium.*
gulis paroxysmis excitandis sufficit, te-
pore interualli generatur. Idque multa,
quae circa intermittentes febres acci-
dunt, testatur: Nausea scilicet, vomitus,
cardialgia, praecordiorum tensio & do-
lor, circa ventriculum intumescencia,
oris amaritudo, singultus & alia. In in-
termittentium enim febrium initiis bi-
lis sincera saepe maxima copia vomitu
reiicitur, quae e venis remotioribus hoc
modo euacuari non potuit; & circa ie-
coris caua librae pondere post mortem
reptam fuisse testatur Fernelius. Bile
hac reiecta saepe febris cessat; quod in-
dicio est, eam febris causam & in primis
viis collectam fuisse. Quod & fomenta
initio paroxysmi hypochondriis impo-
sita, horrorem & rigorem mitigantia,
probant. Materia autem haec in venis
mesaraicis saepe diu, antequam febrem
producat, cumulatur; Vbi vero putre-

fcere, efferuefcere & moueri incipit, calore in totum corpus diffufo febre excitat: Quæ ubi difcufla eft, calor febrilis & paroxyfmus ceffat, & febris definit tamdiu, donec noua materia, quæ fimiliter fuo tempore putrefcat, genita fit.

*Cauſſa
februm
inter-
mitten-
tiũ etiã
in vena
caua cõ-
zinatur.*

Etiã verò materia februm intermit-
tentium cauſa in venis meſaraicis &
primis viis generatur: tamen in iis non
tota ſubſiſtit & concluda manet, ſed
venæ cauæ & arteriis communicatur
cũ in paroxyſmo, tum extra paroxyf-
mum. Neque hîc occultos & cœcos du-
ctus, per quos vapores putridi in pa-
roxyſmo cordi communicentur, quæ-
rere neceſſarium eſt, cũ ductus ſatis
manifeſti dentur. Nam venæ portæ ra-
mi in ſubſtantiam epatis inferuntur, &
horum oſcula cũ vena caua commu-
nionem habent; & arteriæ à corde pro-
greſſæ in ventriculo, inteſtinis, liene &
alibi venis meſaraicis coniunguntur.
Non tamen primũ & ſolũ in paro-
xyſmo materiam febrilem venis com-
municari, ſed etiam ſubinde partem
eius aliquam continuo illo, qui eſt à meſa
meſa

mesaraicis ad epar, commeatu, ad eas deriuari, credibile est; vnde etiam à Galeno, 1. *de cris. cap. 7.* & aliis Medicis febris passio venosi generis appellatur. Idque primò patet satis manifestò ex vrinis, quæ cruditatis & coctionis notas euidenter in intermittentibus exhibent. Hinc etiam accidit, vt tempore paroxysmi vrinæ sint laudabiles & sanorum similes; cum humor vitiosus tunc à natura è venis versus ambitum corporis protrudatur, & ita sanguis in venis fiat purior, qui tempore interualli iterum à vitioso humore è foco febris communicato inquinatur. Idem patet ex iis, quæ initio paroxysmi & tempore illo, quod Græci *σπασμωδία* nominant, accidunt. Nam tum spontaneæ lassitudines, pandiculationes, pulsuum compressio & alia accidunt, quæ materiam iam febrem excitaturam in vasis illis communibus, venis & arteriis, moueri & quasi turgere indicant.

Humor iste vitiosus, partim in venis mesaraicis, partim in vena caua cummulatus, cum suo tempore putrescit,

Natura stimulata atque irritata, sæpe per varias vias, initio quidem per vomitum & aluum, postea verò per sudores & urinas sensibilibiter eum euacuat, ut & per poros cutis ac insensibilem transpirationem in vapores & halitus resolutum discutit. Cum enim humor ille vitiosus sanguini exactè permixtus non sit, sed saltem confusus, Natura eum faciliè à bono sanguine separare potest, & propterea eum singulis paroxysmis excutit: quo discussio, cum amplius vapores putridi cordi non communicentur, febris etiam cessat, & ἀνύπνεια sequitur.

*Causa
recursus
paroxys-
morum.*

Quia autem, quàm diu febris durat, in foco μίasma aliquod & inquinamentum seu σκωδιδόνος ἀείτωμα relinquitur, & præterea ἀδυναμία & imbecillitas in parte adest, necessarium est, humorem ad eam affluentem, etsi bonus sit, & ab inquinamento ac relicto illo excremento, quasi fermento, inquinari, & ob partis debilitatem corrumpi, atque ita nouam futuri paroxysmi materiam generari. Durantque & tamdiu redeunt paroxysmi, donec illud μίasma

μα & *ἡ δὲ πᾶσι συνῆλθε* ἐκ focu plannè excutiat, & debilitas eius partis tollatur. Vero tamen simile etiā videtur, materiam febris causſam non totam ſimul in primo paroxyſmo putreſcere, ſed eius partem, quæ putredini apta eſt, in reliquis reliquam, donec tota tandem abſumatur.

Ex his patet, vbi materia cauſſa februm putridarum generetur, quomodo paroxyſmum excitet, per quas vias euacuetur, & quomodo materia, noui paroxyſmi cauſſa, iterum generetur; atque ita cauſſa paroxyſmorum & reſuſus februm intermittantium explicata eſt. Quæ autem cauſſa ſit, quod ſtatis temporibus hæ febres redeant, aliæ citius, aliæ tardius; alia iam quæſtio eſt, eaque intricatiſſima, quam mouere, quàm ſoluere, facilius eſt. Vt verò aliorū opi-
niones, quæ plurimæ ſunt, hîc non re-
cenſeamus, eam ſaltem, quæ nobis, quã-
tum in hac humanæ mentis caligine in
re obſcuriſſima diſpicere poſſumus, proba-
bilior videtur, proponemus. Et primò
quidem dari tales periodos febrũ,
ipſa experientia docet, qua conſtat, fe-

*Cauſſa
periodo-
rum.*

bres alias tertio, alias quarto die redire, & sæpe non solum horam, sed & momentum inuasionis idem exactè obseruare; etsi paroxysmi vel anticipare, vel tardius redire interdum certis de causis possint. Causam verò, cur statis temporibus paroxysmi redeunt, ex humorum diuersitate petendam censemus. Qui enim effectus, vt Valleriola ait, in vno quopiam rerum genere inueniuntur, qui perpetuò rei conueniunt, & paribus modis fiunt, in quodcunque tandem corpus & tempus inciderint, hi ad propriam substantiam eius, à quo fiunt, referendi sunt. At per certos quosdam dies recursus facere, accessionesque proritare, & perpetuò humoribus conuenit, & recursus huiusmodi paribus semper interuallis (nisi aliunde ordinis periodorum peruersio consequatur) fiunt. Itaque ex humorum tali vel tali natura erit, vt recursus eiusmodi fiant. Nimirum periodorum & febrium intermittentium causæ sunt humores excrementitij, bilis, melancholia, pituita: & quæ febres tertia die redeunt, ab humore bilioso proueniunt; quæ

quæ quarto, à melancholico ; quæ singulis, modò non sint tertianæ duplices, à pituitoso.

Nón tamen simpliciter ex humoribus causâ periodorum deduci potest, sed quatenus ij peculiarem qualitatem seu ex putredine seu corruptione acquirunt, ob quam certo tempore quasi efferuescunt, & moueri incipiunt. Cùm enim effectus hic definitus & determinatus sit, qui in omnibus indiuiduis eodem modo sese habet, determinatam etiam ac definitam & in omnibus indiuiduis eodem modo sese habentem causam habeat, necesse est. Quæ cùm nec membrorum dispositio, nec humorum quãtitas (videmus enim, etsi materiæ copia decrescit, ac paroxysmi fiunt breuiores, nihilominus eos statò tempore redire) aut humoris qualitas manifesta, crassities, visciditas, tenuitas, vel similis aliqua, quæ variari solet, qualitas esse possit : meritò ad peculiarem & propriam qualitatem ac naturam humoris confugiendum. Quæ etiam vbi mutatur, ipsius febris typus mutatur. Dum enim bi-

lis mutatur in melancholiam, febris, quæ tertio antea die recurrebat, iam quarto inuadere solet. Atque hæc qualitas etiam postea in humore, cellante putredine, & ab ea pendente febre, manere potest. Vnde, vt Fernelius, *de febribus*, cap. 10. testatur, cruciatus colici, articulorum dolores, & similes morbi post diurnas tertianas & quartanas orti, etiam statas periodos obseruant, ob dispositionem illam, quam ex humorum putredine seu corruptione conceperunt.

Si quis tamen non ex sola corruptione istam occultam proprietatē deducere, sed ad eius generationem etiam causas cœlestes concurrere statuere velit, cum eo non multum pugnamus. Videmus enim, præcipuè circa solstitia & æquinoctia, febres tales, præcipuè diurniores, incipere & terminari.

Ordo paroxysmorum.

Et si verò febres statas periodos obseruant: tamen obseruatur in iis etiam quædam differentia. Nam interdum paroxysmus eodem planè tempore redit: aliquando sequens paroxysmus citius, quàm prior, recurrit, qui typus appellatur

pellatur *προληπτικός*: aliquando verò sequens paroxysmus tardiùs, quàm prior, redit, & nominatur *ὑστερητικός* typus. Et quidem nunc per totum morbi decursum talis typus obseruatur, & sæpe à principio febris vsque ad integram solutionem omnes paroxysmi anticipant vel postponunt: nunc verò in aliquibus fit anticipatio, in aliquibus postpositio vel eodem tempore recursus.

Accidere autem anticipationem plerique dicunt, cum humores ob aliquod in victu erratum augentur, aut mouentur medicamentis, ira, motu & similibus causis. Tardius autem redire, dum materia imminuitur, vel crassior redditur. Quod quidem, vbi typus cõsuetus mutatur, ita fieri posse, vt non negamus: ita cum febris aliquem typum vel *προληπτικόν*, vel *ὑστερητικόν* semper obseruat, causa potiùs ex humoris diuersitate petenda videtur. Etsi enim bilis suo modo corrupta tertianæ periodi, melancholia quartanæ causa sit: tamen bilis & melancholia secundum corporum & temperamentorum diuersitatem nonnihil sæpe variat. Hinc etiam accidit, vt licet illud

*Anticipationis
& postpositioni
caussa.*

illud fermentum putredinale, vel qualitas occulta bili inducta, sit causa tertiani circuitus, melancholiam inducta quartani: tamen secundum humoris differentiam fieri potest, ut horis aliquot citius vel tardius illa humorum efferuescentia accadat.

Longitudinis paroxysmorum causa.

Longitudinem verò & breuitatem paroxysmorum quod attinet, pendet ea ex copia vel paucitate materiae, dispositione humorum ac corporis. Humor enim copiosus longioris paroxysmi causa est, quàm paucus. Ita quoque crassus longiorem periodum parit, quàm tenuis; cum tardius, quàm tenuis, discuti possit. Si vires corporis sint robustae, quae facilius id, quod molestum est, expellere solent, quàm debiles: breuior fit paroxysmus. Corporis quoque constitutio rarior, utpote ad materiae discussionem aptior, causa est breuioris paroxysmi; densior longioris. Atque ubi omnes causae, quae breuem paroxysmum efficiunt, concurrunt, fit is breuissimus: ubi omnes, quae longum producant, adsunt, fit longissimus: ubi quaedam causae, quae breuem paroxysmum efficiunt, adsunt,

adſunt, quædam deſunt, ſit paroxyſmus medio modo ſeſe habens.

Atque hæc de cauſæ proximæ, quæ febres intermittentes excitat, natura, loco, & motu dicta ſint. Cauſæ verò remotiores, & quæ ad iſtius materiæ in venis meſaraicis generationem & putrefactionem faciunt, ſunt cibus & potus non boni ſucci, ſed humoribus vitioſis ſuæ naturæ reſpondentibus materiam præbentes; ventriculi praua diſpoſitio, ob quam cibi bileſcunt, vel acceſcunt; æris conſtitutio intempera-
Cauſæ remotiores febr. intermitt.

rata. Eſſi enim in diuerſis corporibus diuerſi humores naturaliter generentur: tamen ſi magna ſit cauſarum euidentium vehementia, etiam in diuerſi temperamenti corporibus eoſdem humores & ab iis pendentes morbos ea producere poteſt.

Differentias febr. Intermittentium quod attinet, pendent eæ à diuerſitate humorum. Tot enim ſunt febr. intermitt. ſpecies, quot humorum, à quibus producuntur. Sunt autem ſecundum vulgarem ſententiam tres illi excrementitij humores, bilis, pituita, melan.
Differentia.

melancholia, atque ita tres febrium intermittentium species, biliosa, pituitosa & melancholica, quas differentias tertianam intermittentem, quotidianam intermittentem, quartanam intermittentem nominare solemus. Et quidem si humores illi sinceri sint, febres etiam puras generant; si misti, nothas: Et quæ ex bile sincera fit febris, tertiana pura nominatur; quæ verò à bile flaua cum alio humore mixta prouenit, tertiana notha dicitur.

*An detur
quoridi-
ana.*

De quotidiana tamen intermittente res non ita plana est. Fernelius enim hanc omnium esse rarissimam, & quæ vix ex sexcentis vna obtingat, febrilesque intermittentes, quæ quotidie affligunt, plerumque potius tertianas duplices esse statuit. Platerus verò hanc febrem planè negat. Et omnino cum Galenus, 8. *meth. med. cap. 5.* duplicem saltem cruditatem constituat, vnam nidorosam, alteram acidam: duobus etiam febrium generibus saltem materiam præbere posse videntur, biliosis & melancholicis. Etsi enim pituita quædam datur, quæ κατ' ἐξοχλήν, humor

humor crudus appellatur : tamen cum illa valde frigida sit , vix putrescere & febrem excitare potest.

An verò plures dentur februm circuitus, & an præter tertianas, quartanas, & si habentur, quotidianas, etiam dentur febres , quæ ultra quartum circuitum extendantur, dubium est. Galenus equidem eas non vidit. Hippocrates tamen & alij etiam Medici observarunt , dari febres, quæ quinto, sexto, septimo, octavo, nono die demum reuersæ sunt. Quæ autem horum circuituum causa sit , valde obscurum est. Alij è diuersa bilis & melancholiæ constitutione causam horum circuituum petunt, atque Andreas Cæsalpinus , *artis medic. lib. 2. cap. 15.* quintanas ad bilem, septanas ad melancholiam refert , statuitque , tales rariores typos species esse simplicium typorum interpolata accessione vna aut pluribus , & quintanam esse tertianæ speciem, in qua dies tertia est sine paroxysmo , septanam esse quartanæ speciem interpolata accessione diei quarti. Plurique verò horum circuituum rationem ex varia humoris melancholici cum aliis

An dentur febres quotidianæ, &c.

aliis mistura petunt. Verum etsi satis probabile sit, febres has omnes, utpote longiorem periodum habentes, ab humore melancholico provenire: tamen mistura humorum opus esse non videtur; cum nullus humor detur, qui melancholiæ mixtus, tardioris, quam ipsa, periodi causa sit. Ipsi enim humores & melancholici & biliosi non semper sunt eiusdem generis; & propterea corruptio etiam, quam patiuntur, non semper eadem est: ut mirum non sit, effectus quoque, qui ab iis proveniunt, non semper esse eosdem. Et ut in morbis epidemiis interdum raræ & mirandæ humorum corruptiones accidunt: ita in febribus intermittentibus etiam tale quid accidere posse, absurdum non est.

*Signa
diagno-
stica.*

Febres intermittentes non difficulter cognoscuntur. Febres enim istæ ad *ἀνυπνέλαια* perveniunt, statisque periodis, & quidem, ut Galenus, 1. *ad Glaucon. cap. 5.* 2. *de crisib. cap. 3.* & 2. *de differ. febr. cap. 3.* docet, cum rigore, vel horrore, vel frigore redeunt. Etsi enim febres interdum occurrunt, quæ videntur

tur intermittentes, ac cum nullo rigore, horrore, vel frigore inuadunt: reuera tamen tales non sunt, sed lentæ & obscuræ continuæ, aut si sunt reuera intermittentes, non puræ illæ sunt, quarum ideam Galenus proposuit, sed nothæ.

Febres autem hæ minus periculosa sunt, quàm continuæ, & rarò, nisi vires vel ætatis ratione, vel alia de causa sint deiectæ, aut error in diætâ committatur, sunt lethales; cum tempore ἀπυρεξίας, & vires colligere, & necessaria medicamenta adhibere liceat.

Pregno-
stica.

Curationem harum febrium in genere quod attinet, cùm earum causa in venis melsaraicis colligatur & generetur, putredinem concipiat, & hinc in totum corpus diffundatur, tandemque per insensibilem transpirationem vel sudores discutiatur; causa verò recursus febris sit, vt Galenus, 2. de diff. febr. cap. ult. docet, duplex in corpore vitiosa ἀγθεις, vna inquinamentum quoddam aut σπυρεώδης αἵματιον, ex præcedente paroxysmo relictum, al-
tera

Indica-
tiones &
curatio.

tera membri excrementitios humores generantis debilitas : quid in qualibet intermittente febre agendum sit, facile hinc patet.

*Purgan-
tia.*

Nam cùm initium generationis & corruptionis humorum febrem producentium sit in primis viis, danda opera, ut humor vitiosus expurgetur, antequam reliquum sanguinem corrumpat, & vitiosam dispositionem ac debilitatem parti inducat. Verùm cautè in istis euacuationibus procedendum; cùm non omnium febrium intermittentium eadem sit ratio. Nam cùm ille humor vitiosus & excrementitius febris causa in mesaraicis sanguini immistus sit, etiam cruditas & coctio quædam suo modo necessaria est, qua humores vitiosi à bonis separentur & ad euacuationem apti reddantur. Idque sæpe brevi tempore in febribus biliosis accidit; & humor biliosus aliàs ad motum satis aptus est. In quartana verò humor contumacior est, & propterea de consilio Galeni, 1. *ad Glauc. cap. 11.* non facile ullum forte medicamentum ab initio exhibendum.

Et

Et omnino sudoriferatutò non ex-
hibentur, nisi priùs euacuationes præ-
cesserint. Si enim multi vitiosi & excre-
mentitij humores adhuc in primis viis
consistant, facilè fieri potest, vt sudori-
feris intempestiuè exhibitis, ij ad alias
nobiliores partes detrudantur, & vario-
rum, ac grauium, & qui plus periculi,
quàm ipsa febris, afferant, malorum
caussa fiant.

Venæ sectione quod attinet, ea qui-
dem à causa februm intermittentium
primaria, quæ in venis mesaraicis gene-
ratur, & maximam partem hæret, non
indicatur: quia tamen interdum san-
guis simul abundat, qui facilè corrup-
pi, & à vitiosis humoribus inquinari, at-
que à natura à febre debilitata satis re-
gi, si copiosior sit, nō potest; & progres-
su morbi subinde aliquid peccantis ma-
teriæ in venam cauam transit ac sangui-
ni permiscetur: habet quandoque lo-
cum venæ sectio; quæ tamen non mox
initio & ante primarum viarum eua-
cuationem instituenda est.

Si euacuationibus hisce febris non
tollatur, danda opera, vt causæ recursus
paro

*Sudori-
fera.*

*Venæ se-
ctio.*

paroxysmorum tollantur, & propterea duo agenda restant, ut scilicet illa dispositio & debilitas partis vitiosos humores generantis tollatur, quod fit alterantibus, quæ simul humoris vitium emendant; & inquinamentum illud, ac *μίασμα* ex humorum putredine relictum discutiatur. Et quidem ab inquinamento illo & paroxysmos pendere, & eo sublato febres cessare, vel ex eo patet, quod, dum à natura id ad ambitum corporis è venis expellitur, & circa labia, nares & alias faciei partes pustulæ excitantur, *uvann der Mundt oder die Base aufschlaget*, febris cessat.

Febrifuga.

Tollitur autem præcipuè sudoriferis. Sunt tamen & alia quædam medicamenta, & Medicis & vulgo nota, quæ paroxysmos febriles tollunt, & propterea febrilia, *πυρεταγωγά* etiam, & specifica febrifuga appellantur; quæ tamen non sudores mouent, sed alio proculdubio modo illud *μίασμα*, & per consequens paroxysmum, auerruncant, quælia vulgo recensentur pulvis è cochlearum testis vltis, è côchis margaritifervis
feu

feu matre perlarum calcinata, ex cancris fluuiatilibus & præcipuè eorum oculis, qui ita dicuntur, paratus, & similia. Quo autem modo hoc præstent, ab autoribus non explicatur. Vt, quid mihi videatur, dicam, talia medicamenta præcipitatione quadam vim illam efferuescendi & paroxysmum excitandi in humoribus tollere videntur. Quò & opiata pertinere videntur. Tuto tamen talia non exhibentur, nisi humores vitiosi, & qui causæ antecedentis rationem habere possunt, prius tollantur. Aliàs enim, qui à natura in paroxysmo stimulata expelli poterant, in corpore relinquuntur, & postea cachexiæ, hydropis, icteri, doloris colici, & aliorum grauium malorum causæ fieri possunt.

Applicantur etiam extra quædā medicamenta ad febres intermittentes tollendas, ex telis araneorum, oleo araneorum, & vesicatoriis quibusdam, quæ proculdubio id, quod præstant, *μίσμα*, & inquinamentum illud febrile extrahendo & euacuando præstant. *Topica.*

CAPUT XVIII.

*De Febris intermittentibus in specie , &
primò de tertiana intermittente.*

*Tertiana
Inter-
mittens.*

Postquam de febris intermittentibus in genere egimus, de iisdem iam etiam in specie agendum. Inter eas frequentissima est tertiana Intermittens, quæ à bile in venis melsaraicis putrescente ortum habet.

*Differen-
tia eius.*

Est autem febrium harum quædam differentia. Nam primò bilis ipsa, è qua febres hæ generantur, non est eiusdem generis. Interdum enim est bilis naturali illi, quæ in vesicula postea colligitur, similis, aliquando verò præternaturalis, viridis vel æruginea, qualis etiam à febricitantibus interdum per vomitum vel alium reicitur. Deinde bilis vel sola putrescit, vel alium humorem habet admixtum, pituitam vel melancholiam. Illa puram, hæc notham tertianam constituit. Differunt etiam ratione durationis. Nam si paroxysmi ultra 12. horas non extendantur, tertianæ puræ solent
nomi

nominari; si verò paroxysmus ultra 12. horas extendatur, non ampliùs exquisitæ seu puræ tertianæ, sed vel tertianæ simpliciter vel nothæ appellantur. Et quarum paroxysmus ultra 24. horas extenditur, tertianæ extensæ dicuntur. Accidit autem hoc ob humoris vel tenuitatem aut crassitiem, vel copiam aut paucitatem. Quò enim bilis est tenuior vel paucior, eò citiùs discutitur: quò verò crassior aut cum crassis humoribus mixta, vel copiosior, eò diutius durat paroxysmus.

Causæ autem huius febris omnes *Causæ.* sunt, quæ bilem excrementitiam generare valent, intemperies nimirum calida & sicca, aëris constitutio calida, calidorum ciborum potúsque, ut & medicamentorum vsus, vigiliæ, inedia, labor & exercitium nimium. Et si verò & in epate bilis flava generari possit: tamen sæpissime etiam primæ coctionis & mesaraicarum venarum vitio generatur. Siue ergo cibi, siue ventriculi vitio multa bilis in ventriculo generetur, & cum chylo ad venas mesaraicas deducatur, ibique

cumuletur, & tandem putrescat : febris accenditur.

Caussis bilem generantibus si coniungantur caussæ pituitam & melancholiam generantes, fiunt tertianæ nothæ.

*Signa
diagnostica pu-
ra ter-
tiana.*

Inuadit autem hæc febris statim, si sit pura, cum rigore quasi carnem pun-
gente. Deinde ubi rigor cessat, mox
sequitur calor multus, acer & mordax,
atque in vigore æqualiter quoquo ver-
sum extenditur, vnde ægri spiritum mul-
tum ducunt, sitique cruciantur. Pulsus
in principio paroxysmi sunt parui, de-
biles, tardi ac rari; crescente verò
paroxysmo mox fiunt vehementes, ve-
loces, frequentes atque aliquo modo
duri, & omnis inæqualitatis, præter-
quam febrilis, expertes. Vbi ad statum
paroxysmus peruenit, ægerque bibit,
vapor multus per cutem erumpit, su-
peruenit bilis vomitus, qui tamen etiam
sæpe mox post rigorem accidere solet,
venter soluitur, biliosa minguntur, vel
etiam plura horum eueniunt. Postea
sudor sequitur vaporosus & calidus in
toto corpore, pulsusque est velox,
magnus,

magnus, vehemens, qualis eorum, qui ex motu incaluerunt. Urina est subrufa vel subflava, & paulò post nebulam albam, vel æneorema habet. Paroxysmus ultra 12. horas non durat. Præcesserunt etiam vel adsunt causæ, quæ bilem generant.

Notha verò tertiana cognoscitur è *Notha.* causis, quæ non puram bilem, sed simul vel pituitam, vel melancholiam generant. Calor non est ita acris, ut in pura tertiana, sed mitior, neque statim per uniuersum corpus diffunditur. Neque etiam soluitur hæc febris flauæ bilis vomitu vel sudore, sed quidam vapores in declinatione exeunt: & si qui sudores erumpunt, ij vel non sunt uniuersales, vel si sunt uniuersales, febrem tamen non tollunt. Urina non ita ignea est, ut in pura tertiana, & coctionis signa in ea tam citò non apparét. Pulsus initio durus est, & durities illa indies augetur usque ad paroxysmum septimum, deinde sensim fit mollior, & urina quoque magis coctæ apparent. Paroxysmus sæpe ad horas 18. & plures extenditur: interdum tamen, si scilicet materia sit paucior

cior & virtus fortis, etiam intra 12. horas terminatur. Terminatur ferè non septem periodis, sed sæpe vsque ad 14. interdum ad 20. vsque pertingit.

Sunt autem febres hæ inter omnes putridas minùs periculosæ, 4. *aphor.* 43. Et quæ sunt puræ, non diu durant, sed septem circuitibus iudicantur ad summum. 4. *aphor.* 59. Nonnunquam etiam tribus aut quatuor paroxysmis terminantur. Tertianæ verò not hæ vt sunt frequentiores, ita longiùs durant. Et si enim, si materia sit pauca, & medicamenta necessaria maturè exhibeantur, nonnunquam quinto vel septimo paroxysmo terminantur: tamen plerumque vix quatuordecim paroxysmis terminantur, & sæpe ad 40. diem extenduntur, nonnunquam etiam ad menses sex durant, & in vitia epatis vel lienis desinunt, vel etiam ab iis fouentur.

Prognostica.

Et si verò tertianæ plerumque periculo vacant: tamen interdum perniciosæ sunt. 1. si aliquis error vel ab ægro, vel à medico committatur. 2. si humor, quem Natura expellere conatur, in membrum

brum aliquod præcipuum decumbat. 3. si humor sit valde tenuis, putridus, vel prauus. 4. si humor tenuis crassum admixtum habeat, eumque moueat ac succendat. 5. si humor crassus à calore fusus, aut in partem aliquam decumbat, & vel periculosum catarrhum, vel asthma, vel arthritidem excitet, aut vterum in consensum trahat. 6. si malignam qualitatem humor acquirat.

In curatione autem febris huius, vt & in aliis, respiciendū ad febrem, causam, & virtutem. Febris refrigerantia indicat & humectantia. Eadē & bilis, vt causa, requirit; quæ simul euacuari postulat. Si tamen alius humor admixtus sit, alterantia, præparantia & euacuantia, quæ ille humor requirit, admiscenda. Et quia focus materiæ est in venis mesaraicis, humor vitiosus inde, antequam bonum sanguinem inquinet, euacuandus, & si opus sit præparandus. Postea etiam alterandus, & partis vitiosos humores generantis dispositio corrigenda. Tandem danda opera, vt inquinamentum illud putredinosum sudoriferis discutatur.

*Indicationes
et curatione.*

Purga-
tio.

Primò ergo primæ viæ euacuentur vel clysteribus, vel exhibitis medicamentis lenientibus *ex syrupo rosarum solutino, manna, cassia*, quibus & *rhabarbarum, agaricum, folia sene*, pro humoris peccantis ratione addere licet. Vomitoria quoque non inutiliter exhibentur, præsertim si æger cardialgia, nausea & desiderio vomendi moleste-
tur. Et cùm materia in venis mesaraicis consistat, & ipsa Natura in principio paroxysmi vel per vomitum, vel per aluum expellere eam conetur, medicus ei subuenire debet, & materiam, si natura ipsa per has vias expellere tentat, vel per aluum, vel per vomitum eiicere. Et cùm materia plerumque in primis viis sit vel copiosior, vel crassos humores admixtos habeat, non solum lenientibus opus est, sed iis etiam, quæ diximus, medicamenta admiscenda; imò interdum aliquid *electuarij de psyllio, de succo rosarum, rosati Mesua*. Videndum tamen, ne humores è venis ad primas vias trahantur.

Vena se-
ctio.

Venæ sectionem quod attinet, et si bilis in venis mesaraicis consistens eam
non

non requirat : tamen si adsit sanguinis abundantia, & humor vitiosus è prima corporis regione etiam in venam cauam penetrauerit, id quod ex vrinis rubicundis & crassis cognoscetur, virésque adsint, venam secare licet. Et proinde non mox in prima inuasiōe, sed pòst vena aperienda. Habenda tamen febris ratio. Si enim tertiana sit pura, quæ etiam breuior esse solet, maturiùs vena aperienda, si requiratur; cùm si post tertium paroxysmum differatur, in ipsum morbi statum incidat. Si verò tertiana sit notha, post tertium paroxysmum differre venæ sectionem licet, vbi scilicet plus humoris morbifici sanguini in vena cauam permixtum est. Minori autem copia sanguis mittendus in tertiana pura; cùm, vt in continuis, is non sit primum indicans; & vires maiorem copiam mitti non ferant. Tutiùs & maiori copia sanguis mitti potest in tertiana notha. Instituitur autem venæ sectio commodissimè tempore *ἀνυπέρχιας*.

Postea exhibenda ea medicamenta, *Præparantia.*
F s quæ

quæ & humoris biliosi qualitates excedentes, quibus is Naturæ molestus est, dispositionemque in parte vitiosam & excrementitios humores generātem corrigant, ipsique inquinamento à putredine relicto contraria sint. Talia sunt refrigerantia & humectantia, quæ simul primas vias extergendi & putredinem inhibendi vim habent, qualia sunt, *cichorium, taraxacum, endivia, acetosa, hordeum, semina frigida maiora & minora, succus citri*, & ex his parata, *syr. acetosa, acetosus simplex, oxysaccharum s. de cichorio, de endivia, de acetositate citri, cum aq. & decoctis iisdem*. Quibus in nothis tertianis addere licet, quæ pituitam vel melancholiam respiciunt, *radices fœniculi, graminis, asparagi, asarum, polypodium, carduum benedictum, centaurium minus, absinthium, scolopendrium, betonicam*. Vtilis est etiam spiritus vitrioli & salis, cremor tartari, tartarum vitriolatum.

Specificæ.

Inter ista autem medicamenta sunt quædam, quæ peculiari vi quadam tertianis resistere perhibentur; quorum tamen plerorumque etiam manifestæ causæ

caussæ reddi possunt, qualia sunt *tara-*
xacum, *chamamelum*, *centaurium minus*,
plantago, *morsus diaboli*.

Alterantibus hisce aliquandiu exhi-
bitis si febris sit pertinacior, vomito-
ria vel purgantia exhibenda sunt, quæ
quidem plerumque die *ἀνρυξίας* exhi-
bentur. Si tamen animaduertatur, ma-
teriam vel ad ventriculum, vel ad
aluum instante paroxysmo inclinare, li-
cet vel instante paroxysmo vomitoria
exhibere, vel lene purgans, ut tamen
ante paroxysmi initium purgatio ab-
soluatur.

Inter vomitoria laudatur in primis *Purgan-*
asarum & genista. Inter purgantia rha- *tia.*
barbarum. Fortioribus elect. de psyl-
lio, rosatum Mesue, de succo rosar. exhi-
beri possunt, & in nothis tertianis aga-
ricum vel senna addi. In quibus etiam
repetitis præparationibus & purgatio-
nibus opus est.

Purgato satis corpore reliquæ per *Vrinam*
vrinam mouentia tollendæ sunt. In *mouen-*
pura tertiana utilis est *emulsio sem. 4.*
frigid. maior. facta cum sero lactis ca-
prini, vel aqua hordei, fragorum, cicho-

rij; in notha conuenit *decoctum radic. graminis, asparagi, fœniculi, capill. Q.* *cicerum rubrorum, cuscute, fl. chamameli, absinthij.*

*Sudori-
fera.*

Imprimis verò Naturam, quæ in fine paroxyfmi sudores mouere solet, imitetur Medicus, & reliquias humoris vitiosi sudoriferis discutiat, vel ante, vel in fine paroxyfmi exhibitis. Et quidem in puris tertianis, in quibus aliàs natura in fine paroxyfmi sudores mouere solet, sæpe sufficit, si æger aquâ hordei bibat; vel exhibeatur aqua acetosæ & cardui benedicti cum syr. acetosæ citri. In nothis calidiora vsurpanda, qualia infrà de febribus malignis proponuntur, quæ horis aliquot ante paroxyfimum exhibita sæpe paroxyfimum tollunt.

*Roboran-
tia.*

Si hisce remediis febris non tollatur & indicia adsint, viscus aliquod, epar vel lienem, simul affici, illi quoque prospiciendum. Et quidem quia epar in nothis tertianis plerumque à crassa bile vel crassis humoribus permixta, quæ sanguinem inquinat, obstruitur, ea quæ bilem detergent, vsurpanda. In quam rem

in

in primis *absinthium* utile est, quod bilem detergendi, & eam per aluum & urinam educendi vim habet, ut & *centaurium minus*. Vtiles etiam sunt *trochisci de absinthio*, *de rhabarbaro*, *gentiana*, & similia. Lienis & ventriculi, si debilitentur, similiter habenda ratio.

Exhibentur interdum & alia quædam medicamenta, quæ febrifuga appellantur, de quibus capite præcedente dictum. *Febrifuga.*

Et præter ista quædam adhuc extra *Topica.* corpori ad febrem tollendam applicantur, nimirum emplastrum è telis aranearum cum unguento populeo, foliis bursæ pastoris, urtica, ranunculo & vesicatoriis aliis.

Dietam quod attinet, in pura tertiana intermittente victus ratio ferè sit eadem, quæ in tertiana continua. A melle, dulcibus, & omnibus, quæ bilem generant, abstinendum; ubi verò coctionis notæ iam apparuerint, vinum dandum tenue & aquosum. Cibus exhibendus est extra accessionem; nisi syncope imminens contrarium suadeat. *Dietæ.*
Galenus, 10. meth. med. cap. 5.

In nothis tertianis ad duo imprimis in victu præscribendo attendendum, videndumque, ne vel morbus cibo copiosiore exhibito augeatur, vel vires, quæ in morbo longiore diutius sufficere debent, tenuiore victu periclitentur. Ideoque morbi & virium magnitudo inter se comparanda. Et si vires sint fortiores, & materia coctu difficilior, tenuiore victu vtendum; largiore autem cibo, si vires sint imbecilliores, atque materia coctu facilior. Potus non solum refrigeret & humectet, sed & incidat, & proinde hyssopo & origano condiri potest. Et si aqua mulsa exhibeatur, χαλῶδες illud addito aceto corrigatur.

C A P V T X I X.

De quotidiana intermittente.

*Febris
quoti-
diana.*

SEcunda febrium intermittentium, species est, quæ à pituita oritur, quæ, quia singulis diebus inuadit, quotidiana nominatur. Hanc Fernelius omnium febrium esse rarissimam, & quæ vix ex sexcentis vna obtingat, scribit.

bit. Imò sunt, qui planè eam negant. Et quamvis multi quotidie febre corripiuntur : tamen non quotidiana, sed vel duplici tertiana, vel triplici quartana laborant.

Causa huius febris cum sit pituita *Causa.* in venis melsaraicis, putrescens, omnia huius febris causa esse possunt, quæ ad pituitæ generationem faciunt, nimirum debilis viscerum, ventriculi imprimis, calor, alimenta frigida & humida, & eorum copia nimia.

Cognoscitur hæc febris ex causis, *Signa* quæ præcesserunt, pituitam generanti- *diagno-* bus; tum ex pituitæ in corpore abun- *stica.* dantis signis, in *Instit. lib. 3. p. 2. c. 2.* explicatis. Inuadit autem hæc febris præcipuè tempore nocturno, cum extremitatum saltem refrigeratione vel horrore. Calor post refrigerationem lentè & tardè inualescit, ita ut modò calor, modò frigus percipiatur : ac calor primum non apparet acris, sed halituosus; si tamen manus diutius admota teneatur, aliquantum acris apparet: Et ubi per totum corpus diffusus est, non valde vrit, unde nec multum respirare, nec potum

appe

appetere ægri coguntur. Facies non rubet, sed ferè est subliuida & subtrumida. Urinæ in principio sunt albæ, tenues & crudæ: postea, cum materia concoquitur, fiunt crassæ, turbidæ, & sæpe etiam rubræ. In primis etiam paroxysmis non sudant, in progressu verò morbi parum sudoris emittunt. Pulsus etiam valde parvus, rarus, & magis, quàm in quartanis, æque verò tardus. Paroxysmus ad 18. horas extenditur, & intervallum, quod est sex horarum, est rarò purum: imò sæpe ad 24. horas extenditur.

Prognostica.

Quamdiu autem sit duratura hæc febris, ex signis coctionis in urina citius vel tardius apparentibus, & paroxysmorum longitudine vel brevitate cognoscitur. Si etiam natura maturè aliquam euacuationem tentat, brevitatis morbi spem præbet. Febris autem hæc, utpote ab humore pertinaci orta, est longa, duratque ad dies 40. menses tres vel plures, ac non caret periculo, & cum ventriculus & epas in ea maximè afficiantur, sæpe in cachexiam & hydropem ægrum coniicit.

Curatio

Curatio ferè eadè est, quæ quotidiana Curatio.
 næ continuæ. Humor enim pituitosus
 præparandus & euacuandus est. Pri-
 mæ nimirum viæ euacuentur clyste-
 ribus humori pituitoso accommoda-
 tis. Venæ sectio vix locum habet. Uri-
 lis verò est vomitus magis, quàm in
 vlla alia febre; cùm ventriculus maxi-
 mè afficiatur. Ciendus est autem is *ra-*
phano, *semine atriplicis*, *anethi*, *fl. genista*;
 in fortioribus etiam *esula*, & aliis pas-
 sim notis.

Humor pituitosus conuenientibus Præpa-
 medicamentis præparetur; *radicibus* rantia.
aperientibus, *hyssopo*, *origano*, *betonica*,
capill. ♀, *agrimonia*, *chamadry*, *chama-*
melo, & aliis pituitæ conuenientibus,
syr. acetoso s. & *composito*, *syr. de duabus*
 & *quinque radicibus*, *melle rosato*, *syr. by-*
zant. simpl. & *composito*, *de hyssopo*, *oxy-*
melite simpl. & *comp. scyllitico*, *spir. salis*
 & *vitrioli*.

Materia præparata euacuetur impri- Purgan-
 mis *agarico*, *mechoacanna*, *turbith*, *tro-* tia.
chiscis albandal, *elect.* *Indo*, *diaphanico*,
diacarthamo, *pil. de hiera cum agarico*, *de*
agarico & *similibus*.

Sudores

*Sudori-
fera &
urinam
cientia.*

Sudores quoque & vrina ciantur medicamentis paratis ex *fœniculo, carduo benedicto, sarsa parilla, ligno sassafras, theriaca & Mithridatio.* Tandem & viscera, in primis ventriculus & epar, roboranda.

C A P V T XX.

De quartana intermittente.

*Quarta-
na.*

Tertia tandem febrium intermittentium species est, quæ ab humore melancholico, in venis mesaraicis putrescente, oritur, & quarto quoque die infestat, vnde quartana appellatur.

*Causa.
Signa.*

Proxima nimirum febris quartanæ causa est humor melancholicus, in venis mesaraicis circa lienem & vicina viscera collectus, ac putredinem concipiens. Isque nunc naturalis sua natura frigidus & siccus, nunc adustionis aliquis particeps. Causæ verò remotiores sunt ea omnia, quæ ad humoris melancholici & atrii generationem faciunt. Cibi nimirum & potus huic humori melancholico generando apti; Inter quos
etiam

etiam est acetum, de quo, ut Hippocrates, 3. videt. rat. in acut. t. 38. scribit, ἡ μέ-
λανα ζυμῶται, καὶ μετατρέχεται, καὶ πολλα-
πλασιᾶται. ἀναγωγὸν γὰρ μελάων ὀξυς.
Tempus autumnale, præcipuè si præ-
calidam æstatem excipiat.

Cognoscitur hæc febris ex quartano *Signa.*
circuitu, & signis melancholiæ in cor-
pore abundantis. Atque inuadit hæc fe-
bris cum molesta quadam corporis in-
æqualitate, quam rigor sequitur, qui
initio parvus est, vel loco eius saltem
refrigeratio & horror. Progressu morbi
rigor fit semper maior, & tandè vehe-
mentissimus, cum dolore ὅσον περὶ δ. Ca-
lor paulatim accenditur, neque est
vrens, sed submissus. Pulsus est rarus ac
tardus, & licet in vigore paroxysmi fiat
velox & frequens: tamen respectu ter-
tianarum tarditatem & raritatem ser-
uat. Urinæ in principio tenues sunt &
albæ; in progressu morbi coloratiores
& crassiores fiunt. Sudores in princi-
pio non sunt multi, in progressu verò
morbi copiosi.

Atque hæc ita se in quartana pura
habent: in notha verò humoris ad-
misti

misti notæ apparent, & calor, sitis, vigiliæ & alia symptomata sunt grauiora.

Prognostica.

Febris hæc omnium longissima est, & sæpe non solum ad aliquot menses, sed & annos extenditur, ac si non soluitur circa proximum solstitium vel æquinoctium, ferè ad alterum extenditur, & plerumque vere soluitur. Tuta etiam est & sine periculo, si sit legitima & sine visceris alicuius affectu. Quæ vero cum atra bile est, periculosior est; ut & quæ cum visceris alicuius grauiore affectu, & ægrum in hydropem, scorbutum vel tabem coniicit.

Indicationes.

Curationem quod attinet, si ab humore melancholico puro sit hæc febris, is, quia frigidus, siccus, crassus, calefaciendus, humectandus, attenuandus, aut si adustus simul sit, aliquomodo refrigerandus. Deinde medicamentis conuenientibus euacuandus. Causæ eum gignentes tollendæ, & si humores alij admisti sint, & illorum ratio habenda. Febris ipsa refrigerantia & humectantia indicat. Virium etiam, ne morbi diuturnitate deiciantur, habenda

da ratio, vt & ventriculi, lienis, hepatis, ne lædantur.

Tractanda autem hæc febris initio leniter, nec fortia medicamenta initio vsurpanda: cum humor melancholicus eorum vsu exasperetur, & ex simplici *Quartana* facile duplex vel triplex reddi possit. Galen. 1. *ad Glauc. cap. 11*. Minus tamen periculi est in vomitoriis.

Primæ ergo viæ clysteribus, lenientibus medicamentis vel etiam vomitoriis euacuandæ sunt. Postea, si simul sanguis abundet, vena aperienda, & si is niger & crassus sit, copiosius euacuandus, vt hoc modo & sanguinis copia imminuatur, & quod humoris melancholici in venam cauam diffusum est, euacuetur. Sin autē sanguis effluens tenuis & flauus appareat, statim suppressendus. Et quidem si sanguinis copia adsit, statim in principio, primis viis euacuatis, vena aperiri potest. Si verò absque sanguinis abundantia hæc febris incipiat, non mox in principio vena aperienda, sed vbi iam aliquid humoris peccantis in venas deductum & sanguini

Curatio.

Vena sectio.

sanguini permistum est. Aperienda autem vena vel basilica vel mediana. Plurique sectionem saluatellæ commendant: verum causam nondum reddiderunt sufficientem, cur aliis illa vena præferenda sit.

Præparantia.

Sanguine euacuato materia peccans præparanda & coquenda est, simulque *ῥιζοεις*, humorem vitiosum generans, corrigenda. Et quidem si ex sola naturali melancholia sit febris quartana, humectantibus imprimis opus est; Calefacientia verò sint moderata. Si verò humores adusti admisti sint, refrigerantibus moderatè opus est; In progressu autem morbi etiam incidentibus & attenuantibus opus est. Si pituitosus humor admixtus sit, etiam initio attenuantibus & incidentibus opus est, & tutius calefacere licet. Hinc exhibenda *borrago*, *buglossum*, *viola*, *capillus* ♀, *endivia*, *cichorium*, *fumaria*, *ceterach*, *lingua ceruina*, *chamadrys*, *chamæpitys*, *carduus benedictus*, *radic. althææ*, *glycyrrhizæ*, *cichori*, *aperientes*, *polypodij*, *filicis*, *gentiana*, *cortices tamarisci*, *capparum*, *radic. inglandis*, *fior.*
 &

& semen genista, viticis, fraxini, citri, succus pomorum, & ex his cōposita; & nunc hæc vel illa eligenda vel admiscenda, prout humoris peccantis natura id postulat.

Materiæ autem coctio & euacuatio *Purgantia.* per interualla repetenda est, & quidem vbi materia aliquando præparata est, exhibeantur purgantia ex polypodio, epithymo, foliis senæ, radic. ialapæ, elleboro nigro, lapide lazuli, & ex his compositis; Symploco de pomis Regis Sapor. elect. diacatholico, confectioe Hamech, pulvere senæ composito & diasenæ, pil. tartareis seu melanagogis, de lapide lazuli, de ammoniaco, incipiendo à mitioribus.

Vtilis est & vomitus, quo pertinaces *Vomitaria.* interdum quartanæ tolluntur. Ita Galenus, de theriac. ad Pisonem cap. 15. die ante paroxysmum à cœna vomitorium exhibet, postridie manè succum seu dilutum absinthij, & duabus horis ante paroxysmum theriacam. Mitiora vomitoria fiunt ex decocto sem. anethi & raphanici cum oxymelite. Fortiora ex asaro & gratiola. Fortissima antiquis fiebant ex elleboro albo: hodie medicamenta talia ex ☿ fiunt.

Si

Hæmorrhoides.

Si hæmorrhoides aperiri possint, plurimum commodi ex his sperandum est; cum harum fluxus à multis morbis ex humore melancholico & adusto natis præseruet ac liberet. Aperientia ac præparantia suprâ proposita etiam urinam ciere possunt.

Sudorifera.

Tandem ad reliquias materiæ discutiendas, post purgantia, & cocta iam materia, sudorifera exhibenda, hora vna atque altera ante paroxysmum. Galenus in usu habuit in hunc finem duo medicamenta, vnum ex succo Cyrenaico, & theriacam, quæ & hodiè in usu est. Vtilis est & *radix gentiana*, *carduus benedictus*, *antidotus Saxonica* dicta, & similia.

Appropriata.

Huc pertinent & medicamenta, quæ à proprietate prodesse dicuntur; quorum tamen plerorumque ratio reddi potest, quod scilicet reliquias humoris discutiunt & absument, ac viscera roborant. Qualia sunt *succus absinthij*, *verbena*, *radix imperatoria*, *plantago*. Alij etiam alia commendant, quorum tamen pleraque sudores simul mouent, quæ suo tempore tutò exhibentur.

Opiata

Opiata vero & similia, quæ solum *Paroxysmum in-*
paroxysmum inhibendi vim habent, *hibentia.*
non semper tutò propinquantur. Cum
enim facultatem expultricem saltem
obtundant, & naturæ conatum ac ma-
teriæ motum inhi-beant, humores vi-
tiosi in corpore retenti alia mala exci-
tare valent.

Tandem etiam supra carpos & pul-
suum loco applicari possunt, quæ suprà
in tertiana recensuimus.

Interim semper etiam prospicien-
dum visceribus, & danda opera, ut illa
roborentur, & lien, quod plerumque
fieri solet, non obstruatur, intumescat
vel induretur.

Inter symptomata plerumque rigor *Rigorem*
ægro maximè molestus esse solet, qui *mitigan-*
mitigatur exhibita *theriaca* vel *Mithri-*
datio ante paroxysmum, & inunctione
spinæ dorsi *oleo chamæmelino*, *anethino*,
costino, *rutaceo*, *de piperibus*, *laurino* cum
theriaca & *Mithridatio*.

Partibus etiam iis, quæ febrem præ- *Topica.*
cipuè fouent, & quæ dolore tempo-
re paroxysmi maximè afficiuntur, im-
primis lieni, fomenta, vnguenta, em-
plastra

plastra imponenda, ex *althaa*, *tamarisco*,
genista, *anetho*, *chamamelo*, *ammoniaco*,
bdellio.

Dieta.

Diætam quod attinet, cibi sint boni
 succi, coctu faciles, & minimè humori
 melancholico generando idonei, sed
 qui potius generationi melâcholiæ ad-
 uersantur. Cibus ergo sit humectans &
 calefaciens in melancholia, & si humor
 adustus sit admistus, nonnihil refrige-
 rans: ita tamen, vt vi crassa attenuandi
 non destituatur. Cibi etiam condian-
 tur *borragine*, *buglossò*, *fœniculo*, *petrose-
 lino*, *capparibus*, *cinamomo*, *croco* & simi-
 libus. A cibis verò crassum & viscidum
 succum generantibus planè abstinend-
 um. Si Quartana ex se, sine morbo
 præcedente, incipiat, primò victus pau-
 lò tenuior conuenit; hinc victus paulò
 crassior conceditur, tandem versus sta-
 tum rursus tenuior præbeatur. Si verò
 alij morbo Quartana succedat, primum
 victus paulò crassior exhibendus, &
 postea sensim versus statum aliquid de
 eo detrahendum. Et si æger id ferre pos-
 sit, commodum est, vt die paroxysmi
 nihil comedat, aut certè horis ad mini-
 mum

num sex ante paroxysmum nihil cibi capiat; secundum Hippocratem, 1. *aph.* 11. & 19. Nam cibi, qui tunc dantur, non corpori, sed feбри alimentum sunt: Multæque quartanæ, vt & tertianæ, prolongantur, non sua natura, sed diætæ erroribus, imprimis quod ægri in paroxysmo, vel instante paroxysmo, à cibo & potu non abstinēt. Potus sit vinum album, tenuius, maturum, non austerum: vel cereuisia bene defæcata, non flatulenta. Et vinum & cereuisia condiri possunt herbis humori melancholico conuenientibus suprâ enumeratis.

Febres, quæ longiorem periodum habent, & vel quinto, vel septimo die, vel longiore termino reuertuntur, cùm omnes ab humore melancholico, aut melancholia in humorem atrum & adustum declinante, vel atrum humorem admistum habente proueniant, vt ex duratione & aliis symptomatibus patet, etiam curandi est eadem ratio, quæ Quartanarum. Quæ tamen humoris peccantis sit natura, diligenter attendendum.

*Febres
quintana,
etc.*

CAPVT XXI.

*De febris compositis, & semitertiana.**Febres
compositæ.**Confusæ.**Implicitæ.*

PRæter hætenus enumeratas febres simplices dantur adhuc compositæ, cum febris cum febre coniungitur. Diuiduntur autem illæ in Confusas & Implicitas. Confusæ dicuntur vulgò, cum duæ febres eodem tempore incipiunt ac desinunt, vt vix discerni possint; cum scilicet humores diuersi inter se confusi eodem in loco putrescunt, & quilibet propriam naturam seruat. Quod tamen vt fiat, vix possibile videtur. Implicitæ autem sunt, quæ ita coniunguntur, vt vtriusque natura ac symptomata & signa seorsim ac peculiariter cognosci possint.

Complicatio autem illa fit pluribus modis. Nam primò non putrida cum putrida coniungitur, vt hectica cum putrida. Deinde putrida cum putrida; idque rursum variis modis. Nam primò continua miscetur continuæ, deinde intermittentes intermittentibus; & quidem vel eiusdem generis, vnde sunt duplices

duplices Tertianæ ; duplices , triplices Quartanæ ; vel diuersi, sed id rariùs, vt Tertiana intermittens cum Quotidianâ intermittente, nec non Tertiana intermittens cum Quartana intermittente. Tertiò continuæ cum intermittentibus; cum Tertiana intermittens Quotidianæ continuæ, aut intermittēs Quotidiana Tertianæ continuæ miscetur, quæ febres Semitertianæ appellantur.

Modi autem compositionis februm tres sunt, & februm compositarum tres differentiæ ; Subintrantes , Coalternæ, Communicantes. Subintrantes sunt, cum alterius paroxysmus incipit, antequam prioris paroxysmus desinit: Coalternæ, cum vno paroxysmo finito, mox post breue interuallum alius incipit: Communicantes, quarum vnius paroxysmus mox post alterius paroxysmum incipit.

Cognoscuntur autem febres compositæ ex signis simplicium , & imprimis ex frigoris ; horroris , rigoris , reditu post quietem : & si rigor fiat , & sudor non subsequatur, aut post plures rigores vnus sudor accidat. Pulsus etiam si

in

*Compositi-
onis fe-
brum
modi.*

*Subin-
trantes
febres.*

*Coalter-
na.*

*Communi-
cantes.*

*Signa cõ-
positarũ
februm.*

in continua febre sæpiùs fiat contractio, noui motus materiæ; nouique paroxysmi, atque ita febris compositæ indicium est.

Prognostica.

Sunt autem febres hæ cæteris plerunque periculosiores; cum plus affligant, quàm simplices, & tempus agendi ferè desit. Et præcipuè si ex diuersis humoribus febres compositæ constent, sunt curatu difficiliores; cum quæ vni humori sunt commoda remedia, alteri sint incommoda.

Curatio.

Earum autem curatio è simplicium curatione patet, & cuique humori ac feбри, quæ inde excitatur, sua sunt opponenda remedia.

Sed vt in specie de febribus compositis aliquid dicamus, de duplici ac triplici Tertianæ & Quartanæ, ac de Semitertianæ aliquid addemus.

Duplex Tertianæ.

Duplex vel triplex Tertianæ fit ex bile, duobus aut tribus in locis in venis mesaraicis putrescente. Et quidè si duobus in locis putrescat bilis, fit Tertianæ duplex, quæ vel singulis diebus semel, vel vno die bis affligit, vt altero die æger à febre sit liber. Si autem tribus in locis
putre

Tertianæ triplex.

De febrib. compositis. & semitertiana. 151
 putrescat, fit inde Tertiana triplex, quæ
 duorum dierum spatio ter affligit, vno
 scilicet semel, altero bis. Imò quatuor &
 quinque vel pluribus in locis bilis pu-
 trescere potest, atque inde tot Tertianæ
 excitantur.

Duplex Quotidiana fit ex pituita *Quoti-*
 duobus in locis putrescente, ægrumque *dianadu-*
 24. horarum spatio bis inuadit. *plex.*

Quartana duplex fit ex humore me- *Quarta-*
 lancholico duobus in locis putrescen- *na du-*
 te; & qui hac febre laborant, vnū diem *plex.*
 febre habent vacuum, sequentibus duo-
 bus diebus febre laborant. Qui verò tri-
 plici Quartana laborant, singulis die- *Quarta-*
 bus febricitant. Imò impossibile non *na tri-*
 est, vt, qui composita Quartana afficiun- *plex.*
 tur, vno die bis febricitent.

Et quidem Tertiana duplex sæpe
 ab initio talis est: Quartana verò du-
 plex vel triplex plerunque ex intem-
 pestiuo medicamentorum, calidorum
 præcipuè sudoriferorum, vsu talis red-
 ditur, cum materia cruda agitur sal-
 tem, sed non discutitur, & in plura lo-
 ca dispergitur.

Curatur autem & Tertiana & Quar- *Curatio*
 tana

tana composita, vt aliæ febres Tertianæ & Quartanæ. Hoc saltem attendendum, vt & cibi & medicamenta respectu paroxysmi iusto tempore exhibeantur.

Semitertiana.

Semitertianam quod attinet, quæ Græcis πυρετός ἡμιτερταῖος appellatur, componitur ea ex Tertiana & Quotidiana, vna continua, altera intermittente, ac quidem præcipuè ex Tertiana intermittente & Quotidiana continua, continuitatēque ex pituita, horrorem ex intermittente habet, vt vulgò docetur, vnde & horridæ hæ febres appellantur. Verū et si non negauerim, humores simul in vena caua & mesaraicis putrescere, febresque complicatas, quæ varias exacerbationes & mutationes habent in symptomatibus, inde oriri posse: tamen non absurdum videtur, etiam eas febres Semitertianas appellare, quæ natura sua quidem sunt Tertianæ intermittentes, cum inflammatione tamen visceris alicuius coniunctæ, è qua febris symptomatrica continua excitatur. Vbi enim pars materiæ febrilis cum sanguine ad intestina, ventricu-

De febr. compos. & semitertiana. 153
triculum, epar & vicina loca protruditur, excitatur inflammatio, atque hinc febris continua symptomatice, quæ cum Tertiana intermittente complicata semitertianam constituit, quæ ratione intermittentis febris est horrida, ratione symptomatice continua: id quod observationes Medicorum docent, quibus compertum, in dissectis semitertiana mortuorum cadaueribus repertas fuisse inflammationes circa iecoris cavam partem, in ventriculo, intestinis, mesenterio, omento, liene. Vnde horris & rigoris in hac febre causam reddere facile est. Accidit enim is nunc ordinatè pro febris intermittentis natura; nunc inordinatè, cum inflammatio nouam partem occupat, aut cum pus sit, secundum Hippocratem, 2. aphor. 47. Nonnunquam his febribus accedit malignitas: & tum ferè hæ febres populares sunt, & in plures grassantur.

Cognoscitur hæc febris, & quidem *Signa.*
si sit, quemadmodum vulgò describitur, composita ex Quotidiana continua & Tertiana intermittente, ex vtriusque febris signis. Febris enim continua &

G 5 alter

alter humor quotidie affert paroxysmum, alter verò tertio quolibet die, & ita dies altera duos habet paroxysmos, altera vnum tantum. Vide Galenum, 2. *de differ. febr. cap. 7.* Si autem ex visceris alicuius inflammatione coniuncta provenit, inflammationis signa adsunt, simulque febris intermittens suum typum observat. Malignitas, si adsit, ex suis signis cognoscitur.

Prognostica.

Febris autem hæc omnino periculosa est, cum ratione continuitatis & symptomatum, tum inflammationis aut malignitatis.

Curatio.

Curatio eius dependet, vel ex curatione Tertianæ intermittentis & continuæ Quotidianæ, vel ex curatione febris intermittentis simplicis vel duplicis & inflammationis visceris.

LIBER



LIBER III.

De Febre hectica.

CAPVT I.

De natura Febris hectica.

ATQVÆ hæc ita de febribus *Febris hectica.*
 putridis dicta sunt; & sic prius febrium genus, quarum calor κατὰ σκέσιν, corporis viuentibus partibus inest, explicauimus: restant adhuc Hecticæ, in quibus intemperies febrilis in habitum quasi transiuit, & ita partes corporis viuentes occupauit, vt etsi à nulla causa foueatur, nihilominus subsistere possit.

Ad febrem autem hanc generandam *Causæ.*
 duo sunt necessaria, subiecti ad calorem præternaturæ recipiendum promptitudo, & continua & vehemens caussarum calefacientium & febres inducētium actio.

Aptus ad hanc febrem suscipiendam est habitus corporis calidior & siccior, siue naturalis, siue quacunque de causa talis euaserit.

*Modus
genera-
tionis.*

Generantur autem hæ febres duobus modis. Vel enim sequuntur alias febres, seu ardentes, seu diuturnas, cum calor illarum vehemens, aut diuturnus partes omnes peruadit, earumque humidum absument; vel per se & à causis eidentibus producantur, quæ si sunt leuiiores, ephemeræ; si sunt vehementiores, hæcticas producant.

*Differen-
tia.*

Hæcticæ autem febris quidam gradus sunt. Primus est, cum rorida humiditas exsiccat; Secundus, cum carnosæ & adiposæ substantia perit: Tertius, cum etiam fibrosas partes calor inuadit. Et quidem cum humiditas rorida efferuescit saltem, nondum verò absumentæ est, Hæctica sine tæbe nominatur. Vbi verò humiditas illa iam absumentæ & exsiccata est, Hæctica cum tæbe, seu παρασμῆδης dicitur. Hæctica autem interdum sola & simplex est, interdum etiam cum putrida connectitur.

CAPVT

CAPVT II.

De signis febris hectica.

HEctica verò febris cognoscitur è calore continuo, nullum dolo- rem inferente, vtpote æquali & hectico, qui quidem primo attactu debilis, postea acrior apparet. Percipitur autem is maior in arteriis, quàm reliquis partibus. Et quidem calor post cibum sumtum hora vna vel altera augetur, & pulsus ad magnitudinem vel velocitatem mutatur, ita tamen, vt ἀνάβασις illa sit ἀθλητική, & libera, nihilque præcedat eorum, quæ putridarum febrium paroxysmos præcedere solent. Duratque hæc caloris & pulsus mutatio, donec alimentum distributum sit. Pulsus etiam in hac febre est paruus, creber & moderatè celer.

Signa
diagno-
stica.

Et quidem quò magis vires sumit hæc febris, eò etiam corpus magis consumitur & virtus fit debilior, ita vt ægri palpebras vix attollere queant, & simul in secundo gradu vrinis pingue-

Signa
differen-
tiorum.

do telis araneorum similis innatat. Tandem eadem, quæ in facie Hippocratica ab Hippocrate descripta apparent, etiam in Hæctica παρασώδης conspiciuntur.

*Hæctica
cum putrida
signa.*

Hæctica cum putrida, & quidem intermittente coniuncta, cognoscitur ex eo, quod declinante paroxysmo calor nihilominus, etsi remissus, aliquis relinquitur, adestque magnus virium languor, & reliquæ partes omnes temperatiores, loca solum articularum calidiora sunt, pulsusque velocitatem & frequentiam non amittit, ægerque cibum assumit, sed inde non roboratur. Hæctica verò cum putrida continua coniuncta difficilius cognoscitur. Patefit tamen ex eo, quod sicca caliditas post finem declinationis, vel totius febris, vel eius periodorum remanet; corpusque plus extenuatur, quàm aliàs fieri solet; vrina oleaginosa apparet.

Prognostica.

Hæcticam in principio cognoscere, difficile; curare, non admodum difficile est: quæ autem tabi iam vicinior est, facile quidem cognoscitur, sed difficulter curatur,

curatur, tandemque planè curatu impossibilis est.

C A P V T III.

De Curatione febris hectica.

Curationem tandem quod attinet, *Indicationes & curatio.* intemperies calida & sicca refrigerationem & humectationem indicat, vires conseruari postulant, & quicquid humidi ac solidarum partium absumptum & exsiccatum est, restituendum humectantibus. Et quidem humectantia tutiora sunt; in refrigerantibus verò adhibendis cauendum, ne calorem naturium iam debilem extinguant. Si verò hectica febris putridam coniunctam habeat, non tollitur hectica, nisi morbo priore sublato.

Medicamenta refrigerantia & humectantia sunt *Medicamenta interna.* viola, borrago, buglossum, nymphaea, rosa, endiuiia, cichorium, malua, sem. 4. frigida maiora, papaueris. E quibus varia medicamenta in rem præsentem parari possunt.

Extra vtilissimè adhibetur Balneum *Externa.* aqua


aqua dulcis, de quo Galenus, 10. *meth. med. cap. 10.* Quod ut plus humectet, *malua*, *viola*, *branca ursina*, addi possunt. Utile etiam est balneum ex lacte dulci. Post balneum inungatur corpus, imprimis spina dorsa, *olco violurum*, *amygdalarum dulcium*, *nymphæ*, *rosarum*. Cordi etiam & thoraci, ut & epati ac renibus, medicamenta refrigerantia & humectantia applicentur.

Diæta.

Maxima verò curationis spes in Diæta consistit. Aer sit temperatus, vel mediocriter frigidus. Cibus sit refrigerans & humectans, facilis coctionis, boni succi, paucorum excrementorum, & qui non mox dissipetur. Imprimis utile est lac, quod, ut Galenus, 4. *de simpl. medic. facult. cap. 17.* docet, frigidum & humidum est, facilis coctionis, optimi nutrimenti, ac summam vim habet substantiam corporis nostri humectandi & reficiendi. Quod ne in ventriculo coaguletur, sacchari aut salis aliquid admiscendum, & solum sumendum ea quantitate, quæ à ventriculo rectè concoqui possit. Utilia sunt

sunt & iura instaurantia ac confortantia, de quibus alibi dictum: vt & cibi ex *amygdalis*, *nucleis pini*, *pistaciis*, *seminibus 4. frigidis maioribus ac papaueris albi*. Cibi autem hecticis exhibeantur in parua quantitate, sed saepius, ob virium imbecillitatem. Potus in nostris regionibus sit cereuisia triticea, vel vinum aquosum, album, dulce. Somnus sit paulò longior. Si putrida cum hectica coniuncta sit, danda opera, vt febris putrida primùm tollatur, non tamen hectica negligatur, ne, dum putridæ febris solùm adhibemus

remedia, hectica augeatur,
si solùm hectica,
augeatur putrida.



LIBER IV.

*De Peste, pestilentibusque ac
malignis Febris.*

CAPVT I.

De natura Pestilentia.



ASOLVIMVS haftenus essentialia febrium differentias : restat, vt de accidentalibus iam dicamus. Inter quas praecipua est, & maximè cognitu necessaria, quæ pestilentiam & febres pestilentes ac malignas complectitur.

*Pestis
quid.*

Et quidem pestem quod attinet, cum qua, etsi non semper, frequentissimè tamen, etiam febris coniungitur, nomen id morbo omnium perniciosissimo & periculosissimo tribui notissimum est : quæ verò eius morbi natura sit, maximè apud Autores controuersum. Primò enim cum varia & diuersa morborum

morborum ac symptomatum genera in peste appareant : tamen quia illa sæpe etiam citra pestem conspiciuntur , pestis natura non in tot differentibus specie morbis & symptomatibus , sed in peculiari aliquo genere constituenta est. Neque etiam ὁ ὅμιλος μὴ vel contagiosum pestis naturam constituit ; cùm & alij morbi contagiosi & epidemij esse possint.

Verùm cùm hoc omnibus in confesso sit , tum pestilentiam grassari, *Pestis cordis mor-*
quando plurimi simul eodem morbo *bis.*
corripiuntur & intereunt , aliique inficiuntur : facilè hinc patet , pestem eius partis primariò morbum esse , à qua vita maximè pendet , & qua læsa , homo de vita summoperè periclitatur, cordis sc. vitæ fontis & caloris vitalis officinæ. Et si enim humor , cui pestilens venenum inhæret , in variis partibus subsistere possit (vnde non iidem morbi & symptomata in qualibet peste apparent :) tamen , quocunque in loco còsistat, peculiarem cum corde ἀντιτάσσεται habet , & proindè hominem tam subito iugulat.

Vnde

*An pestis
naturam
putredi-
ne consi-
stat.*

Vnde autem vis & qualitas illa cor-
di infesta & inimica ortum habeat ac
dependeat, de eo maxima inter Medi-
cos est controuersia. Et quidem non-
nulli ex sola putredine pestilentiam cō-
stitui, & putredine pestis naturam ab-
solui statuunt. Sed cū illi ipsi agno-
scant, non omnes febres putridas pesti-
lentes esse, in putredine determinanda
variè laborant, eamque alij aliter ex-
plicant. Verū omnes frustra. Quocun-
que enim modo putredo determinetur,
ad pestilentiam constituendam non suf-
ficit. Etenim putredinis gradus & mo-
di, quicunque etiam sint, cū saltem
secundum magis & minus sint, spe-
ciem non variant, neque pestem à re-
liquis putridis febribus seiungunt. De-
inde pestis modo planè alio, quàm fe-
bres putridæ, lædit. Nam momento fe-
rè sese exserit, & perniciosos effectus
edit, stupendo modo sese diffundit, &
in quosuis grassatur, tantillum veneni
pestilentis alicubi diu latere & inte-
grum conseruari & in corpus postea
receptum tam subitò tam graua ma-
la producere potest, & eos effectus ede-
re,

re, qui in primarum qualitatum, à quibus putredinis ratio solùm pendet, potestate non sunt. Præterea si à putredine solùm pestis proueniret, etiam febris à peste nunquam abesset: Cùm tamen obseruatum sit, aliquando à peste febrem abfuisse, vt ex Hippocrate, 3. *epid. comm.* 3. t. 25. 55. Galeno, 9. *de simpl. medic. facult.* §. *de terra Armena.* Iac. de partibus, in 1. *quarti Auicen. cap. de febre pestilenti.* Alex. Benedicto, Fr. Valleriola, *loc. comm. lib. 3. cap. 1* §. & aliis patet. Tandem ipsa curandi ratio longè alia est, quàm aliarum febrium putridarum, & pestilens venenum alexipharmaca indicat & requirit, quæ in aliis putridis febribus nec indicantur, nec locum habent.

Itaque pestilentiam in occulta, totaque natura cordi aduersa qualitate consistere, pestilensque venenum tali qualitate præditum esse statuimus; id quod effectus, vt modò dictum, supra qualitatum primarum vires satis arguunt.

Pestilentiaæ contagium coniunctum est, pestilentisque veneni naturam contagium,

tagium , tanquam accidens proprium, quod omni, sed non soli competit, consequitur.

Definitio.

Itaque pestilentiam definimus, quod sit *morbis cordis venenosus* , à *materia venenata* , cordique tota *substantia peculiari-ter aduersa*, contagiosaque *genitus*, & proinde ipse *contagiosus* , omnesque cordis *actiones subito & à spōis ladens* , maxime *acutus*, *lethalis*, omnisque generis *perniciosa sympto-mata inducens*.

Quæ autem specifica huius veneni natura, & quæ eius in diuersis pestilentibus constitutionibus differentia sit, nemo facile explicabit. Mihi probabile viderur, esse supremum corruptionis gradum, quem quidem humores in corpore nostro recipere possunt , ad quem per multas alterationes , mutationes & fermentationes peruenitur, & in quem morbi, qui præcesserunt, tandem degenerant & abeunt. Vnde etiam peste grassante alij morbi sporadici ac benigni omnes ferè silent , imò & qui præcesserunt epidemij, cessant.

CAPVT

CAPVT II.

De caussis Pestilentia.

CAussas autem pestilentiaë seu sum- *Caussa.*
mæ huius corruptionis quod atti-
net, sunt eæ duplices, aliæ pestem gene-
rantes, aliæ propagantes, quæ contagij
nomine comprehenduntur. In priore
classe sunt aër, stellæ, victus ratio, vene-
ficia, imaginatio & terror.

Primò enim aër nonnunquam in se *Aër.*
pestilentiaë semina continet, quæ vbi
cum aëre quem inspiramus, ab homini-
bus attrahuntur, pestilentem morbum
in iis excitât. Atque id vbi accidit, pesti-
lentes constitutiones longè grauissimæ
excitantur, & longè perniciosiores iis, vbi
per contagium saltem pestis transfer-
tur. Aër autem pestilens euadit quidem,
cum in eo caliditatis, & humiditatis ex-
cessus sunt, qui ad putredinem corpora
disponunt, qualem aëris cōstitutionem
describit Hippocrates, 3. *epid. comm.* 3.
tamen etiam sine tali aëris constitutio-
ne pestis excitari potest, & ea ipsa cor-
ruptio nō in qualitatibus primis termi-
natur,

natur, sed etiam occultas qualitates & *ἡ δὲ φύσις*. Hippocratis concurrere necesse est. Venenositatem autem qualitatemque pestilentem accipit primò à Cœlo, dum à stellarum peculiari influenza aër seu in primis qualitatibus ita disponitur, vt putrescat & corrumpatur, seu occulto etiam modo ita afficitur, vt in eo *μιάσμα* venenata homini tota substantia aduersa generentur. Ad quam rem imprimis Saturnum multum posse, Astrologi docent. Deinde etiam pestilentiae semina accipere potest aër ex terræ cauernis, dum ex iis halitus venenati in aëre diu concluso geniti exhalant: ad quam rem faciunt terræ motus, qui eiusmodi halitus venenatos commouent, iisque exitum patefaciunt. Ita ex arca diu conclusa aperta pestem exortam fuisse, annotauit Iulius Capitolinus, *in Vero*. Idem accidere potest è stagnantibus aquis & lacubus, puteorum aquis corruptis. Tandem etiam à cadaueribus interfectorum, & locustarum mortuarum copia putrescente aërem infectum fuisse, historiae testantur.

Secundo

Secundo etsi stellæ aërem corrumpendo pestilentiaë causa esse possunt, dum eum ita corrumpunt, ut pestilentia illa, quæ in eo continentur, *μιάσματῶ* homini communicata pestem in eo excitent: tamen etiam per se corpus ipsum humanum afficiendo pestem excitare valent, dum vel ipsum aërem ita disponunt, ut seu manifestis, seu occultis qualitatibus corpori humano conseruando aptus non sit, sed humores in eo corrumpat, ita ut pestilentem naturam induant; vel etiam proximè atque immediatè occultis influentiis corpus humanum, & præcipuè humores ac spiritus in eo, corrumpant: Qua de re Astrologi consulendi.

Tertiò pestilens venenum generari potest à victu communi: id quod non rarò accidit in diuturna annonæ caritate, in castris & obsidionibus, ubi homines cibo corrupto & prauo uti coguntur, è quibus prauis humores generantur, qui in corpore detenti amplius corrumpuntur, & tandem pestilentem naturam induunt, id quod historiae satis testantur.

*Victus
commu-
nis.*

H

Quartò

*Venefi-
cia.*

Quartò pestem excitant vnguenta & pulveres venenati sparsi : id quod à maleficis quibusdam factitatum fuisse , historiæ itidem testantur. Si quis tamen hoc causæ genus ad contagium referre velit , cum eo non pugnabimus.

*Imagi-
natio.*

Quintò,caussa est imaginatio & terror ac timor , docuitque experientia, quosdam , dum vel è longinquo etiam peste infectos vel mortuos, vel è domo infecta egressos conspexissent,ex terrore nimio & timore in pestem incidisse. Idem ex ira accidisse,obseruavi.

C A P V T III.

De Contagio.

ATque hæ sunt causæ , quarum vi in aëre vel corpore hominum pestilens venenum generari potest. Sæpe tamen accidit, vt neque aër , neque vitus prauus,neque reliquæ causæ pestilentiam excitauerint , sed aliunde ea in locum aliquem per contagium delata, & postea etiam per contagium in plures diffusa sit. Etsi enim & alij morbi
conta

contagiosi sint: tamen pestis omnium morborum contagiosissimus.

Contagium verò est similis affectio- *Contagium.*
nis morbosæ in alio corpore, per in-
namentum à morboſo corpore com-
municatum, productio. Ad contagium
verò requiruntur tria; Ipsum corpus
contagiosum, quod alia inficit; affectio
præter naturam, quæ alteri communi-
catur; & corpus, quod inficitur.

Primò corpus contagiosum est, quod
dum morbo aliquo laborat, non ipsum
morbum, (accidens enim de subiecto
non egreditur) sed aliquid causæ mor-
bificæ de se diffundit, & alteri commu-
nicat, atque hoc modo similem in eo
affectum excitat. Illud enim, quod à cor-
pore contagioso alteri communicatur,
non est ipse morbus, sed corpus quod-
dam è corpore morboſo effluens, & in
alio receptum, similem affectum in eo
excitare valens, Græci vocant νοσῆρας
ἀποσπάρεις, & δαυρῶσαι, & μείσματα, La-
tini inquinamenta ac semina contagij.
Et cum videamus, talia semina non so-
lùm in minima quantitate noxias vi-
res habere, & facilè in corpus sese infi-

nuare, sed etiam diu durare & vires suas integras retinere : & exactissimam missionem habeant, & spirituosam quodammodo sint, ac occulta aliqua qualitate vires suas exserant, necesse est.

Contagium quot modis disseminetur.

Non vno autem modo contagium disseminatur. Aliquando enim per halitum, aliquando per poros cutis, seu forma vaporum, seu sudoris, sordiumque cuti adhærentium, exit, & aliis corporibus communicatur. Et copiosissimè è corpore infecto hoc *μιάσμα* exit, ubi venenum natura fortius est, eamque vincit, quod in morituris accidit.

Semina autem contagij communicantur vel per immediatum contactum, vel per medium aliquod & vehiculum. Vehiculum autem hoc duplex est, aër, & fomes aliquis, quem appellant. Aër, ubi à corporibus infectis contagij semina accepit, in vicina & sæpe etiam remotiora loca ea deferre potest. Fomitis rationem habet, quicquid contagij semina in se recipere, & aliò transferre potest. Qualia corpora sunt rara & porosa; ut linum, gossipium, plumæ, pelles pilosæ

pilosæ animalium, & vestes inde confectæ, plumæ item auium & aues ipsæ. Compertumque est, *μυδοματῶ* illa pestilentia sæpe in fomite aliquot annos latuisse. Imò fieri potest, vt quis pestilentia semina in veste illæsus circumferat, iisque motis ac excussis alium inficiat.

Contagij autem pestilentis semen in corpus receptum illi similem, qua corpus illud, è quo emissum est, laborauit, dispositionem inducit, & quidem plerumque subitò: aliquando tamen aliquot diebus in corpore latuisse, antequam sese exseruerit, compertum est.

Tertiò corpus, quod pestilens seminarium recipit, quod attinet, etsi à veneno pestilenti nemo sibi facile immunitatem polliceri possit, alios tamen facilius, alios difficilius infici, certum est. Cuius rei causa proculdubio consistit in peculiari aliqua & occulta qualitate cordis, cuius vi veneno pestilenti resistere valet, vel non valet. Quia tamen venenata qualitas sine subiecto è corpore infecto in alia non transfertur, fortius se insinuabit, si in corpus analo-

gum & simile ei, in quo generata est, recipiatur; unde consanguinei, quam alij, faciliùs inficiuntur. Sunt tamen & alia, quæ, ut pestis faciliùs admittatur, faciunt. Qui enim copiosius inspirant, ut fit post validum motum, & qui poros corporis habent amplos & patentès, faciliùs semina pestis, in aëre vel fomite aliquo hærentia, suscipiunt.

C A P V T IV.

De signis Pestis.

*Signa
diagno-
stica.*

PORRò signa quod attinet, ut de imminētis pestilentia signis, breuitatis studio nihil afferamus, sed qua ratione saltem agnosci possit, dicamus, pestis equidem, cum in plures iam grassatur, non difficulter cognosci potest. Verùm antequam in plures diffunditur, vix vllum signum pathognomonicum datur, quo certò cōstare possit, vnum vel paucos malè affectos peste laborare. Postea ubi in plures serpit, non ita difficulter cognoscitur; præcipuè cum morbi sporadici omnes ferè sileant. Nam 1. pestis multos inuadit, & plerosque iugular.

2. contra

2. contagiosa est, & in alios facile derivatur, magisque, quàm ullus alius morbus contagiosus. 3. vi sua vires & facultatē vitalem imprimis prostermit. Vnde 4. fiunt pulsus parvi, frequentes, & inæquales, accedit cordis palpitatio, lipothymia, syncope, & sūma omnino angustia. 5. si morbus protrahatur, & venenum humores corrumpat, omnis generis mala & symptomata accedunt, & tota ferè corporis œconomia turbatur. Accidunt febres, exanthemata varia, bubones, carbunculi. Neque tamen, si nullæ maculæ, nullus bubo, vel carbunculus appareat, concludendum, ægrum peste non laborare. Sæpe enim accidit, vt antequam ista erumpant, & ob virtutis debilitatē expelli possint, æger morbi vehementia moriatur. Accidunt & alia omnis generis symptomata. Vbi enim robur corporis à veneni vehemētia debilitatur, humores ac spiritus corrumpuntur, excreta mutantur, & vrina vel cruda, vel corrupta planè apparet, sudores fiunt foetidi ac intempestivi, per aluum praua, foetida, malè colorata excernuntur, qualitates corporis variè

mutantur. Et nihil omnino est in febribus ardentibus & malignis, quod non etiam in pestilentia apparere possit.

*Pregno-
stica.*

Nullus autem omnino morbus est, cui aphorismus Hippocrat. 19. *sect. 2.* magis competat. Sæpe enim, cum maximè blanditur pestilentia, mors inopinatò occupat; contrà, qui desperati videbantur, sæpe contra spem euadunt.

Salutis tamen maior spes est, ubi tumores subitò erumpunt in loco non periculoso, & post eruptionem symptomata remittunt. Si item exanthemata sint boni coloris, & cum symptomatum remissione. Si medicamenta, cibus & potus non euomantur; si sudores cum alleviatione erumpant, & alia, quæ in febribus salutaribus adesse solent, signa conspiciantur.

Periculum verò summum indicatur, cum tumores non satis erumpunt, carbunculi cordi vicini emergunt, vel iterum evanescunt; si adsunt deliria, vigiliæ, coma, convulsiones; si æger omnia fœtere dixerit; si adsunt tremor cordis, animi deliquia; si omnia vomitu reiciantur; si extrema frigescent; si sudor
sit

ſit frigidus; ſi alius varia, nigra, foetida
deiciat, atque alia malignarum febrium
praua ſymptomata adſint.

C A P V T V.

De præſervatione à Peſtilentia.

CUm verò tutius ſit, vt peſtis præca- *Præſer-
uatio.*
ueatur, quàm vt præſens è corpore
expellatur, primò de præſervatione ſol-
licitos eſſe oportet. Præſeruandi autem
ratio, poſt Dei auxilium, quod precibus
expetere decet, in duobus conſiſtit. Pri-
mum eſt, vt cauſſæ omnes, quæ peſtem
inducere valent, vitentur; deinde vt
cauſſarum illarum vis, vbi eas vitare
non licet, infringatur, & corpora ad
eam recipiendam minùs apta, ad reſi-
ſtendum verò fortia reddantur.

Primò ergo, ſi peſtis alicubi graſſatur,
omnia cum infectis commercia vitan-
da ſunt, & ſi quis præter opinionem in-
ficiatur, à reliquis cum omni ſupellekti-
le ſeparandus, & quidem ad plures
ſeptimanas: ædeſque infectæ, vt in-
fra dicetur, mündandæ. Et ſi dubium
ſit, an quis reuera peſte infectus ſit,

Hic præſtat,

præstat, esse nimis cautum, quam tenerarium.

Si verò pestilentia iam in loco aliquo disseminata sit, tutissimum est, locum mutare, iuxta vulgatum versiculum: *Mox, longè, tardè, cede, recede, redi.* Cuius verò rationes non ferunt, ut locum mutet, is, Dei auxilio implorato, frequenter alexipharmacis utatur, iisque aduersus occurrens contagium corpus muniat, & ut corpus ab omnibus excrementis liberum sit, & in naturali statu conseruetur, det operam.

Purgan-
tia.

Et ut à posteriore incipiamus, corpus equidem fortibus medicamentis non est temerè debilitandum: si tamen quid vitiosorum humorum in corpore fuerit, ne alexipharmacorum vis debilitetur, aut venenum pestilens faciliè in corpore radices agat, lenioribus purgantibus sensim id euacuandum est. In quem finem vtilissimæ sunt *pilule Ruffi* ab Autore, & ab usu pestilenciales nominatæ: è quibus etiam, addito oleo φ , *elixir proprietatis* dictum compositum est. Vtilis est etiam *syrupus rosarum solutius*, *rhabarbarum*, *agaricum*, & quæ ex his compo

componuntur, quæ paſſim exſtant. Sanguis ſi abundet, venæ ſectione immi-
nui poteſt.

Diæta ſit talis, qua vitioſi humores *Diæta.*
non cumulentur: cibisque & potui in-
primis aliquid alexipharmacî admiſce-
ri poteſt. Et ſi etiam, quod facilè fieri
poteſt, excrementitij humoris aliquid
cumuletur, ſubinde per dicta medica-
menta euacuetur.

Et cum fontanellæ etiam excremen-
titioſos humores ſenſim è corpore tol-
lant, atque hinc apparatus ad peſtem
ſuſcipiendam demant, & eæ tempore
peſtis vtilis ſunt.

In motu etiam & quiete, ſomno
& vigilia, animique affectibus me-
diocritas ſeruanda, & imprimis,
quantum fieri poteſt, attenta de peſte
cogitatio, & metus eius animo excu-
tiendus.

Præter hæc duo adhuc ad præſerva-
tionem à peſte neceſſaria ſunt; Primum,
cauendum, ne peſtilentiæ ſeminarium
attrahatur: Deinde ſi forſan id nobis
ignorantibus accidat, vt corpus aduer-
ſus id muniatur.

Primum ergo danda opera, ut aer, in quo degitur, purus sit. Et proinde primò publica loca ab omnibus sordibus mundanda, & aer igne, ac præcipuè ex ligno iuniperi, quercu, pino, lauro & plantis odoratis incensis, mundetur. Deinde quisque priuatim hominū frequentiam vitet, & proinde rectè à magistratu conuentus solennes & frequētes prohibentur. Fenestræ etiam versus loca infecta claudantur, & aer lignis, ut modò dictum, accensis, vel aceto aliquo bezoardico lateribus ignitis infuso, vel suffumigiis, vel puluere pyrio accenso mundetur.

*Quomodo
quisque
priuatim
se aduer-
sus cōta-
giū mu-
nire de-
beat.*

Nemo verò facilè in publicum, nisi vna atque altera hora post Solis ortum, nequè ieiunus, & non nisi alexipharmacis munitus, prodeat. Itaque naribus admouenda poma ambræ, noduli, linimenta odorata, admixtis *theriaca*, *oleo ruta*, *zedoaria*, *angelica*, *citri*, *iuniperi* & similibus. Et sub lingua trochisci sublinguales conuenientes detineantur, sacculi cordiales cordis regioni applicentur.

*Amule-
ta.*

Amuleta quoque à plurimis com-
mendan-

mendantur è rebus venenatis , *arſenico*,
pulvere buſonum , *argento vino* , & ſimili-
 bus parata , quorum deſcriptiones paſ-
 ſim exſtant : quæ quicquid præſtant, eo
 modo proculdubio efficiunt , quod to-
 tius ſubſtantiaë ſimilitudine peſtilens
 venenum ad ſe trahunt, & à corde auer-
 tunt ; ſicut à ſcorpione percuffi oleo eiuf-
 dem extra illito ſanantur. Cauendum
 tamen , ne motu incaleſcant ſacculi vel
 maſſæ illæ, ne per poros cutis viſ illa ve-
 neni cordi communicetur.

Verùm maxima ſalutis & ſecuritatis *Alexi-*
 ſpes eſt in alexipharmacis : è quibus ea *pharma-*
 eligenda , quæ longa experientia pro- *ca.*
 bata ſunt. Simplicia ſunt : *angelica*, *vale-*
riana, *tormentilla*, *carduus benediſtus*, *ace-*
toſa , *dictamnus Creticus* ; & *albus* , *ruta*,
vincetoxicum , *ſcordium* , *ſcabioſa* , *morſus*
diaboli , *pimpinella* , *olſnium* , *veronica*,
ſcorzonera, *calendula*, *abſinthium*, *tanace-*
tum, *zedoaria*, *imperatoria*, *gentiana*, *bac-*
ca iuniperi , *nucis iuglandes* , *os de C.C.*
bolus Armenus, *terra ſigillata* ; *ſmaragdus*,
hyacinthus.

E quibus varia fiunt compoſita: inter
 quæ excellunt & longo uſu comprobata

ta sunt, *Mithridatium*, *theriaca* & *confectio liberantis*: sicut & illa antidotus, quæ regi Mithridati adscribitur, de qua Plinius, *lib. 23. cap. 8.* ut & *theriaca diateffaron*. Quibus Recentiores plurima alia addiderunt, qualia sunt, *electuarium de croco*, *sive de onxo dictum*, *diascordium Fracastorij*, *antidotus Saxonica*, *antidotus Guidonis de Cauliaco*, *pulvis Caesaris rubeus*, & *gryseus*, *electuarium camphoratum Kegleri*, & plurima alia, quibus tractatus de pestilentia variorum autorum referti sunt, quæ tum ad præseruationem à peste, tum ad curationem eiusdem utilia sunt, ut potius de delectu, quam de copia hîc sollicitos esse deceat. In qua copia tamen tutius est, antiquis longo usu probatis confidere, quàm nouiter inuentis, quamcunque etiam speciem & præconia præse ferant.

Cùm autem infantibus & grauidis illa fortiora & calidiora non conueniant, iis danda medicamenta ex C. C. *off. de C. C. radicibus tormentille, margaritis, bolo Armeno, coralliis, bezoar, lapidibus pretiosis.*

Et

Et cum etiam medicamentorum alexipharmacorum secundum qualitates, quas præter occultas obtinent, non parua detur differentia, non cuilibet tempori & ætati quælibet conueniunt. Nam in aëre calidiore minùs calidis utendum; quod & iis faciendum qui vel ætatis vel corporis constitutionis ratione calidiores sunt, ne humores incendantur, & febres postea inde contrahantur. Aut si quæ sunt calidiora, aceto præparanda sunt, vel sumenda cum *syr. acetos. citri, acetosa, acetosella, granatorum.*

Non etiam vni alexipharmaco inhærendum, sed mutanda alexipharmaca, ne natura illi adsuescat, atque ita parum ab eo auxiliij accipere possit.

C A P V T VI.

De curatione Pestilentia.

CÆterùm si villo in morbo, in hoc *Curatio.*
certè, accuratam curandi rationem
perspectam habere oportet: cum leue
aliquod erratum commissum irrepara-
bile damnum pariat. Cùm autem recta
curandi

curandi ratio ab indicationibus pendeat; pestis autem occultus morbus sit, eiusque natura in occulta qualitate, peculiari vi cordi infesta, summæque contagiosa consistat; ea verò inducatur à causâ simili qualitate prædita: facile hinc patet; & ipsam illam occultam qualitatem indicare alexipharmacum contrariam, & causam illam in corpore, seu per inspirationem, seu contractum acceptam; aut quouis modo contractam, sui amotionem & eradicationem indicare. Verùm quomodo id fieri debeat, inter Medicos controuersum est.

Vena sectio.

Primò enim cùm nec venæ sectio, nec purgatio à pestilentia, quatenus talis, indicetur, an adhibendæ sint, controuertitur. Primò venæ sectione quod attinet, cùm ea nec venenum, pestilentemque morbum, nec causam eius tollat, rarò in vsum trahenda, & in ea peste, quæ fit à prauo victu, planè omittenda, vt & in ea, quæ fit ex aëris constitutione pestilente, nisi magna adsit sanguinis copia, quæ imminuenda, eiusque æstus temperandus sit. Si verò à contagio

gio pestis contracta, & ea deprehendatur sanguinis copia, vt metuendum sit, ne putrida febris tanta, à qua æger non minùs, quàm ob ipsam pestem, periclitari possit, accedat; aut sanguinis ad loca inconuenientia impetus animaduertatur; virésque potius copia oppressæ, quàm dissipatæ sint: venæ sectionem instituere licet, tantam tamen, quàm vires ferunt. Et quidem mox in principio: nam horis 12. vel pluribus elapsis tutius est, venæ sectionem omittere; cùm vires vehementia veneni fractæ eam ampliùs non ferant.

Locum venæ sectionis quod attinet, talis eligendus, vt naturæ motus adiuuetur, non impediatur, simulque à loco nobili materia pestilens auertatur. Ideoque si parotis post aures, vel bubo sub axillis, aut carbunculus in partibus superioribus erumpat, in brachio eiusdem lateris vena aperienda. Si autem in inguinibus bubo erumpat, in pede eiusdem lateris vena aperienda. Si verò carbunculus in alterutro crure oria-
tur, cùm is inflammationem & dolorem vehementissimum, quo vires deiciuntur,

ciuntur, excitare soleat, commodum est, in opposito crure venam aperire. Neque enim hoc modo naturæ motus impeditur, sed ita etiam à partibus superioribus materia versus inferiora trahitur, & nimius ad locum affectum fluxus, atque inflammationis augmentum prohibetur.

Purgatio.

Purgatio deindè etiam à veneno pestilenti non indicatur, nec vlllo purgante medicamento seminarium pestis eiicitur; nisi forsan magna naturæ commotione facta: id quod cum periculo coniunctum. Et cum Natura plerumque venenum pestilens ad ambitum corporis expellat, purgatione hic motus naturæ impeditur, venenumque pestilens ad interiora retrahitur, humoribusque magis permiscetur, & humorum motu concitato, periculossimæ, imò lethales, vomitiones & diarrhææ excitantur. Ideoque non in purgatione, sed imprimis in alexipharmacis, post Deum, salutis spes collocanda.

Alexipharmacorum usus.

Quapropter tutissimum fuerit, si quis peste correptum se sentiat, statim, Dei auxilio

auxilio prius implorato, ad alexipharmaca, *suprà, cap. 5.* enumerata, confugere, & efficacissimum aliquod atque experientia probatum medicamentum sumere, & si primum vomitu reiiciatur, statim id reperere: imò etsi id retineatur, semel sumere non sufficit, sed horarum 24. spatio ter alexipharmacum exhibendum, & per biduum hoc modo continuandum, donec veneni vis fracta sit. Sumpto medicamento se æger ad sudorem componat, imprimis prima & secunda vice, aëremque frigidum non admittat, atque si vires ferant, ad duas horas sudorem continuet. A somno abstineat æger, donec bis sudauerit. Et inter sudandum reficiatur *conserva & syr. rosarum, acetosa, acetosif. citri, granatorum, ribes*, cum aquis cordialibus, & odoramentis naribus admotis, & per cubiculum sparsis. Utile etiam fuerit, panem à forno calentem aliqua parte excavare, cavitatemque theriaca implere, & umbilico, vel sub alas apponere, ut venenum à pane attrahatur. Finito sudore corpus linteis mundis calentibus exsiccetur, cauèdo, ne aër frigidus

duſ admittatur, & lintheamina ac tegumenta lectorum mutantur. Poſt ſudorem æger cibis *εὐχύμοις* & *ὑδαέτοις* nutriatur, modica tamen quantitate ſumptis.

Vbi ſemel ſudavit æger, ſi venæ ſectiōne opus ſit, inſtituatur eo, vt antea dictum, modo. Et vbi alexipharmaca per biduum continuata ſunt, & corpus ſit cacochymicum, aut ab interno humorum vitio peſtis dependeat, & à febre magnum periculum metuendum ſit, purgans exhibere non inutile fuerit, vt pars aliqua materiæ putredinem concepturæ, febremque aucturæ tollatur, vt natura reliquum faciliùs vincere poſſit. Sint autem illa mitiora, *ſyr. roſarum ſolut. tamarindi, rhabarbarum, agaricus, pil. peſtilentiales, tryphera Perſica, ſyr. diaſereos.*

Poſtea etiamſi ſudorem ciere opus non ſit, (ſi tamen die critico erumpat, non impediendus eſt) continuanda tamen ſunt ea medicamenta, quæ putredinem inhibent, feбри malignæ reſiſtunt, incendiumque in viſceribus & humoribus exſtinguunt.

Itaque

Itaque tum de theriaca & aliis medicamentis calidis obseruandum, ne temerè sine vlllo morbi, naturæ, ætatis & aliarum circumstantiarum respectu vsurpentur. Quapropter vbi febris iam corpus occupauit, post sudorem talia non nisi refrigerantibus admistis, vel etiam refrigerantia sola exhibēda, qualia sunt *syrup. acetositatis citri, acetosa, acetosella, granatorum, ribes, rubi Idæi, vt & margarita, corallia, lapides pretiosi, bezoar.*

Cùm autem natura plerumque partem materiæ venenosæ ad ambitum corporis expellere, & bubones & carbunculos excitare soleat: si perfectè aut certè maxima veneni pars in bubonem expulsa sit; id quod cognoscitur ex febris & symptomatum remissione: concoctionem, etsi non perfectam, vt in aliis tumoribus, expectare licet, eaque omnibus modis adiuuanda. Si verò vel bubo non satis erumpat, vel nimisaugeatur, febris tamen & symptomata non remittant, nec æger melius habeat, danda opera, vt veneno quamprimum exitus patefiat. Itaque vel vesicantia

*Bubonũ
cura. io.*

ficantia imponenda, vel cutis scarificanda, ut venenum liberè exspirare, humorésque pestilentes effluere possint. Magno etiam cum ægri comodo, licet incisio facta non sit, pulli galinacei vel columbini, circa anum deplumati, apponuntur, idque sæpius repetatur; vel bufo exsiccatus vino emollitus imponatur. Postea detur opera, ut materia reliqua per idonea medicamenta, passim descripta, maturetur. In locum incisione apertum digestiua idonea imponantur, & si incisio minùs profunda sit, & pus adhuc conclusum detineatur, scalpello aperiendus est tumor, vlcusque convenientibus medicamentis mundandum, nec vlcus claudendum, donec omne venenum effluxerit.

*Carbunculorum
cyratio.*

Carbunculi verò statim scarificandi sunt, & quidem satis profundè, ut pestilens & corruptus humor effluat; postea emplastrum aliquod conueniens imponatur, quale est de fuligine, & alia passim descripta. Nonnulli emplastrum de magnete arsenicali imponunt. Imponere etiam utile est bufo-
nem

nem exsiccatum, vino maceratum. Locis verò vicinis, ne venenum ad interiora regrediatur, defensiuum aliquod ex refrigerantibus, siccantibus & adstringentibus imponendum. Nonnulli sapphiro in cute circa carbunculum circulum ducunt, ne venenum latius serpat, sed extinguatur. Et si carbunculus nimium augeatur, summumque dolorem excitet, venam sub carbunculo aperire vtile est, vt sanguis ille corruptus euacuetur. Et ad calorem extinguendum, emplastrum de cynoglossa adhibendum. Eschara vbi generata fuerit, vnguento conueniente demenda, & vlcus debito modo mundandum & curandum. Toto verò curationis tempore singulis septimanis bis potiuncula aliqua è temperatis alexipharmacis exhibenda, ne veneni aliquid in corpore relinquatur.

CAPVT

CAPVT VII.

*De pestilentis ac malignæ febris natura,
& à peste differentia.*

CUm in pestilentia summus humorum corruptionis gradus sit, ad eum per malignas & pestilentes febres quasi adscenditur: de iis ergo iam dicendum, primoque videndum, qua ratione hæc tria, pestilentia, pestilens & maligna febris differant.

Pestilentia, pestilentes & maligna febres quomodo differant.

Pestilentiam in occulta quadam & homini planè aduersa qualitate sitam, eandemque contagiosam esse, & febrem quidem non de eius essentia esse, eam tamen plerumque sibi comitem adsciscere, suprà dictum est. Itaque ipsa pestis etiam, vbi febrem coniunctam habet, non sine causa febris pestilentialis suo modo appellari potest. Dicuntur tamen & aliæ febres pestilentes sine peste, in quibus humorum corruptio nondum quidem summum illum gradum, qui pestilentis veneni naturam constituit, attingit, ipsæ tamen etiam veneni ac malignitatis aliquid pestilentiaæ similis obtinent,

obtinēt, & proinde vel non perniciosæ, vel non contagiosæ sunt, vt pestis, vel, si vtrumque obtinent, minùs tamen, quàm pestis, perniciosæ & contagiosæ sunt. Pestilentis enim febris in specie dictæ ac pestilentis veneni differentia (cùm vtriusque natura occulta sit) pernicipiei & contagionis vehementia se prodit, quæ non solum in sporadicis febribus, sed & in epidemiis pestilentialibus minor, quàm in ipsa peste, animaduertitur. Malignas verò febres quod attinet, etsi & verè pestilentibus in genere hoc nomen tribui possit: tamen in specie malignæ dicuntur, in quibus adhuc minor, quàm in verè pestilentibus, corruptionis gradus est, & in quibus humores, qui febrem accendunt, occultam aliquam & ad venositatem accedentem qualitatem habent: Vnde & minor est pernicipies, & contagium quandoque planè abest.

Et vt res paucis comprehendatur, si in febre aliqua ex symptomatibus pateat, præter putredinem occultam & malignam adesse qualitatem, pauci tamen inde moriantur, siue epidemiæ
I sint

sint febres, siue sporadicæ, siue contagiosæ sint, siue non sint contagiosæ: primus hic corruptionis gradus est, febrisque illa appellatur in specie maligna. Si verò plures iam moriantur, alij tamen non ita inficiantur, vel licet contagium quoddam & perniciēs etiam quædam animaduertatur, nec contagium tamen, nec perniciēs summum gradum attigerit, ac non pauci conualescant: pestilens febris in specie nominatur. Si tandem plurimi, qui ægrotare incipiunt, moriantur, ac obuij quique inficiantur, imò contagium in loca etiam remota disseminetur: pestis est.

C A P V T VIII.

Ad quod febrium genus pestilentes & maligna pertineant.

*Febres
pestilentes
& malignæ
ad quodnā
febrium
genus
pertineant.*

PORRÒ cū febrium tria sint genera; ephemera, putrida, hectica, & rursum putridarum aliquot differentiæ: quæritur iam, ad quod febrium genus malignæ ac pestilentes pertineant, seu an omnibus febribus, an verò certo cui-
dam

Ad quod febr. gen. pest. & malig. per. 195
dam generi, malignitas ac pestilentia
accedere possit.

Nullas autem ephemeræ ac hæcicas
malignas & pestilentes dari statuimus;
quòd in omnibus febribus malignis &
pestilētibus manifesta corruptionis seu
putredinis humorum indicia adsint: li-
cet humor ille malignus & pestilens si-
mul sæpe cum spiritibus insignem an-
tipathiam habeat, & periculosissimam
febrem excitet.

Febres autem putridæ pestilentes in
specie omnes continuæ sunt; cùm ve-
nenatæ putredinis ea vis sit, vt facilè
in omnes venas ac arterias sese diffun-
dere, omnesque humores corrumpere
possit.

Febres autem in specie malignæ di-
ctæ, etiam intermittentes esse possunt, vt
ipsa experientia testatur. Nec impossi-
bile est, vt etiam in primis viis putre-
scentes humores malignitatem aliquam
concipiant; & cùm in talibus febribus
tanta veneni vis non sit, nihil obstat,
quin natura statis periodis excretiones
aliquas instituire possit.

Continuæ verò pestilentes & mali-
gnæ

gnæ nulli earum generi peculiariter addictæ sunt, sed prout putredo in hunc vel illum morbosum apparatus incidit, ita etiam hæc vel illa febris continua excitatur, nunc synocha, nunc periodica; unde etiam varia pro morbo appa-
 ratu oriuntur symptomata.

*Februm
 pestilen-
 tium &
 maligna-
 rum dif-
 ferentia.*

Porro febrium malignarum ac pestilentium differentias quod attinet, cum in qualibet febre tali duo reperiantur; ipsa putredo, à qua febris oritur, & malignitas: harum ratione & febres hæ variant. Nam interdum & à putredine, & à malignitate æquale malum imminet, quæ febres, si & putredo & malignitas sit magna, sunt periculosissimæ; si verò nec putredo, nec malignitas sit magna, febres non periculosæ sunt. Interdum maior est putredo, qualitas verò maligna non ita vehemens; ac tum febris ad aliarum putridarum naturam magis accedit. Interdum putredo non est magna, qualitas autem maligna vehemens, talesque febres apparent quidem mites, sed sunt fraudulentæ & periculosæ.

Ipsam verò malignitatis & pestilentia

De caussis febris pestil. & maligna. 197
tiæ in febribus naturam quod attinet,
etsi ea sit occulta : ex effectibus tamen
etiam quandam varietatem deprehen-
dere licet, dum nunc maculæ, nunc
morbilli, nunc variolæ erumpunt, nunc
sudores nimij, nunc catarrhi, pleuri-
tidis & alia mala, prout venenum cum
hac vel illa parte peculiarem antipa-
thiam habet.

C A P V T IX.

De caussis febris pestilentis & maligna.

CAussas harum febrium quod atti- *Causa.*
net, cum malignitas earum minor
sit, quàm pestilentia, & per hanc quasi
per gradum ad pestilentiam adscenda-
tur, quæ causæ pestis sunt, eadem ferè
& malignarum & pestilentium febrium
erunt, sed mitiores, aër præcipuè, cœ-
lum, victus ratio & contagium.

Febres nimirum malignæ oriuntur
primò à morbofo corporis apparatu.
Hic autem oritur à cibo pravo & putre-
dini & corruptioni faciliè obnoxio, de
quo videatur Galenus, *libro de cibis boni.*

& male facit. Possuntque humores in corpore nostro ita corrumpi, ut veneni naturam induant, de quo dictum est in Institutionibus, *lib. 1. part. 2. cap. 12.* Deinde etiam ex causis communibus, aeris nimirum constitutione minus commoda, ut & stellarum influxu.

Pestilentes verò febres in specie dictæ easdem causas habent, sed grauioribus, quæ tandem, si augeantur, pestilentiam producunt. Unde febres malignæ & pestilentes diu durantes tandem in pestem abire solent.

C A P V T X.

*De signis febrium pestilentium
& malignarum.*

*Signa
diagno-
stica fe-
brium pe-
stilentiū.*

Eodem modo sese res habet de signis diagnosticis. Apparent enim in febre pestilentiali in specie dicta eadem ferè signa, quæ in peste, sed pauciora, vel mitiora: & sunt tales febres non tam perniciosæ vel contagiosæ, ut ipsa pestis.

Quantum

Quantum autem ad signa differentiarum, si & malignitas ac putredo sit maxima, vires valdè deiiciuntur, & grauissima ac pessima apparent symptomata: si putredo sit summa, malignitas verò parua, febrilia quidem, quæ putredinem comitantur, symptomata satis sunt vehementia, sed vires non ita deiiciuntur. Si autem putredo non est magna, qualitas verò maligna vehemens, mitia satis, quæ febrem comitantur, sunt symptomata, vires autem valde deiiciuntur.

Si humores solùm afficiantur, apparent bubones, carbunculi, parotides; maculæ, pustulæ, & alia putridarum febrium indicia. Si spiritus valdè afficiantur, hæc signa absunt, nec calor est magnus, vires subitò concidunt, ægrique animi deliquia patiuntur, pulsus sunt inæquales, imbecilles ac languidi, febrisque ipsa vno, duobus vel tribus diebus ad salutem vel mortem terminatur. Si tandem cor valdè affligatur, adest summus virium languor, nec ægri de magno calore conqueruntur.

*Mali-
gnarum.*

Malignas autem febres quod attiner, eas in principio statim cognoscere difficile est, cum malignitas sæpe diu lateat, & non, nisi ubi vires sumsit, sese prodatur. Quapropter signa omnia diligenter perpendenda sunt, & si quid suspectum sit, id diligenter perpendendum. Sunt autem omnia signa in malignis maiora, quam pro febris natura, & symptomata, quæ apparent, vehementiora, quam quæ à febre provenire possint. Virium nimirum debilitas, inquietudo, anxietas maior, quam pro caloris febrilis ratione. Pulsus frequens, parvus, debilis; aut si is naturalis videatur, tamen alia prava symptomata adsunt. Urina interdum est sanorum similis: interdum tenuis & cruda, nullumque habens sedimentum, aut si quod habeat, excremento potius simile, quam sedimento: interdum crassa, colorata, turbida, crassum, rubrum & turbidum sedimentum habens. Calor quam pro natura morbi & symptomatum mitior. Facies à naturali & viuido illo statu multum mutata. Itaque his quidem pestilentes ac malignæ febres satis agnoscisci

fei possunt, accedunt tamen & alia; sopor grauis, vigiliæ, deliria, dolores capitis, aurium sibilus & surditas, nausea vel vomitus, alui profluvia, hæmorrhagiæ narium. Erumpunt tumores post aures, sub alis ac inguinibus, variæ item maculæ, ac nihil ferè mali est, quod in aliis periculosis febribus apparet, quod non in hisce etiam conspicitur.

Prognostica quod attinet, ac primò *Prognostica.* pestilentium febrium, eadem ferè eorum est ratio, quæ pestilentia. Quò enim symptomata sunt grauiora & vires debiliores, eò maius periculum portenditur. Quò verò symptomata sunt mitiora, & vires fortiores, eò maior salutis spes est.

Eadem ferè ratio est febrium malignarum; & quid in qualibet tali febre de euentu morbi sperandum sit, ex iis, quæ in Institut. lib. 3.

part. 3. cap. 4. 5. 6. 7.

8. dicta sunt,
pater.

I s

CAPVT

nausea vrgeat , vomitus per leuiora vomitoria prouocandus.

Hinc iterum ad alexipharmaca accedendum , quæ tamen talia sint, ne febris per ea augeatur. Itaque postea ea adhibenda, quæ temperatiora sunt , simulque putredini resistunt, qualia sunt; *acetosa, poma citri, granata, pentaphyllum, tormentilla, C. C. os de corde cerui, lapis bezoar, bolus Armenus, terra sigillata, & similia, & ex his parata medicamenta.* In primis verò aquæ bezoardicæ sæpius exhibendæ sunt, utpote quæ statim penetrant, quæ tamen ita temperari possunt, ut simul febris & putredini resistât. Ideoque iis admiscenda *syrupus acetos. citri, granatorum, acetosa, acetosella* ac similes, & in talium vsu persistendum.

Vesicatoria.

Imminuta materia vesicantia etiam cum ægri commodo cruribus vel brachiis applicantur : cum sine molestia & virium debilitatione materiam venenatam ab interioribus partibus ad externas euocent.

Maligna febris in specie dicta curatio.

Si autem febris maligna sit in specie dicta , maiórque putredo , quàm malignitas , primæ viæ primùm euacuandæ sunt,

De curat. febr. pest. & malig. in gen. 205
sunt, ac non solum clysteres lenientes
locum habent, sed & lenientia, *syr. rosar.* ^{Purga-}
solutius, manna, cassia, tamarindi, agari- ^{tio:}
cus, rhabarbarum, tryphera persica, in pri-
mis si materia turgeat. A fortioribus
verò scammonio, colocynthide, turbith
& similibus planè abstinendum. Et qui-
dem si putredo statim incrementum su-
mat, febrisque inde vehementior ac-
cendatur, ac præcipuè si humores tur-
geant, statim id, & ante tertium diem
præstandum.

Verùm in genere hæc satis determi-
nari nequeunt: in speciali de febribus
hisce tractatione res clarior fiet. Etenim
febres tales pestilètes & malignæ inter-
dum per contagium propagantur, vbi
tutissimum est, conceptum quocunque
modo inquinamentum per sudorifera
& alexipharmaca è corpore expellere,
& postea, si opus sit, purgationem &
venæ sectionem instituere. Interdum
etiam natura ipsa ad ambitum corporis
materiam expellit, vt in variolis & mor-
billis fieri solet. Ac tum etiam natura
in opere suo turbanda non est, nec ma-
teria, quæ ad ambitum corporis protru-
ditur,

nausea vrgeat, vomitus per leuiora vomitoria prouocandus.

Hinc iterum ad alexipharmaca accedendum, quæ tamen talia sint, ne febris per ea augeatur. Itaque postea ea adhibenda, quæ temperatiora sunt, simulque putredini resistunt, qualia sunt; *acetosa, poma citri, granata, pentaphyllum, tormentilla, C. C. os de corde cerui, lapis bezoar, bolus Armenus, terra sigillata, & similia, & ex his parata medicamenta.* In primis verò aquæ bezoardicæ sæpius exhibendæ sunt, utpote quæ statim penetrant, quæ tamen ita temperari possunt, ut simul feбри & putredini resistant. Ideoque iis admiscenda *syrupus acetos. citri, granatorum, acetosa, acetosella* ac similes, & in talium vsu persistendum.

Vesicatoria.

Imminuta materia vesicantia etiam cum ægri commodo cruribus vel brachiis applicantur: cum sine molestia & virium debilitatione materiam venenatam ab interioribus partibus ad externas euocent.

Maligna febris in specie dicta curatio.

Si autem febris maligna sit in specie dicta, maiorque putredo, quam malignitas, primæ viæ primùm euacuandæ sunt,

sunt, ac non solum clysteres lenientes locum habent, sed & lenientia, *syr. rosar.* ^{Purgatio:} *solutius, marina, cassia, tamarindi, agarius, rhabarbarum, tryphera persica*, in primis si materia turgeat. A fortioribus verò scammonio, colocynthide, turbith & similibus planè abstinendum. Et quidem si putredo statim incrementum summat, febrisque inde vehementior accendatur, ac præcipuè si humores turgeant, statim id, & ante tertium diem præstandum.

Verùm in genere hæc satis determinari nequeunt: in speciali de febribus hisce tractatione res clarior fiet. Etenim febres tales pestilètes & malignæ interdum per contagium propagantur, ubi tutissimum est, conceptum quocunque modo inquinamentum per sudorifera & alexipharmaca è corpore expellere, & postea, si opus sit, purgationem & venæ sectionem instituere. Interdum etiam natura ipsa ad ambitum corporis materiam expellit, ut in variolis & morbillis fieri solet. Ac tum etiam natura in opere suo turbanda non est, nec materia, quæ ad ambitum corporis protu-

nausea vrgeat, vomitus per leuiora vomitoria prouocandus.

Hinc iterum ad alexipharmaca accedendum, quæ tamen talia sint, ne febris per ea augeatur. Itaque postea ea adhibenda, quæ temperatiora sunt, simulque putredini resistunt, qualia sunt; *acetosa, poma citri, granata, pentaphyllum, tormentilla, C. C. os de corde cerui, lapis bezoar, bolus Armenus, terra sigillata, & similia, & ex his parata medicamenta.* In primis verò aquæ bezoardicæ sæpius exhibendæ sunt, utpote quæ statim penetrant, quæ tamen ita temperari possunt, ut simul feбри & putredini resistant. Ideoque iis admiscenda *syrupus acetos. citri, granatorum, acetosa, acetosella* ac similes, & in talium usu persistendum.

Vesicatoria.

Imminuta materia vesicantia etiam cum ægri commodo cruribus vel brachiis applicantur: cum sine molestia & virium debilitatione materiam venenatam ab interioribus partibus ad externas euocent.

Maligna febris in specie dicta curatio.

Si autem febris maligna sit in specie dicta, maiorque putredo, quam malignitas, primæ viæ primùm euacuandæ sunt,

De curat. febr. pest. & malig. in gen. 205
sunt, ac non solum clysteres lenientes
locum habent, sed & lenientia, *syr. rosar.* ^{Purga-}
solutius, manna, cassia, tamarindi, agari- ^{tio:}
cus, rhabarbarum, tryphera persica, in pri-
mis si materia turgat. A fortioribus
verò scammonio, colocynthide, turbith
& similibus planè abstinendum. Et qui-
dem si putredo statim incrementum su-
mat, febrisque inde vehementior ac-
cendatur, ac præcipuè si humores tur-
geant, statim id, & ante tertium diem
præstandum.

Verùm in genere hæc satis determi-
nari nequeunt: in speciali de febribus
hisce tractatione res clarior fiet. Etenim
febres tales pestilètes & malignæ inter-
dum per contagium propagantur, vbi
tutissimum est, conceptum quocunque
modo inquinamentum per sudorifera
& alexipharmaca è corpore expellere,
& postea, si opus sit, purgationem &
venæ sectionem instituere. Interdum
etiam natura ipsa ad ambitum corporis
materiam expellit, vt in variolis & mor-
billis fieri solet. Ac tum etiam natura
in opere suo turbanda non est, nec ma-
teria, quæ ad ambitum corporis protru-
ditur,

nausea vrgeat , vomitus per leuiora vomitoria prouocandus.

Hinc iterum ad alexipharmaca accedendum , quæ tamen talia sint, ne febris per ea augeatur. Itaque postea ea adhibenda, quæ temperatiora sunt , simulque putredini resistunt, qualia sunt; *acetosa, poma citri, granata, pentaphyllum, tormentiilla, C. C. os de corde cerui, lapis bezoar, bolus Armenus, terra sigillata, & similia, & ex his parata medicamenta.* In primis verò aquæ bezoardicæ sæpius exhibendæ sunt, vtpote quæ statim penetrant , quæ tamen ita temperari possunt, vt simul feбри & putredini resistât. Ideoque iis admiscenda *syrupus acetos. citri, granatorum, acetosa, acetosella* ac similes, & in talium vsu persistendum.

Vesicatoria.

Imminuta materia vesicantia etiam cum ægri commodo cruribus vel brachiis applicantur : cùm sine molestia & virium debilitatione materiam venenatam ab interioribus partibus ad externas euocent.

*Maligna febris in specie dicta cura-
tio.*

Si autem febris maligna sit in specie dicta , maiórque putredo , quàm malignitas , primæ viæ primùm euacuandæ sunt,

De curat. febr. pest. & maligna in gen. 205
sunt, ac non solum clysteres lenientes
locum habent, sed & lenientia, *syr. rosar.* ^{Purga-}
solutius, manna, cassia, tamarindi, agari- ^{tio:}
cus, rhabarbarum, tryphera persica, in pri-
mis si materia turgeat. A fortioribus
verò scammonio, colocynthide, turbith
& similibus planè abstinendum. Et qui-
dem si putredo statim incrementum su-
mat, febrisque inde vehementior ac-
cendatur, ac præcipuè si humores tur-
geant, statim id, & ante tertium diem
præstandum.

Verùm in genere hæc satis determi-
nari nequeunt: in speciali de febribus
hisce tractatione res clarior fiet. Etenim
febres tales pestilètes & malignæ inter-
dum per contagium propagantur, vbi
tutissimum est, conceptum quocunque
modo inquinamentum per sudorifera
& alexipharmaca è corpore expellere,
& postea, si opus sit, purgationem &
venæ sectionem instituere. Interdum
etiam natura ipsa ad ambitum corporis
materiam expellit, vt in variolis & mor-
billis fieri solet. Ac tum etiam natura
in opere suo turbanda non est, nec ma-
teria, quæ ad ambitum corporis protru-
ditur,

*Mali-
gnarum.*

Malignas autem febres quod attiner, eas in principio statim cognoscere difficile est, cum malignitas sæpe diu lateat, & non, nisi ubi vires sumsit, sese prodatur. Quapropter signa omnia diligenter perpendenda sunt, & si quid suspectum sit, id diligenter perpendendum. Sunt autem omnia signa in malignis maiora, quam pro febris natura, & symptomata, quæ apparent, vehementiora, quam quæ à febre provenire possint. Virium nimirum debilitas, inquietudo, anxietas maior, quam pro caloris febrilis ratione, Pulsus frequens, parvus, debilis; aut si is naturalis videatur, tamen alia prava symptomata adsunt. Urina interdum est sanorum similis: interdum tenuis & cruda, nullumque habens sedimentum, aut si quod habeat, excremento potius simile, quam sedimentum: interdum crassa, colorata, turbida, crassum, rubrum & turbidum sedimentum habens. Calor quam pro natura morbi & symptomatum mitior. Facies à naturali & viuido illo statu multum mutata. Itaque his quidem pestilentes ac malignæ febres satis agnosci

fei possunt, accedunt tamen & alia; sopor grauis, vigiliae, deliria, dolores capitis, aurium sibilus & surditas, nausea vel vomitus, alui profluvia, hæmorrhagiæ narium. Erumpunt tumores post aures, sub alis ac inguinibus, variæ item maculæ; ac nihil ferè mali est, quod in aliis periculosis febribus apparet, quod non in hisce etiam conspicitur.

Prognostica quod attinet, ac primò *Prognostica.* pestilentium febrium, eadem ferè eorum est ratio, quæ pestilentia. Quò enim symptomata sunt grauiora & vires debiliores, eò maius periculum portenditur. Quò verò symptomata sunt mitiora, & vires fortiores, eò maior salutis spes est.

Eadem ferè ratio est febrium malignarum; & quid in qualibet tali febre de euentu morbi sperandum sit, ex iis, quæ in Institut. lib. 3.

part. 3. cap. 4. 5. 6. 7.

8. dicta sunt,

pater.

I S

CAPVT

CAPVT XI.

De curatione febrium pestilentium & malignarum in genere.

Curatio. Tandem curationem febrium malignarum & pestilentium quod attinget, cum duo in his febribus præter naturam sint, venenum seu malignitas, & febris: qua ratione feбри occurrendum sit, ex iis, quæ hæcenus de febribus dicta sunt, patet: quomodo etiam malignitas oppugnanda sit, ex iis, quæ de pestilentia dicta sunt, manifestum euadit. In hoc maxima hæc difficultas, cui prius, cui posterius prospiciendum; & quomodo malignitas tollenda sit, ne febris augeatur; & contra feбри prospiciendum, ne malignitas negligatur. Quod ut rectè fiat, pestilens venenum & malignitas ac putredo & febris inter se conferenda sunt, & vnde plus periculi immineat, perpendendum, atque ad id imprimis respiciendum, ita tamen, ne alterum planè negligatur.

Pestilens febris in specie di-

Quapropter in pestilenti febre, utpote in qua maximè urget malignitas, statim

tim ad alexipharmaca & sudorifera *Et a cura-*
confugiendum; ea tamen eligenda, quæ *tio.*
temperatiora sunt : qualia antea de pe- *Sudori-*
stilentia proposita sunt. *fera.*

Postea, si opus sit, venæ sectio insti- *Vena se-*
tuenda est, & quidem maturè, ac vix *ctio.*
post quartum diem, antequam omnia
in corpore turbata, & vires deiectæ fue-
rint, vbi scilicet sanguis vel copia pec-
cat, vt vasa distendat, vel viribus oneri
est, vel motu aliquo agitur, vt me-
tuendum sit, ne ad partem aliquā prin-
cipem rapiatur. Si verò malum iam pro-
gressum sit, viresque iam laborent, ru-
tiùs intermittitur, quàm intempestinè
instituitur venæ sectio. Si verò vires ve-
næ sectionem non ferant, cucurbitulæ
scarificatæ commodè partibus inferio-
ribus apponuntur.

Purgatio verò in initio harū febrium *Purga-*
non conuenit, nisi quæ primas vias eua- *tio.*
cuat sine insigni reliquorum humorum
agitatione : fortiora verò non conue-
niunt ; cùm humores agitent, venenum
iis magis permisceant, ac periculosas
sæpe alui fluxiones excitent.

Si materia ad superiora vergat & *Vomita-*
nausea *ria.*

nausea vrgeat, vomitus per leuiora vomitoria prouocandus.

Hinc iterum ad alexipharmaca accedendum, quæ tamen talia sint, ne febris per ea augeatur. Itaque postea ea adhibenda, quæ temperatiora sunt, simulque putredini resistunt, qualia sunt; *acetosa, poma citri, granata, pentaphyllum, tormentilla, C. C. os de corde cerui, lapis bezoar, bolus Armenus, terra sigillata, & similia, & ex his parata medicamenta.* In primis verò aquæ bezoardicæ sæpius exhibendæ sunt, utpote quæ statim penetrant, quæ tamen ita temperari possunt, ut simul feбри & putredini resistant. Ideoque iis admiscenda *syrupus acetos. citri, granatorum, acetosa, acetosella* ac similes, & in talium vsu persistendum.

Vesicatoria.

Imminuta materia vesicantia etiam cum ægri commodo cruribus vel brachiis applicantur: cum sine molestia & virium debilitatione materiam venenatam ab interioribus partibus ad externas euocent.

Maligna febris in specie dicta curatio.

Si autem febris maligna sit in specie dicta, maiorque putredo, quàm malignitas, primæ viæ primùm euacuandæ sunt,

De curat. febr. pest. & malig. in gen. 205
sunt, ac non solum clysteres lenientes
locum habent, sed & lenientia, *syr. rosar.* ^{Purga-}
solutius, manna, cassia, tamarindi, agari- ^{tio:}
cus, rhabarbarum, tryphera persica, in pri-
mis si materia turgeat. A fortioribus
verò scammonio, colocynthide, turbith
& similibus planè abstinendum. Et qui-
dem si putredo statim incrementum su-
mat, febrisque inde vehementior ac-
cendatur, ac præcipuè si humores tur-
geant, statim id, & ante tertium diem
præstandum.

Verùm in genere hæc satis determi-
nari nequeunt: in speciali de febribus
hisce tractatione res clarior fiet. Etenim
febres tales pestilètes & malignæ inter-
dum per contagium propagantur, vbi
tutissimum est, conceptum quocunque
modo inquinamentum per sudorifera
& alexipharmaca è corpore expellere,
& postea, si opus sit, purgationem &
venæ sectionem instituere. Interdum
etiam natura ipsa ad ambitum corporis
materiam expellit, vt in variolis & mor-
billis fieri solet. Ac tum etiam natura
in opere suo turbanda non est, nec ma-
teria, quæ ad ambitum corporis protru-
ditur,

ditur, purgantibus ad interna reuocanda, sed potius natura alexipharmacis & sudoriferis in opere adiuuanda. Interdum verò febris à vitioso humorū apparatu ortum habet, aut certè fouetur, & materia vitiosa, in ventriculo, circa præcordia, in primis viis hærens nausea, dolore, æstu, amarore oris, anxietate & aliis indiciis sese manifestat, quæ necessariò quamprimum vel vomitu, vel per aluum euacuanda.

Vena sectio.

Primis viis & corpore euacuato, statim venæ sectio, si ea opus sit, & quidē ante quartum diem, instituenda.

Sudorifera.

Post corporis euacuationem & venæ sectionem vtile est sudoriferi aliquid, sed quod febrem non augeat, exhibere, qualia antea proposuimus. Et quamquam non semper sudor sequatur: tamen talia medicamenta continuanda sunt, & singulis diebus exhibenda, ut corpus sensim ad sudores disponatur, & Natura tandem spontè suo tempore vitiosos humores per sudores expellat. Fortioribus verò sudoriferis initio vires debilitantur: & cum humores in hisce febribus non semper ita dispositi sint, ut
per

De curat. febr. pest. & malig. in gen. 207
per sudores discuti possint; tenuius discutitur, crassius relinquitur.

Quapropter præparatio & alteratio *Alterantia & præparantia.*
humorum instituenda, iis medicamentis, quæ aperiunt, humores, si opus sit, incidunt, ebullitionem & putredinem sistunt, febris feruorem extinguunt, & malignitati resistunt, ac naturam ad sudores sensim disponunt, qualia sunt, *acetosa, scordium, carduus benedictus, scorzonera, sem. citri, rad. tormentilla, pentaphylli, succus citri, granatorum, & ex his syrups; spiritus vitrioli.*

Vbi humores iam satis præparati sunt, nisi Natura eos sponte expellat, per viam convenientem euacuandi sunt. Sed & tum lenioribus medicamentis vtendum; & purgatio vix ante diem decimum quartum instituenda.

Si ad vrinam vergit materia, emul- *Vrinam cientia.*
sione seminum melonum, citri, cardui benedicti cum aqua acetosæ, capillorum ♀, & similibus natura adiuuanda.

Toto verò morbi tempore, tam in *Topica.*
malignis, quàm pestilentibus febribus, pulsibus & cordi medicamenta corroborantia & malignitati resistentia applicanda,

plicanda, quæ passim exstant. Symptomata etiam, si quæ vrgeant, & vires deiciant, tollenda vel mitiganda, ut suo loco dicetur.

Dieta. Diætam quod attinet, cibus sit boni succi & facilis coctionis: & cum vires langueant, cauendum, ne natura copia cibi oneretur. Cibi quoque iis rebus, quæ huic feбри conueniunt, condiendi sunt. A vino, nisi forsan syncope imminet, abstinendum: Commodior verò est potus tenuis ceruisiæ. Commodè etiam præbetur decoctum cornu cerui, cum spiritus vitrioli ea quantitate, quæ ad gratam aciditatem sufficit: cui etiam iulebi rosarum vel violarum aliquid admisceri potest. Sitim enim sedat, obstructions aperit, putredinem arcet, malignitati resistit. *Ægyptij*, ut refert *Prosper Alpinus, lib. 4. de medic. Ægypt. cap. 4.* pulpam tamarindorum & berberis fructum exsiccatum cum seminibus foeniculi vel citri in plurima aqua communi infundunt, potumque ita parant, quem ægris in febribus malignis & pestilentibus toto morbi tempore concedunt, plurimumque in huius potus usu confi

De feb. malign. cum variol. & morb. 209
confidunt : cum tamarindorum & ber-
beris fructus febrium putredini maxi-
mè resistere compertum habeant.

C A P V T XII.

*De febre maligna cum variolis
& morbillis.*

ET si malignitatis, à qua febres mali-
gnæ denominantur, natura occulta
sit, & hinc multa de differentiis harum
febrium dici non possint : non vna ta-
men etiam eiusdem ratio est, sed effe-
ctibus & symptomatibus aliqua varie-
tas sese prodit; unde etiam febrium ma-
lignarum quædam differentiæ consti-
tuuntur, de quibus in specie iam breui-
ter dicemus.

*Variola
& mor-
billi.*

Primò occurrunt febres, in quibus in-
cute nunc pustulæ seu eminentia tuber-
cula quædam erumpunt, nunc efflore-
scentiæ seu maculæ quædam apparent.
Græci ea ἐξανθήματα & ἐκθύματα, La-
tini papulas & pustulas appellant : ho-
diè variolæ & morbilli dicuntur. Quæ
nomina etsi non ab omnibus eodem
modo usurpentur, plerique tamen ho-
diè

die variolas quasi paruos varos nominari putant, & nomen hoc tribuunt pustulis illis eminentibus, humore plenis, quæ plerumque suppurantur, quas Germani *die Blattern & Bocken*, nominant; morbillos verò appellant maculas in cute efflorescentes seu potius exigua in cute tubercula, quæ Germani *die Masern* vocant.

Definitio.

Variolæ nimirum sunt pustulæ in summa cute, partibusque cuti respondentibus, cum febre continua erumpentes, propter peculiarem sanguinis effervescentiam à facultate expultrice excitatæ: Morbilli verò maculæ aut tubercula parva rubra, in cute erumpentia, cum febre continua, itidem à facultate expultrice & sanguinis peculiari ebullitione excitata.

Differentia.

Vtriusque generis aliquæ sunt differentiæ. Variolæ enim aliæ sunt maiores, aliæ minores; quædam albicant, quædam liuent, vel alterius coloris sunt; quædam statim erumpunt & in altum attolluntur ac maturantur, & circulo rubro cinguntur, & sine grauibz symptomatibus erumpunt, & periculosæ non

De feb. mal. cum variol. & morbil. 211

non sunt: aliæ sunt liuidæ, tardè erumpunt, vel statim subsident, & habent circumliuidum, & periculosæ sunt.

Pertinent ad variolas & pustulæ illæ lupini ferè magnitudine in corpore erumpentes, ac instar crystalli splendentes, è quibus aquositas quædam effluit, quas nonnulli idcirco crystallos nominant: Germani *die Schaffablattern oder Bindbocken*, quæ sunt minùs periculosæ, & citra insignem febrem plerumque erumpunt.

Ad variolas deinde pertinent & tubercula illa, sine multa sanie, sparsim nec copiosè erumpentia, quæ Germani *die Steinbocken* nominant, & sunt omnium ferè minutissimæ variolæ & minimè periculosæ, quæ pene citra febrem infantes inuadunt, ac citissimè etiam sanantur, vt infantes rarò decumbant.

Pertinent ad variolas vel morbillos & exanthemata ac tubercula exigua rubra, cum calore atque rufi inuadentia, & aliis morbillorum symptomatibus, minùs tamen, quàm alij morbilli, periculosa: Germani *die Bisttein* siue *Bættein*,

à ru

à rubore appellant. Inuadunt autem quandoque sola, quandoque inter variolas insperguntur, quandoque iis sanatis superueniunt. Quod malum Rubecolam appellare videtur Halyabbas, *lib.8.theoric.cap.14.*

Est præterea alia, sed rarior exanthematum differentia, quæ ad morbillos referenda videtur; quam Neapolitani Rossaniam & Rossaliam nominant, ut refert Iohannes Philippus Ingrassias, *de tumoribus*. Ab aliis purpuræ & rubores ac *ἰσχυρὰ* appellari videntur. Quidam tamen purpuræ nomen etiam petechiis tribuunt. Sunt autem maculæ rubræ & quasi ignitæ, cum vix effatu digno tumore, per vniuersum corpus, quasi quædā erysipelata parua, in principio morbi seu die quarto vel quinto morbi erumpentia. Progressu morbi totum corpus occupant, ut id quasi ignitum appareat, ac si vniuersali erysipelate laboraret; qui color in declinatione iterum, ut in principio, in maculas mutatur, quæ tandem septimo vel nono die euanescent, epidermide squamarum instar decidente.

Subie

Subiectum macularum & morbillorum cutis est, & partes aliæ cuti proportionē respondentes. Deprehensum enim in mortuis, viscerum superficiem æquē, ac cutem extra, his tuberculis ac pustulis scædatam fuisse.

Subiectum,

De causâ horum affectuum grauissima & difficilis inter Medicos agitur controuersia. Arabes, & qui eos sequuntur, causam variolarum & morbillorum referunt in immunditiem sanguinis à primo ortu contractam ex sanguine menstruo, quo infans in utero alitur. Relictam enim hanc in corpore labentem diu delitescere docent, donec agitata instar fermenti faciat, ut totus sanguis instar musti efferuescat, & ita, quicquid impuri in eo est, secernatur, atque ad ambitum corporis pellatur. Idque ideo sic statuerunt, quod viderent omnes ferè homines variolis & morbillis corripī: & qui semel vel bis iis laborarunt, postea ferè ab iis immunes esse.

Causa.

Alij verò sese huic sententiæ opponunt, & ex causâ cœlesti occulta mala hæc prouenire statuunt, cuius impressionem puerilis ætas infirmior facilius sentiat,

sentiat , quàm adulta robustior : neque probabile putant, infantes in vtero impuro sanguine nutriri , aut tamdiu labem hanc in homine latere posse ; cùm notum sit , non solùm infantes , sed & iuvenes , imò ætate confectos & senes, hoc morbo laborasse, qui antea & febribus & scabie laborarunt , quibus meritò , si quid impuri in sanguine fuerit, absumi debuit.

Verùm cùm vtraque opinio suas difficultates habeat, & probabilibus etiam rationibus niti videatur, vtramque coniungemus. Etenim si variolæ & morbilli sint epidemij & contagiosi , negandum non est , ex peculiari quadam æris maligna dispositione eos tum oriri, quam infantes, vtpote teneriores, citiùs percipiunt. Etsi negandum non sit , à causâ externa etiam intus latentem labem in quibusdam in actum deduci posse. Si tamen vis illius malignitatis sit maior, etiam adulti quandoque iis corripiuntur. Si verò sparsim vagantur variolæ, & morbilli, credibilius est, ex priuata cuiusque corporis vitiosa dispositione in vtero contracta eos prouenire; præcipuè

præcipuè si nullum in aëre vitium percipiatur. Et si enim foetus in utero optimam sanguinis materni partem attrahit: tamen ubi is grandior factus & copiosiore alimento indiget, vix fieri potest, quin simul aliquid de pravis humoribus secum attrahat, qui in gravidis cumulari solent. Vnde compertum, infantes variolis & morbillis laborantes in lucem editos, vel statim post ortum iis correptos fuisse. Non tamen impossibile videtur, etiam post ortum è victu pravo simile vitium ei, quale ex sanguine menstruo in utero, contrahi posse. Idque in iis locum habere potest, qui bis vel ter variolis & morbillis corripiuntur. Et si hoc & ea de causa fieri possit, quod ex primo fomite & inquinamento aliquid relictum fuerit.

Erumpunt autem variolæ & morbilli semper cum febre. Per crisin enim quandam excitantur, & ebullitio illa non solum in venis subcutaneis, sed etiâ maioribus accidit; unde calor cordi comunicatur & febris accenditur. Febrisque illa est synocha putrida, ut ex calore æquali & materia, in variolis conclusa

An & qualis variolis & morbillis cōiungatur febris.

conclusa satis apparet. Et pro ratione materiae febris nunc maior, nunc minor est. Et quæ mitis est, sæpe intra paucos dies evanescit, nec ab infantibus, imò & adstantibus, attenditur: quæ verò vehementior est, si morbus salutaris futurus est, morbillis & variolis erumpentibus fit minor. Nonnunquam pestilentem naturam hæ febres induunt, vnde multi infantes extinguuntur.

Atque hoc modo à causis internis variolæ & morbilli generantur. Concurrent tamen sæpe etiam causæ externæ, seu humores hoc modo corrumpentes, seu latentes mouendi vim habentes. Primò est aër, ob siderum influxum seu causas alias ita dispositas, vt humores hoc modo corrumpere possint. Deinde contagium, cum è corporibus variolis aut morbillis laborantibus *ποσει* quædam *ἀποκρίσις*, seu morbidum effluuium alteri corpori communicatum similem in eo morbum excitat.

Est autem variolarum & morbillo-
rum quædam, vt antea etiam dictum,
differentia in substantia, quantitate &
qualitate. Secundum substantiam, aliæ
ex

De feb. malign. cum variol. & morb. 217
ex hoc, aliæ ex illo humore constant. Secundum quantitatem, aliæ magnæ sunt ac multæ, aliæ parvæ, paucæ: Secundum qualitatem aliæ sunt albæ, aliæ rubicundæ, flauæ, liuidæ, violaceæ, &c. Aliæ subitò erumpunt, aliæ lentè; aliæ mox sanantur, & evanescunt, aliæ diu durant. Aliæ externas solum corporis partes occupant, aliæ etiam internas.

Vbi autem imminent variolæ & *Signa*
morbilli, ad sunt dolor capitis, oculo- *diagno-*
rum, gutturis; narium pruritus, sternu- *stica.*
tatio, terror in somno, paroxysmi epileptici-
similes, dolor dorsi, ardor & punctio-
nis sensus in cute; difficultas spirandi;
tussis sicca; tremor pedum, oscitatio,
pandiculatio, cordis palpitatio. Quæ læsæ
actiones accidunt ex sanguinis ebullitione ac
fuliginibus inde per totum corpus disper-
sis. Urina sanorum urina sæpe non est
dissimilis, materia vitiosa ad ambitum
corporis protrusa: interdum etiam turbida,
ob magnam humorum ebullitionem. Hæ-
morrhagia narium est frequens, lacry-
mæ spontè ex oculis solent erumpere,
aut oculi lacrymabundi apparent: vo-
mitus

mitus quoque interdum accidere solet. Facies ac oculi rubent; cutis est aspera; vox rauca. Tandémque etiam febris ex humorum ebullitione accenditur. Hæc ergo signa pleraque si adsunt, & circa tertium vel quartum diem augentur, ac maculæ quædam rubentes in cute apparent, imminentium variolarum vel morbillorum indicium est. Augeturque hæc suspicio, si variolæ vel morbilli publicè grassantur. Paulò post maculæ illæ vel instar granorum milij in altum attolluntur, & postea in pustulas sanie repletas mutantur, ac variolæ fiunt; vel in latum extenduntur, & exigua tubercula fiunt, & morbilli excitantur.

*Signa
causarum
& loci
affecti.*

Humorum autem natura præcipuè ex colore cognoscitur. Ab humore enim bilioso sanguini permisto si sint variolæ, magis rubescunt, & maiorem pruritum coniunctum habent, à pituita colorem album; à melancholia nigricantem habent. Nonnunquam etiam violaceæ, virides, liuidæ sunt, ex maiore humorum corruptione. Si non solum cutem, sed & internas partes occupent, febris

De feb. mal. cum variol. & morbil. 219
febris grauior est, difficultas respirandi
& angustia pectoris magna, tussis item
maior, dolor ventris & intestinorum
vehemens adest.

Variolæ autem & morbilli sunt ex *Prognostica.*
acutorum numero & intra 14. dies ter-
minantur. Erumpunt verò plerumque
circa diem quartum, augmentum in
septimum protrahitur, status vndeci-
mo viget, ab vndecimo ad decimum
quartum est declinatio. Exsiccatio ta-
men variolarum nonnunquam ad vige-
simum extenditur.

Euentum autem eorum febris con-
iuncta, symptomatum magnitudo, ipsa-
rum variolarum ratio, & vires ægri
inducant. Nam si febris atque omnia
symptomata post variolarum eruptio-
nem remittant, si largior hæmorrh-
agia narium præcesserit, si ipsæ vario-
læ sint magnæ, albæ ac rubræ, molles,
eminentes, disparatæ, citò erumpant,
& citò maturentur, salutaris euentus
sperandus.

Febris contra si sit magna, & post va-
riolarum exitum non minuat; atque
variolæ sint violaceæ, virides, liuidæ,

duræ , contiguæ , tardiùs erumpant & maturentur, ac symptomata, quæ in febris malignis adesse solent , sint grauiora , virésque debiliores , periculum portendunt, & vel mortem inferunt, vel alia grauiora mala in oculis, naribus, faucibus, œsophago, pulmonibus, intestinis, epate, renibus, in cute verò foedas cicatrices relinquunt.

Eadem ferè morbillorum est ratio, quæ quò febris & symptomata mitiora , minus periculi habent ; quò verò illa grauiora , etiam plus periculi habent coniunctum. Citiùs tamen iudicantur, nec oculis ita infesti sunt. Rubri etiam & qui citò apparent , mitiores: qui verò virides, violacei, nigri, & qui tarde exeunt, deteriores.

Pessimum verò est, si vel variolæ, vel morbilli non penitus erumpant, vel iterum euanescant. Tum enim materia intus relicta , vel intrò recedente , febris maior accenditur , symptomata ingrauescunt, & ægri plerique pereunt.

Indicationes & curatio.

Curationis autem primarius scopus est, vt naturæ per ambitum corporis vitiosam materiam expellere tentantis
cona

conatus adiuuatur:secūdus, vt prauitas materiæ corrigatur; & tertius, vt vires roborētur;& tandē,ne partes aliquæ dāni quippiam percipiant.præcaueatur.

Naturæ conatus adiuuatur,si humores ad ambitum corporis propellantur, & impedimenta, quæ materiam in expulsiōe turbare possunt, siue sit materiæ copia, siue prauitas, siue viscerum obstructio,remoueantur.

Cū verò malum hoc infantes præcipuè inuadat, venæ sectione opus non est, quam ætas non tolerat, Si verò in eam ætatem incidat, quæ venæ sectionem ferat, & sanguinis abundantia venæ sectionem postulet, mox in principio, ante variolarum vel morbillorum eruptionem, vena aperienda, vt natura, parte oneris leuata, reliquum facilius expellat.

Purgantia fortiora non vsurpanda, ne natura in conatu suo impediatur, vel periculosum alui profluuium excitetur. Si tamen aluus adstricta sit, leni clystere vel lenienti medicamento, quod simul feruorem humorum restinguat, & partes internas roboret, laxanda est.

K 3

Porro

Vena sectio.

*Expel-
lentia.*

Porro videndum, an natura in expellendo officium suum faciat. Tum enim eam multis medicamentis, præcipuè calefacientibus, adiuuare non opus est. Si verò tardiùs & parciùs erūpant variolæ & morbilli, adiuuanda est Natura expellentibus: simul tamen ea admiscenda, quæ partes internas roborant, humorūque feruorem mitigent, ac malignitati resistent.

Expellunt *radices* & *semina* freniculi, *sem. napi*, *cardui benedicti*, *aquilegia*, *citri*: *radices* diptamni albi, *pimpinella*, *capillus ♀*, *flores calendula*, *iuss cicerum rubrorum*, *scordium*, *scabiosa*, *myrrha*, *ficus*, *lentes*, & alia quæ malignitati resistent.

*Refrige-
rantia.*

Refrigerant verò, & simul malignitati resistent *acetosa* & *acetosella*, *lactuca*, *nymphaea*, *portulaca*, *hordeum*, *tormentilla*, *endivia*, *cichorium*, *plantago*, *succus citri*, *vinum granatorum*, *succus limonum*, *oxysaccharum*, *rob ribium*. In quibus exhibendis simul ad febrem & malignitatem respiciendum, & prout res postulat, medicamenta eligenda vel miscenda.

Arabibus

Arabibus medicamenta è ficibus, lentibus, lacca, tragacantha in vſu fuere, quæ etiam à poſterioribus Medicis non ſine fructu vſurpata ſunt. Si tamen malignitas magna ſit, etiam ad exquisitiora alexipharmaca confugere licet.

Imprimis verò danda opera, ne æger frigidum ærem admittat, ſed potiùs in loco calidiore detineatur, vt pori cutis aperti ſeruentur, & naturæ expellenti nihil impediementi obiciatur.

Simul quoque proſpiciendum, ne *Partes oculi, nares & partes internæ lædantur. quomodo à variolis defendenda.* Ideoque pulmones medicamentis è *pauere, lentibus, iuiubis, violis, tragacantha, roſis*; inteſtina roborantibus & adſtringentibus moderatè; oculi, nares, ſimilibus, quæ ex eorum affectibus patient, munienda ac roboranda. Os & fauces colluenda *decocto plantaginis, roſarum rubr. balaust. prunellæ, ſyrupo granatorum & ſimilibus.*

Dum puſtulæ maturantur, pruritus excitatur. Cauendum ergo, ne ſcalpan- tur, & turpes inde cicatrices excitentur. Si fanies ſit alba, & puſtulæ non ſint nimis magnæ, tutiſſimum eſt, naturæ rem

totam committere; si verò magnæ sint, aut plures coniungantur, vbi satis maturas esse ex mollitie, albedine, & doloris remissione constat, aperiri possunt, acu imprimis argentea vel aurea.

Diata.

Diætam quod attinet, ab aëre frigido æger omni studio prohibeatur: nec tamen etiam nimio æstu æger torquendus, eiusque vires deiciendæ. Viçtus ratio sicut in aliis morbis acutis instituenda, tenuis scilicet. Infantibus tamen, si appetitus ferat, plus cibi concedi potest: cum eorum corpora sint *ευδαιμόνια*, & ob copiam innati caloris inedia non ferant. A cibis etiam omnibus acribus, salsis, pinguibus, qui humorum ebullitionem augere possunt, abstinendum, cibique, qui moderatè refrigerent & adstringant, sanguinisque feruorem temperent, vsurpandi. Vinum in principio non conuenit, sed potius cerenifra tenuis, vel aqua hordei. In progressu verò morbi, vbi symptomata remiserunt, adfuetis vini *ὀλιγοσέρου* aliquid concedi potest.

Reliquarum etiam rerum non naturalium

ralium modus sit temperatus, vigiliæ & somnus moderata, æger quiescat. Incipientibus variolis & morbillis, brachiorum & crurum lenes frictiones non inutiles sunt, quibus humores ad ambitum corporis euocantur. Vulgo vsitatum est, pannum rubrum lecto, vt ægro in conspectu sit, ad motum humorum ad exteriora conciliandum imponere. Alius aperta seruetur, leni clystere, si opus sit. Fugiendæ denique vehementes animi perturbationes omnes, ira præsertim ac timor.

C A P V T XIII.

De febre petechiali.

PORRò aliud febrium malignarum genus est, in quo maculæ quædam, *Petechia.* pulicem moribus similes, variorum sæpe colorum, rubræ tamen imprimis, in cute apparent, ab Autoribus puncticulæ, peticulæ, petechiæ nominatæ: vnde etiam febres hæ Peticulares, Petechiales, Lenticulares nominantur.

Sunt autem hæ maculæ sine omni
K 5 pruri

pruritu, extuberantia & exulceratione, qualis est in variolis & morbillis: & apparent maculæ hæ in hisce febris, præsertim in dorso, brachiis, cruribus & pectore, locis nimirum, per quas insigniores arteriæ & venæ transeunt. In facie verò rarò apparent; cum pars hæc externo aëri semper sit obuia.

Causa. Ortum autem habent hæ maculæ ab humoris putridi & corrupti parte tenuiore; unde subito erumpunt & evanescent. Etsi verò fiant, facultate expultrice humoris corrupti hanc partem ad ambitum corporis pellente: tamen rarò id fit criticè: cum plerumque in principio, materia nondum cocta, erumpant, & nulla notabilis materiæ per eas fiat euacuatio, nec melius inde ægri habeant, sed ferè, quò copiosius erumpunt, eò maiorem prauæ materiæ copiam arguant, quæ tamen, ut dictum, per maculas istas non satis euacuatur.

Differentiæ. Sunt autem macularum istarum variæ differentiæ. Primò enim colore differunt; suntque aliæ rubræ, à sanguine temperatiorè, putredinem concipiente ortæ;

ortæ ; aliæ flauæ vel virides, si bilis putrescat; aliæ puniceæ & nigræ, si humor ater putrescat. Deinde quantitate. Aliàs enim copiosius erumpunt, aliàs parcius ; aliæ sunt maiores, aliæ minores, pro humoris copia, crassitie ac virtutis robore vel debilitate. Aliæ in principio, aliæ in progressu morbi erumpunt.

Febris ipsa ex signis febrium malignarum in genere traditis cognoscitur: *Signa* ac ubi sese maculæ coniungunt, certius *diagnostica.* malignitatis argumentum sunt.

Quid etiam de euentu harum febrium sperandum, ex iis, quæ antea de *Prognostica.* prognosticis febrium malignarum in genere dicta sunt, patet. Ipsas maculas per se quod attinet, etsi bonum sit, materiam vitiosam ad ambitum corporis ferri: tamen per maculas hæc sufficiens eius euacuatio fieri non potest. Ideoque etsi, si sint copiosiores, copiosam materiam adesse significant: tamen eam non excutiunt, & propterea periculum potius, quàm salutem portant. Neque tamen paucitas semper bona, & paucitatem materiæ arguit, sed sæpe etiam naturæ debilitatem significat.

cat. Maculæ hæ si deliteſcant, malum: cum ſignificent, materiam, quæ priùs ad ambitum corporis ferebatur, intrò iam vergere, & ad caput, cor, vel aliam partem internam moueri. Maculæ rubræ rutiffimæ ſunt: flauæ & virides peiores; peſſimæ puniceæ vel nigræ. Et ſi quæ in principio erumpunt, ſymptomaticè erumpant; quæ verò ſeptimo erumpunt, criticè erumpere videantur: tamen niſi alia bona adſint, iis non fidentum; cum materiam non ſufficienter euacuent. Si verò tardiùs apparent, malum. Accidit enim id vel ob humorum craſſitiem, in quam ſi incidat malignitas, non facilè ſuperatur; vel ob cutis denſitatem, quæ tranſpirationem liberam prohibet.

Curatio. Tandem curationem quod attinet, ea, quæ de curatione febrium malignarum in genere dicta ſunt, etiam hîc locum habent. Nimirum alius leniatur primò vel clyſtere, vel leniore pharmaco: vel ſi materia ad ventriculum vergat, ægèrque ad vomitum procliuiſ ſit, vomitus prouocetur.

*Vena ſec.
tio.*

Hinc ſi opus ſit, vena ſecetur; idque fiat

fiat ante quartum diem , at postea
omittatur. An autem maculæ iam e-
rumpentes venæ sectionem impedire
possint , de eo in Institut. lib. 5. part. 2.
sect. 1. cap. 17. dictum.

Cum verò Naturam ipsam ad ambi- *Sudoriferum*
tum corporis materiam protrudere vi- *ferum.*
deamus , & vtile sit , in omnibus mor-
bis malignis materiam à maioribus va-
sis ad minora & ambitum corporis
protrudi , & viscera ab humoribus vi-
tiosis liberari , naturæ hic conatus ad-
iuuandus , & materia ad ambitum cor-
poris tendens mox per eum euacuanda ;
cùm aliàs , quod malignum est , nullam
coctionem admittat.

Itaque æger in loco mediocriter
calido detineatur , & mox medica-
mentum sudoriferum , quodque ma-
lignitati resistat , exhibendum , qua-
lia suprà de peste & febribus malignis
in genere , & de variolis ac morbil-
lis sunt proposita. Ea tamen eligenda,
quæ calorem febrilem non augeant: fe-
brisque & malignitas inter se confe-
renda , & eius , quod plus vrget , maior
habenda ratio.

*In fluxu
alui su-
perue-
niente
quid a-
gendum.*

Interdum in hac febre fluxus alui superuenit, qui, nisi sit nimius, non suppressendus, sed naturæ negotium committendum, atque interim saltem alterantibus & malignitati resistentibus causæ morbificæ occurrendum.

Postea pro viribus roborandis, *margaritæ, corallia, C.C. succus granatorum, citri, confectio de hyacintho, alchermes, & similia* exhibenda.

Topica.

Extra quoque cordis regioni & pulvis applicanda medicamenta, quæ venenum à corde auocent & malignitati resistant. Nonnulli etiam inunctionem ex *hydræleo & nitro* ad cutem laxandam humoresque euocandos adhibent.

Vesicatoria.

Neque inutile fuerit, vesicatoria brachiis applicare; præcipuè si exteriora frigeant, atque interiora vrantur, & dolores capitis, deliria, lethargus, & alia in capite symptomata adsint. Sic enim
& humores ab interioribus ad
exteriora auocantur, &
humores à capite
reuelluntur.

CAPVT

CAPVT XIV.

De Sudore Anglico.

FVit & illa febris maligna, quæ an- Sudor
Angli-
cus.
no 1486. in Anglia cœpit, atque in-
de *sudoris Anglici* nomen accepit, &
quadraginta ferè annis in ea grassata
est, & infinitam penè hominum multi-
tudinem iugulauit. Hinc ex *Anglia* dis-
seminata per inferiorem *Germaniam*,
Belgium, *Hollandiam*, *Scandiam*, *Braban-*
tiam, *Flandriam*, *Daniam*, *Noruegiam*,
Galliam, ab anno 1525. vsque ad an-
num 1530. vagata est.

Eadem febris à sudoribus copiosis,
qui ipsam comitabantur, *sudatoria* no-
minata fuit. Correpti enim hoc malo,
sine bubone, carbunculo, exanthemati-
bus, sudore difflebant perpetuo & co-
piofo, qui finem non habebat, ante-
quam morbus solueretur, quod intra
24. horas accidebat. Simul languebant
ægri, animo deficiebant, inquietudine,
καρδιωγμῶ, capitis dolore, cordis pal-
pitatione laborabant, & pulsum cele-
rem, crebrum, inæqualem habebant. Et
palpi

palpitatio cordis eos, qui conualescebant, sæpe aliquot annis, nonnullos ad mortem vsque comitabatur.

Causa.

Causa autem huius febris hærebat in subtilissima sanguinis parte & spiritibus, qui vna afficiebantur; quod morbi breuitas arguit. Et procul dubio sanguis & spiritus ex maligna aliqua aëris constitutione & corruptione hoc vitium contraxerunt; vnde etiam in multis Belgij locis cum aëre nebuloso hoc malum subitò homines inuasit: & aues etiam sub arboribus interemtas repertas fuisse, & abscessus sub alis cicercis instar habuisse, obseruatum est. Qualis autem illa aëris corruptio fuerit, vix explicari potest.

Prognosticum.

Erat autem hoc malum sæuissimum, & intra 24. horas hominem vel iugulabat vel deferebat. Et primò quidem, vbi urbem aliquam inuaserat hæc febris, singulis diebus quingentos vel sexcentos corripiebat, vix verò centesimus euadebat.

Curatio.

Tota verò curationis summa consistebat in sudore, quem natura etiam sponte mouebat, promouendo, & veneno

neno debellando. Etenim omnes, qui sudorem non proliciebant, nec cardiacis utebantur, auramque frigidam captabant, intra 24. horas moriebantur. In sudore tamen proliciendo vires attendendæ, & si eæ sint languidæ, ita is moderandus, ne vires debiles deiciantur. Obseruatum enim est, nimio sudandi studio, & dum ægri præter vires lectis operirentur, magnam hominum partem suffocatam fuisse. Inter sudandum à somno etiam ægri prohibendi erant.

Utebantur autem ad sudorem proliciendum & malignitatem infringendam, *aqua acetosa, scabiosa, terra sigillata, bolo Armeno, dictamno, carduo benedicto, zedoaria, tormentilla, nymphaea, borragine.* Locum etiam habent species liberantis, & similia, quæ in febribus malignis & morbillis usurpari solent.

Inter sudandum ægri reficiebantur *succo & syrupo citri, granatorum, acetosa,* & aliis supra in peste propositis. Odoramenta quoque naribus admovebantur. Vbi æger satis sudauerit, sensim de tegumentorum pondere aliquid tollendum,

lendum, sudorque tandem diligenter
abstergendus.

C A P V T X V.

De morbo Vngarico.

*Morbus
Vngari-
cus.*

INter febres malignas est etiam mor-
bus, quem vulgò Vngaricum vocant,
quod in Vngaria primùm Anno 1566.
innotuisse, & hinc per totam penè Eu-
ropam propagatus fuisse putatur. Non-
nulli quidem febrem petechialem, &
morbum Vngaricum pro eodem mor-
bo habent; & verum est, sæpe macu-
las in eo apparere: verùm non semper
hoc accidit, & latius extenditur nomen
febris petechialis, quàm morbi Vnga-
rici. Species enim quædam febris ma-
lignæ, vel, si cum maculis sit, petechia-
lis, est morbus hic, in castris ex praua
diæta ortus, vnde meritò Castrensem
& Militarem appellari posse putamus:
cùm non solum superiore tempore in
Vngaria, sed & alibi passim in castris
hactenus grassatus, & hinc inde disse-
minatus sit.

Est

Est verò morbus Vngaricus dictus febris maligna & contagiosa, continua quidem, magnum tamen etiam vitiosorum humorum apparatus circa ventriculum & primas vias coniunctum habens.

Causa enim proxima huius febris *Causa.* est putredo & maligna humorum corruptio in vena cava. Cumulantur autem isti & corrumpuntur, ut diximus, diatæ erroribus, ac primò quidem aëris vitio, qui in Vngaria vel extremè crassus est, & nocte nebulis inspissatus, vel iis discussis, extremè subtilis ac æstate feruidissimus, & alibi etiam in castris non semper commodus; cùm castris plerumque commune sit, sub dio cubare, & vapores è terra exhalantes, ut & pluvias excipere, & vestimenta pluviis madefacta cum siccis permutare non posse, tempore verò hyberno angustis sæpe hypocaustis includi. Deinde victus praeus huius morbi causa est, quo milites sæpe in melioris inopia vesci coguntur, & plerumque ij, qui meliori assueti sunt. Hinc cùm è pravo cibo bonus chylus generari non possit, & errata coctionis primæ

primæ non corrigantur in secunda, multi pravi humores in viis primis cumulantur, qui cum chylo ad hepar & hinc in venas deriuantur, atque ex ipso chylo prauo prauus sanguis generatur. Qui & spontè ad putredinem ac corruptionem tendit, tandemque, accedente aëris constitutione incommoda, non solùm putrescit, sed & malignitatem concipit.

*Vngarici
morbi
natura.*

Vnde febris non solùm putrida continua, sed & maligna, eaque contagiosa excitatur, quæ etiam eos, in quibus prauus humorum apparatus non est, inficit; vnde & symptomata nonnihil variant. Sicut & pro regionis, victus & aliarum circumstantiarum ratione morbosus apparatus non semper planè idem est, atque hinc etiam in symptomatibus feбри coniunctis diuersitas quædam occurrit. Imò in ipsa febre pro humoris peccantis ratione quædam diuersitas apparet, vnde ab aliis ad synochas putridas, ab aliis ad ardentes & biliosas refertur. Etsi verò magna etiam, vt dictum, ex victu prauo in ventriculo & primis viis vitiosæ materiæ

materiae copia plerumque colligatur: tamen continens ea huius febris causa non est, sed symptomata quaedam saltem, agitata à calore febrili, præcipuè in febris initio, ut cardialgiam, anxietatem, æstum circa præcordia & nauseam parit, ipsamque febrem auget ac fouet.

Omnia autem, quæ in aliis febribus malignis apparent, etiam in hac febre adesse possunt symptomata, & plerumque etiam maculae & petechiae conspiciuntur. Inter reliqua autem valdè molestus est capitis dolor, unde etiam apud vulgus nomen hic morbus accepit, ut *die Hauptkranckheit* appellatur. Conqueruntur etiam plerique, qui ex victu prauo hunc morbum contraxerunt, de dolore circa ventriculum, ad locum sub mucronata cartilagine, ubi & durities & renitentia quaedam observatur. Sitis adest magna, statim in principio, lingua sicca & arida; paulò post accedunt deliria, quæ soluantur materia ad aures secedente & surditatem excitante.

Morbus autem acutus est; & terminatur

*Signa
diagno-
stica.*

*Progn-
stica.*

natur vt plurimùm circa 14. aliis tamen etiam ad diem 20. extenditur. Quid autem de euentu huius morbi sperandum sit, ex iis, quæ supra de prognosticis febrium malignarum in genere dicta sunt, patet. Nimirum, quò vires sunt fortiores, & symptomata mitiora, eò melior morbi euentus sperandus: contrà, quò vires sunt debiliores, & symptomata grauiora ac plura, eò morbus periculosior est. Nonnullis materia per aluum euacuata salutaris crisis accidit; plurimis, vt dictum, materia ad caput delata & hinc ad aures depulsa ac surditatem excitante, salutis argumentum præbet.

Vt verò in aliis febribus malignis, ita & hîc curatio dirigenda & ad ipsam febrim eiusque fomitem, & ad malignitatem. Symptomata tamen etiam non negligenda sunt.

Curatio. Et primò quidem febrem, eiusque causam quod attinet, in iis, qui in castris & ex victu prauo hunc morbum contraxerunt, hoc peculiare occurrit, quod vitiosi humores, vt in aliis synochis & ardentibus febribus, non solum
in

in vena caua continentur, sed & magnus humorum apparatus circa ventriculum & in primis viis latet, id quod ex antecedente diæta, ventriculi dolore, anxietate, æstu circa præcordia & nausea cognoscitur. Tunc ergo materia ista statim euacuanda est, utpote quæ seorsim & ab aliis humoribus secreta existit, nullam coctionem suscipit, cibos & medicamenta assumpta corrumpit, ac sudoriferis & aliis medicamentis, quæ adhibenda sunt, in penitiores corporis partes rapitur, febrémque auget.

Fieri autem hoc potest, cum per al- *Purgan-*
uum purgantibus, inter quæ hîc imprimis agaricus commendatur; tùm imprimis vomitoriis, quibus sæpe feliciter magna pituitosorum & biliosorum omnis generis humorum, circa ventriculum latentium, copia reiicitur. In iis verò, qui saltem per contagium labem hanc hauserunt, & ex praua victus ratione vitiosos humores circa ventriculum & primas vias non cumularunt, vomitoriis istis & purgantibus opus non est, sed primas vias leniter saltem euacuare sufficit.

Primæ

Vena se-
cie.

Primæ viæ ubi à vitiosis humoribus liberæ fuerint, statim, & quidem primo vel secundo die, vena aperienda, si id requiratur, & ægrorum vires permittant. Si verò dies iam aliquot elapsi sint, viresque prostratæ, & alui profluuium vel vomitus adsit, venæ sectio omittenda. Aperienda autem vena in cubito, vel si vires debiliores sint, vena in talo, quæ etiam à capite materiam commodè reuellit, & in hoc morbo valdè commoda est.

Sudori-
fera.

Natura ita oneris parte leuata, statim sudorifera & malignitati aduersantia medicamenta exhibenda: ea tamen ita temperanda, ne feruorem humorum, febrimque augeant. Conuenit hâc C.C. *preparatum*, *lapis bezoar*, *diaphoreticum*, *bezoardicum minerale*, *terra sigillata*, *puluis Caesaris rubeus*, *Montagnana*, *species liberantis*, & alia suprâ de febribus pestilentibus ac malignis in genere proposita. *Mithridatium*, *theriaca* & similia calida, si ob malignitatis vehementiam exhibere libeat, ne calor augeatur, frigidis aquis & iaceto temperada, quibus commodè etiam additur spir. vi-
triosi

trioli & sulphuris. Non solum autem semel atque iterum ad sudorem ciendum talia propinare sufficit, sed ad vires roborandas, putredinem sistendam, & malignitatem expugnandam, quotidie aliquoties exhibenda antea dicta, minore tamen dosi, & præterea species el. de gemmis, cordiales temperate, diamargariti frigidi, confectio de hyacintho, spir. vitrioli & sulphuris, aqua bezoardica, & alia supra in pestis & febrium malignarum curatione proposita.

Externa quoque regioni cordis & *Externa.*
pulribus applicanda; ut & odoramentis spiritus conseruandi & malignitas expugnanda est, quæ etiam supra de pestis & pestilentium febrium curatione proposita fuerunt.

Diæta tandem sit talis, qualis in febribus malignis exposita est. Et quidem alimenta propter putredinem siccant, propter febrem refrigerent, & cordialibus hisce qualitatibus præditis cōdiantur. Vinum in hac febre noxium, & plerique, qui ab eo non abstinere, intereunt. *Diæta.*

CAPVT XVI.

De febre maligna cum spafmo.

*Febria
maligna
cū spaf-
mo.*

SVnt & aliæ febres malignæ, quæ morbos quosdam & symptomata, spasmus scilicet, catarrhum, tussim, anginam quasi comites habent. Anno enim 1596. & 1597. in Episcopatu Coloniensi, Vvestphalia, Comitatu Vvaldecensi & Vvittensteinensi atque Hassia grassatus est morbus cum febre ferè affligens, quem tùm vulgo *die Ariebelt-tranckheit*, *Ariempffsucht* oder *Zichende Seuche* appellitabant.

Inuadebat enim cum vellicatione & stupore quasi in manibus ac pedibus, nunc in vno, nunc in vtroque latere. Hinc, & quidè subitò, in negotiis quotidianis, homines conuulsio prehendebat, ac primùm digiti in manibus & pedibus conuellebantur, quæ conuulsio postea cubitum, genua, humeros, coxendicem, totumque corpus occupabat, donec ægri instar globi conuulsi aut recta extensi procumberent. Conuulsionem

fronem hanc acerbissimi dolores , & hinc ægrorum clamores & eiulatus comitabantur. Nonnulli etiam cum prima inuasionē vomere solebant. Malum autem hoc nonnunquam dies aliquot , vel septimanas in exterioribus membris hærebat , antequam caput inuaderet , si idonea medicamenta adhiberentur : quæ si negligenterentur , etiam caput afficiebatur , & nonnulli epilepsia corripiebantur , post cuius paroxysmum aliqui ad sextam vel octauam horam quasi mortui iacebant. Alij veterno corripiebantur , alij delirio , quod ad quartum diem & ultra in quibusdam durabat , quodque vel visus , vel auditus læsio sequebatur , vel etiam paralytis. Cessante paroxysmo fames ingens & præternaturalis homines corripiebat. Postea ferè alui fluxus sequebatur ; plerisque tandem pedes & manus intumescabant , vel tubercula seroso humore plena erumpebant. Sudor verò non sequebatur. Contagiosum etiam fuit hoc malum , & quidem haustum contagium sæpe sex , septem aut duodecim menses in corpore latuit.

I. 2

Ortum

Causa.

Ortum habuit malum hoc ex ichori-
bus pestilentialibus, cerebro & neruōlo
generi imprimis infestis. Humores ve-
rò isti maligni ex victu prauo in anno-
næ caritate prouenerant.

*Progn-
stica.*

Fuit autem malum hoc graue, peri-
culosum ac curatu difficile. Qui enim
epilepsia corripiebantur, vix integrè ea
liberabantur, sed per interualla subinde
aliquid mali recurrebat, & qui delira-
uerant, stupidi permanebant. Alij singu-
lis annis mense Decembri & Ianuario
aliquid mali sentiebant.

Curatio.

Curatio consistebat in humoris vi-
tiosi & prauī euacuatione, & cerebri ac
neruosi generis roboratione. Primò er-
go è primis viis humores vitiosi eua-
cuabantur *hermodactylis*, *turbich*, *esula*
preparata, *diagrydio*, *elect. diaphanico*, de
succo rosarum, addito *castoreo*, *costo*, *sem.*
rutæ & cumini.

Postea exhibebantur medicamenta
contra conuulsionem ex *pæonia*, *visco*
quercino, *castoreo*, *salvia*, *cranio humano*,
additis medicamentis contra maligni-
tatem pugnantibus, *radice vincetoxici*,
succisa, *theriaca*, *Mithridatio*. Atque ita
medica

De feb. malig. cum catarr. & tussi. 245
medicamenta purgantia & alterantia
alternis vicibus sumenda & continuanda
fuerunt. Externa verò membra iis
medicamentis inungebantur & fove-
bantur, quæ aliàs in conuulsionibus
conueniunt.

C A P V T X V I I.

*De febris maligna cum catarrho &
tussi, & cum angina.*

QVandoque febres malignas catarrhus epidemicus & tussis comitatur, qualis febris Anno 1510. 1557. 1580. & 1591. ac imprimis Anno 1580. sub æquinoctium autumnale totam penè Europam peruagata est. Atque appellabatur tum iste morbus catarrhus febrilis, & febris catarrhalis, item suffocatiua, Germanis *der Ziep und Schafskusten, Schafstrancktheit und Huenneue.*

*Febris
maligna
cum ca-
tarrho &
tussi.*

Inuadebat hæc febris cum propensione in somnum, capitis dolore, tussi sicca, dolore pectoris, faucium asperitate, ventriculi languore, difficili respira-

L 3 tione,

tione , quæ etiam tussi cessante ad diem
14. durabat. .

Causa.

Ortum habuit hæc febris è constitu-
tione humida annorum præcedentium.
Cum enim humores vitiosi per istam
aëris anomaliam in corpore cumulati
essent , tandemque putredinem & ma-
lignitatem, & quidem cerebro ac pecto-
ri aduersam , concepissent , febris inde
continua accensa fuit, & parte humoris
vitiosi ad cerebrum protrusa , & hinc
ad pectus delabente catarrhus & tussis
excitata fuit.

Morbus hic , etsi tùm maximam
hominum partem corripere , lethali
non fuit : omnes enim ferè eua-
debant , & vix millesimus quisque mo-
riebatur. .

Curatio.

Curabatur autem hæc febris, vt aliæ
malignæ , respiciendo ad putredinem,
malignitatem , & tandem ad caput ac
thoracem , quæ maximè in hoc catar-
rho & tussi afficiebantur.

Venæ sectio tùm locum non habuit,
& experientia comprobatum , omnes
ferè mortuos fuisse, quibus vena aperta
fuit. Purgantia verò lenia planè vtilia
fuerunt,

fuerunt, cùm caussa morbi in primis viis consisteret. Exhibebantur etiam postea, quæ materiam in capite & pectore alterarent, vt in catarrho & tussi fieri solet, atque ea, quæ malignitati resistebant, non negligebantur.

Tandem interdum febribus malignis etiam angina, pleuritis, peripneumonia coniungitur & populariter grassatur, quemadmodum Anno 1348. factum fuit, vt Fracastorius testatur, & Anno 1557. vt refert Dodonæus *obs. c. 21.* & Anno 1564.

*Febris
maligna
cum an-
gina.*

Quæ febres plerunque è præcedente aëris anomalia & imprimis humida constitutione ortum habent, sicuti dysenteriae epidemiae è præcedente aëris siccitate, qualis Anno 1583. & 1626. grassata est.

Et sunt hæ febres plerunque periculosæ, acutæ, & multos iugulant.

Curantur autem illæ, vt aliæ febres malignæ. Ad hoc tamen simul attendendum, vt membro illi, in quo morbi vel symptomatis coniuncti vis est maxima, prospiciatur, & morbus ille ac symptoma, quod febrem malignam comitatur,

Curatio.

mitatur, modo eo, qui in affectibus particularibus proponitur, curetur.

C A P V T XVIII.

De februm symptomatibus tollendis.

*Februm
sympto-
mata.*

Accidunt tandem febribus varia symptomata, quæ sæpe nõ minùs, quàm ipsa febris, ægro molesta sunt, & nõ minùs periculi afferunt, & propterea ad se curationem trahunt, & vt tollantur vel mitigentur, postulant. Talia sunt imprimis, dolor capitis, vigiliæ nimia, somnus profundus, deliria, convulsiones epilepticæ, linguæ ariditas, sitis, cardialgia, alui fluxus, lipothymia, syncope. Quæ omnia ortum habent ab humore febris causa, vel vaporibus & fuliginibus ab eodem excitatis, & hanc vel illam partem, seu copia, seu excessu qualitatum primarum, seu malignitate molestantibus.

Tolluntur verò talia symptomata, vniuersalibus præmissis, materiam illam à parte, quæ afficitur, ad alias ignobiliores & remotiores reuellendo, repellendo,

De februm symptomatib. tollendis. 249
pellendo, dissipando, prout opus; il-
lum qualitatum, quo maximè molesta
est, excessum alterando & corrigendo,
vel etiam malignitatem, si adsit, con-
trariis remediis oppugnando; partés-
que, quæ afficiuntur, si opus sit, robo-
rando; vel etiam ipsi symptomati con-
uenientibus remediis occurrendo. Quæ
omnia, quomodo expedienda sint, in
specie explicare, præter instituti nostri
rationem est, sed Practici libri de eo
consulendi, atque imprimis cuiusque
symptomatis causa diligenter inuesti-
ganda; cum idem symptoma sæpe à di-
uersis causis provenire, & propterea
vno semper remedio tolli non possit.

Deo sit gloria & gratiarum actio.

F I N I S.

Pra cæteris errata hæc duo corrigito. Fol.
160. lin. & verbo 1. lege. aquæ. fol. 171.
lin. 23. lege ànæphoretis.



DE FEBRIBVS

LIBRI PRIMI.

CAP. I.	D E natura febris.	pag. 3
II.	De caussis februm in genere.	7
III.	De symptomatibus februm in genere.	10
IV.	De februm differentiis in genere.	11
V.	De curatione februm in genere.	14
VI.	De febre ephmera.	15
VII.	De ephmera plurium dierum, & synocha sine putredine.	22

De Febris putridis.

INDEX CAPITVM.

III.	De signis februm putridarum in genere.	36
IV.	De curatione februm putridarum in genere.	38
V.	De vena sectione.	40
VI.	De purgatione.	44
VII.	De coctione, & preparatione humorum.	49
VIII.	De sudoriferis, & urinam cientibus.	53
IX.	De diata in febribus putridis.	54
X.	De putridarum februm differentiis.	59
XI.	De febre putrida continua primaria, & in specie de synocha.	62
XII.	De causo seu febre ardente.	69
XIII.	De febribus continuis periodicis in genere, & de tertiana continua.	73
XIV.	De quotidiana continua.	81
XV.	De quartana continua.	88
XVI.	De febribus symptomaticis.	90
XVII.	De febribus intermittibus in genere.	101
XVIII.	De febribus intermittibus in specie, & primò de tertiana intermittente.	122
XIX.	De quotidiana intermittente.	134
XX.	De quartana intermittente.	138
XXI.	De febribus compositis, & semitertiana.	148

LIBRI III.

De Febre hectica.

CAP. I.	De natura febris hectica.	155
II.	De signis febris hectica.	157
III.	De curatione febris hectica.	159

LIBRI

LIBRI IV.

De peste pestilentibusque ac
malignis febribus.

CAP. I.	D E natura pestilentia.	162
II.	De causis pestilentia.	167
III.	De contagio.	170
IV.	De signis pestis.	174
V.	De praeservatione à pestilentia.	177
VI.	De curatione pestilentia.	183
VII.	De pestilentis ac maligna febris natura, & à peste differentia.	192
VIII.	Ad quod febrium genus pestilentes & maligna pertineant.	194
IX.	De causis febris pestilentis, & maligna.	197
X.	De signis febrium pestilentium, & malignarum.	198
XI.	De curatione febrium pestilentium & malignarum in genere.	202
XII.	De febre maligna cum variolis & morbillis.	209
XIII.	De febre petechiali.	215
XIV.	De sudore Anglico.	231
XV.	De morbo Ungarico.	234
XVI.	De febre maligna cum spasmo.	242
XVII.	De febre maligna, cum catarrho, & tussi & cum angina.	245
XVIII.	De febrium symptomatibus tollendis.	248

FINIS.



